


CYEYEMENU

 Ndi ne disanka dya kwikala apa mu dinda emu, ne kuumvwaku dikankamika edi, mucikàle anu mfikilaku pa cibumba cya ku cyambilu. Numfwilaayiku luse bwa dilwa pashiishe. Kadi babeedi lwà paanyima pambelu pààpa, mu mashinyi, mu cyambula-babeedi, bu nanku, nenku—nenku bivwa bikengela mêmè kutangila bwalu bwa bavwa kabayi ne mushindu wa kubwela, nudi numona's, kumpala kwa mêmè kupeta mwa kubwela.

² Mpindyewu, ndi ndikonka bwa mwaneetu wa bakaji udi ne mwà—mwànà mukese awu, ní kènàku mwa kwalukila mu mapingaja emu. Ndi muswe kuyiisha diloolo edi, kabidi, bu Mukalenge mwa kwanyisha. Piikalaye kayi mwa kwalukila bwa dilambula pa dîbà adi to, pàncidi mwanji kwimana ntanta buleyi pa dîbà edi apa, ee, mwambilaayi ne, ùdi mwa kulwa ne mwànà wa mu diboko awu mpindyewu. Kadi yêyè ne mushindu wa kwalukila, ku, diloolo edi, nebiikale bîmpè ndambu bwetu twètù. Kadi ènzè cyònsò cidiye mwa kwenza aci, bilondèshile cyònsò cìdiku mwa kwikala aci. Mona's, yêyè kayi ne mushindu wa kwalukila to, netulwe ne mwànà mukese awu mpindyewu bwa dimulambula. Nenku mpindyewu, byònsò ebi, pàncidi ngaakula apa, yêyè muswe kulwa mpindyewu, nenku edi ndifwanyine kwikala dîbà diine.

³ Mpindyewu, diloolo edi, kudi cintu cya pabwaci menemene, ndi—ndi muswe kwakula diloolo edi pa cyena-bwalu, diyiisha dya ciprofeta dya ne: *Mukalenge, Dîbà Ndyôdi Edi Anyi?* Pa nanku bu Mukalenge mwa kwanyisha, ndi muswe kwakula pa cyena-bwalu aci diloolo edi. *Dîbà Ndyôdi Edi Anyi, Mukalenge?* Anyi ne: *Mukalenge, Dîbà Ndyôdi Edi Anyi?* nanku's we. Ne pashiishe ndi muswe kubwelela pa mpunga ewu, padi ekeleeziya mutwilangane apa. Bwalu, nkwenzeke bintu byàbûngî be mu ndambu wa matuku adi mashaale aa, biikàle bifunkuna ku cintu kampanda cya—cya cinene cîndi mêmè nciyi ngumvwaku to. Kadi tudi, misangu yònsò tudi anu. . . Njila ya Nzambi kî nya kulonda kupeta to bwa muntu, pa nanku bidi bikengela twikale anu twenda ku diitabuuja. Bu muntu kampanda mwa kuumvwija Nzambi, pa dîbà adi kî mbifwanyine kabidi kwikala ne mushinga bwa kwikala ne diitabuuja to, bwalu's pa dîbà adi wêwè—wêwè nyawu ukaadi mumanye. Kadi tudi twenda anu ku diitabuuja.

⁴ Nenku mu dinda emu, mvwa ngeela meeji ne ndi mufwanyine kuteeta kwenza anu kaadisangisha kaa ciibidilu kaa butangadiki, bwalu, ndi bu mushintulule meeji âmvwà naawu paanyima paa mêmè mumane kupweka muneemu ne mumone bantu bààbûngî biimane kuulu, ne biikale bakaadi

bindile ntanta mule. Ne pashiishe, diloolo edi, pàmwápa ne kwikala bantu búngi bushaadileku kaaba aka, nenku pa díbà adi ndi mwa kutungunuka ne cîndi muswe kwamba eci.

⁵ Cintu cimwepele cîndi njinga kumanyisha, pàcìdì bààbúngì baabo biikale batwilangane apa, bààbúngì beenu biikale batwilangane. Ncintu kampana cîmvwà anu ndikanda bwa kumanyisha mbingu bu yibidi mishaale eyi. Neya ne, masambila enu mmandamunyiibwe pa bidi bitangila cilumbu cya citadi cîmvwà naaci ne mbulamatadi aci. Cyākòseki. Ne pa nanku tudi. . . Nci—ncijike cyònsò patudi twakulangana. Bu mudi bààbúngì beenu bumvwa amu cilumbu cìvwàò naanyi cìvwa mbwà tubeji twa shekè tùvwà bantu bafùndile kampanye atu, kadi nansha nanku bôbò kuteeta kwamba ne twine atu tuvwa twanyi mêmè. Nenku bakeba kumfucisha cibawu cya ndola binunu nkama yisatu ne makumi ataanu ne bya mu njila byenze bu ne cìvwa ncintu cyanyi mêmè sungasunga, paabi kabiyi nanku to. Tùvwa ntwa kampanye. Ne ekeleeziya's mmumanye ciine aci. Nwènù bònsò's nudi bacimanye. Ki ndekeelu wa byònsò kufikabo pa kaaba kaa ne. . .

⁶ Ndi nganjì anu kunwenzela cikoso cya bidi byenzeke. Bavwa benze pabwìpì ne bidimu bisatu anyi bitwe ku bitaanu, bu nanku awu, bidimu bitwe ku bitaanu, ngeela meejì, mu ciine cilumbu aci, baatwa kumpala baatwa paanyima, bwa ngiikadilu ne bikwabo byònsò. Kadi mêmè ndi ne kusakidila kwàbúngì bu muvwabo kabayiku mwa kupeta kantu nansha kamwe kaa kumpiisha naaku to, pa nanku kabavwa mwa kumfunda bwa ciine aci. Pa nanku kupangikaku cintu cya kumfundilabo, pa kuumusha anu cya ne, muvwabo bamba's, anu cya dipanga dyanyi—dyanyi, mêmè mwine, ngeela meejì, ku dipanga dya kutamba kumanya mikenji. Bavwa mwa kuntwadila tubeji twa shekè ne mêmè paanyi ngeelapu cyàlà, mfundapu dîna dyanyi, ntwela mu kampanye. Kadi pa díbà adi, bu muvwabi ne mvwa mfundapu dîna dyanyi, tùvwa ntwanì mêmè, nwamonu's. Nansha bu byòbì ne. . . Kungambilabo ne: "Wèwè udi mwenze anu bilenga, mushindu awu. Kadi's tùvwa ntwebe wèwè, ne pashiishe uvwa utupa ekeleeziya. Kadi pauvwa anu ufundapu dîna dyebe apu, tùvwa ntwebe wèwè, nansha byòbì ne tùvwa tufùndila binganyi. Tùvwa tufùnda bu tukutumina wèwè." Pa nanku. . . bu ne tùvwa tufùnda mu. . . bu muntu mufùndepù ne, "dipà dya sungasunga," bìvwa mwa kwikala bìmpè. Kadi twòtò tùvwa tufùndiibwa anu ne, "William Branham." Nwamonu anyi? Nenku pàmvwà mfundapu dîna dyanyi, ki pavwa bwalu bunyangukila pa díbà adi mpòpò apu. Ki cyònsò cìvwàku neyòcì aci. Pa nanku bavwa. . . Ki ndekeelu wa byònsò ku disambila. . .

⁷ Ne pashiishe kî nkwanji kunenga to, nudi bamanye's, bôbò. . . Mêmè kupeta cikeena-kumona cya muntu munene, mufiike, mufiikisha kudi mwìshì, mulaaba mishila, mwikale ne mabàmbà, mwenze bu ngandu wa nsaka-mwabi, muntu

kulwaye, wenda ulwa mutangile kûndi, ne minu ya byamu. Mêmè mvwa ne keele kakese kamwepele, mushindu *ewu*. Ne bavwa bamufunde pambidi apu ne: “Mbulamatadi wa États-Unis.” Nunku mêmè ncivwa ne cîmvwà mwa kwenza to. Ncivwa ne pabwàsà to. Ki pa dîbà adi Mukalenge kumataye mu cyalu, ne cyòci aci kucimunyiibwaci. Nunku nudi bavuluke ne mvwa munulondele bwalu abu, kukaadi ntanta mule.

⁸ Ki bôbò kulwabo ne dyumvwangana, dîngà dituku. Ki mundumbulwidi wanyi, Mukalenge Orbison mu New Albany, ne Ice & Miller mu Indianapolis, pa cilumbu cya citadi aci, kumbiikilabo, e kungambilabo ne: “Vwila kuneeku.” Nunku mêmè kuyaku, mêmè ne Mwaneetu Roberson, ne mukajaanyi, ne balubuludi baa ekeleeziya *ewu*, ne twêtù bônso. Twêtù kukuya. Ki kutwambilabo ne bavwa, mbulamatadi’s, uvwa mwitabe bwa kuumvwangana.

⁹ Ki mêmè kwamba ne: “Mêmè, piikalabi ne ndi ne dibanza dya kufuta muntu nansha ciikàle cinyi, nêmmufutè. Kadi ndi ngenza ne mwanyi mwônso. Kadi,” mêmè ne, “ncyèna ne adi dibanza to.” Ki pa nanku mêmè kwamba ne: “Ndi—ndi . . . Cidi, mbulelela menemene. Nzambi ngudi mumanye. Kadi mbwa cinyi kabayi bampfunda, pa dîbà adi, piikalabi ne ndi mupiile?” Mêmè ne: “Bôbò’s bavwa ne bidimu bitaanu bijima bwa kuteeta kucyenza, kadi kabayi mwa kupetaku kantu nansha kamwe bwa kucyenza naaku to.” Pa nanku mêmè kwamba ne: “To, mêmè ndi mubenge. Ncyakuyifutaku to padibi kabiya bijaadikiibwe ne ndi ne cya kufuta dibanza adi.”

¹⁰ Ki pa dîbà adi mundumbulwidi awu kubwelaye naanyi munda amu e kwakulaye naanyi, kwambaye ne: “Mpindyewu, tudi ne mushindu wa kulumbulula cilumbu aci. Mbulamatadi ngwacilumbulwisha.” Ki yêyè ne: “Paalumbulwishabo, cintu cimwepele cidibo mwa kupeta kûdi, ncyà ne wêwè uvwa . . .” Cîmvwà mêmè, cya ne, mushindu wûmvwà mucyènzè awu. Ncivwa anu . . .

¹¹ Ncitu mumanye cintu pa bidi bitangila dilombola dya mikanda ya mfranga to, pa nanku bivwa anu bikengela bwa mêmè kubyenza mushindu wûmvwà ngeela mêmè meeji ne uvwa ngwa meeji matooke awu. Mfranga ayi ya bwalu kayivwaku—kayivwaku myela ku banki mu dînà dyanyi to. Yivwa misangu yônso myela ku banki anu mu dînà dya kampanye kaa ekeleeziya ne bikwabo, nwamonu’s, pa nanku kakuvwa cintu nansha cimwe cîmvwà mwa kwenza pa bwalu abu to. Ki mêmè . . .

¹² Yêyè ne: “Ee, bôbò mbiitabe bwa kuumvwangana, bwa ndola binunu dikumi ne bitaanu, ne ndola binunu dikumi ya cibawu.” Ne mfranga ya difuta mundumbulwidi yivwa binunu dikumi ne bitaanu. Byenza bwanyi mêmè binunu makumi anaayi. Nunku pashiishe badi bakeba bitaanu bikwabo bya pamutu, ngeela meeji ki mudibi mmpindyewu. Pa nanku mêmè kuya . . .

13 Mémè ne: “Mémè wabo ewu kùndì mufwanyine kupeta ndola binunu makumi anaayi ki kwèpì’s?” Mémè ne: “Udi mumanye, kaanyi kasheete kaa ku bankì mwaba ewu, kadi ne ndola lukama, anyi pàmwápa mishaadile.” Mémè ne: “Kùndì mufwanyine kupetaku miine ndola binunu makumi anaayi ne bya mu njila ayi ki kwèpì?” Ki mémè ne: “Ncyèna ne cintu nansha cimwepele bu cyejà to. Ncyèna kwòkò naayi to. Kwajiki.”

14 Ki yêyè ne: “Mukalenge Branham,” yêyè ne, “bwalu budi nunku. Twètù balumbulule cilumbu aci,” yêyè ne, “kakuyi mpatà to tudi mwa kucimuna mu cilumbu aci.” Yêyè ne: “Kadi mona mudi bwalu. Tudi mwa kucimuna, bwalu mona cingènzà mémè. Bòbò nebămbè ne yònsò yidi yebe bwalu uvwa mwelepu cyâlà mu dînà dyebe. Nenku nebămbè ne nyeebe wêwè, nansha muvwayi myediibwe ku bankì mu dînà dya kampanye, ekeleeziya, kampanye kaa Branham, ne pashiishe ekeleeziya amu.”

15 Nenku musangu nansha umwe, kabavwaku mwa kusangana dyeya nansha dimwe dîmvwàku mutuule bwanyi mémè mwine to. Aci mbulelela. Nzambi mmumanye. Kudi bantu basòmbe kaaba aka mpindyewu, bàtù naanyi kubangila anu kwine kwònsò aku. Kakuvwaku dyeya nansha dimwe dînkadiku mutuule bwanyi mémè mwine to. Yònsò yivwa anu bwa Bukalenge bwa Nzambi, myaba yònsò, kabeji kònsò kaa shekè, ne bikwabo byònsò.

16 Kadi, monaayi aci, kadi aci kaciyena ne bwalu to. Civwa—cidi ne cya kwikala cyanyi mémè, dyambedi, ne pashiishe cya ekeleeziya, cya kampanye. Kadi badi bòbò ne mushindu wa dicyenza, nudi bamanye’s, mishindu yònsò ya difinukila yidibo mwa kwenza. Ki pashiishe mémè kwamba ne: “Ee, mémè—mémè ncyakucyenzaku to.”

17 Ki yêyè ne: “Ee, twètù bacimune mu cilumbu aci mushindu awu, bwalu, mémè—mémè nêngămbè patooke ne ôwò awu ‘mmapà a sungasunga.’ Wamonu anyi? Nêncyămbè, ku mbulamatadi ne, ‘mmapà a sungasunga.’” Ki yêyè ne: “Nenku, pângîkalà mwenze nanku, byònsò biikaà bipite pamutu paa binunu dikumi abi nebiikale bumpyanyi. Nenku pashiishe newalukilemu cyakabidi, ne nebakulame bwa bidimu bikwabo bitaanu, babikenketa byònsò.” Nwamonu anyi? Paudi ufunda kabeji kaa shekè, kadi kopicila mu cibambalu cya difucilangana mfranga. Badi bafwatula, benza fotokopi wa kabeji kaa shekè aku. Mu bushuwa bwa bwalu, mémè, mwya paanyi ne tubeji twa shekè twònsò atu, bwa ne twakapicilamu. Pa nanku bòbò kwamba ne: “Ki mwaba wakukwacilabo ngwòwò awu, bàkwalujamù buludi cyakabidi.”

18 Ki yêyè ne: “Cintu ckwabo, Mukalenge Branham, byòbì byenzeke ne, wêwè anu mudidinge mubiikidiibwe kudi

mbulamataadi, mushindu awu, bwa dikenketa, nansha wêwê mwenze cinyi, ku mêsù a bantu bônsò: ‘Udi mucinguludi wa mfranga ya bende.’ Wamonu anyi? Kadi apu’s kwajiki.”

¹⁹ Tangilaayi mwambi wa ba-Baptistes lwà mu Mississipi emu, kakwacikwetu aku. Mukaji mukwabo mmujuuke kwamba anu ne ùvwa mubwele mumupende. Kadi muntu awu kutwalaye cileeeji cifumina mu ditunga dijima ne myaba yônsò, cya ne yêyê kavwaku nansha pabwîpî ne ciine cimenga aci to, kukaavwa matuku, dituku kumpala, anyi dituku dyàkalondà, mu mushindu wa ne nzuji wakajinga kukudimuna cilumbu bwa kumwambila bwa yêyê kufunda mukaji awu bwa cilendwishi. Yêyê ne: “Mulekele aye.”

²⁰ Kadi paakeelabo cyôci aci ku diteeta dya *Mukenkeci*, mu ditunga dijima, nudi bamanye cyâkenzekà anyi? Bya pa lukama makumi mwandamutekete ne itaanu bya beena Amerike baakamba ne: “Lwenyi kalutu lununka kabayi balulenge to.” Nenku kakwacikwetu kavwa kakwate ne bya luse aku, kakayi kenze bwalu to anu bu mêmè kunu, anyi bu muntu mukwabo kana yônsò ewu, yêyê’s neayoobe bwa cyôci aci matuku ende ônsò adi mashaale awu, pende kayimu ne bwalu nansha bumwe to.

²¹ Mêmè kadi kwanji kuumvwa bwalu abu buntondele mu dikoshi, bwa katanci, pa kwela meeji ne ndi mufile mwoyi wanyi ku Bukalenge bwa Nzambi, nditâcisha bwa kwenza ne, bantu biikale bafuta bitadi byabo ne benza bintu kampanda, ne benza maalu adi malulame, ne kuvwija bacinguludi baa mfranga ya bende balwa bantu balulame; kadi ki kwenzabi ne bikengela mêmè kwangaciibwa bu ne mvwa mucinguludi wa mfranga ya bende, mêmè mwine. Mêmè kudyambidila ne: “Cîngââlù kwenza ki cinyi’s mêmè wabo ewu?”

²² Ke pa dîbà adi kumvwilaci mu meeji, ke mêmè kutangila mu Bible. Muntu yônsò mu Bible, katuyi tushiya muntu to, uvwaku anu ne mudimu wa nyuma awu, pavwa Sataana upangila bwa kumupetela pa bwalu bwa nsômbelu mubi anyi cintu kampanda, mbulamataadi nguvwa umubakula. Alukilaayi anu ku mwaba kana wônsò unudi waswe, nupweke too ne ku ndekeelu: Môsà, Danyelee, bânà baa beena Ebelu, Yone Mubatiiji. Yesu Kilisto wakafwila ku byanza bya nguvena, dinyooka dya lufu. Pôlò, Peetelo, Yakobo Munene, Yakobo Mukese, yônsò wa kudibo wakafwila anu ku byanza bya mbulamataadi.

²³ Mbwalu, bidi ne, mbulamataadi yônsò ewu, utu nkwasà—nkwasà wa Sataana. Yesu ngwâkamba nanku. Bible udi ucyamba. Nwamonu anyi? Bukalenge bwônsò ebu butu bukontononyiibwe kudi dyabulu. Kulwalwa Bukalenge bwikalà bukôntônônyiiibwe kudi Kilisto, kadi abu mmu Bukalenge bwa bidimu cinunu. Kadi ebu, makalenge aa mpindyewu, nansha tudyelela meeji ne mmalenga a bishi, nansha nanku, paanyima

paawu apu, mma—mmakookesha kudi Sataana. “Makalenge aa,” mwakambaye, “ngaanyi mêmè. Ndi ngenza naawu cîndi muswe. Nênkupèèshèwu Wêwè, bu Wêwè mwa kunkuukwila.”

²⁴ Yesu kwamba ne: “Ngumukile apa, Sataana. ‘Neukuukwile Mukalenge, ne Yêyè nkaayende ke uwakwacila mudimu.’”

²⁵ Ke pa dîbà adi mêmè kuteketa mu maboko. Mukajaanyi mmunteeleje. Mêmè kutungunuka, kwamba ne: “To, mukalenge. Mêmè, bu ne mvwa ne dibanza adi, mvwa mwa kudifuta. Ncyèna naadi to, ne ncyakudifutaku to. Kwajiki.” Mêmè ne: “Mmunyi mene mûndi mwa kudifuta’s, twamb’eku twamb’eku?”

²⁶ Pa nanku, mêmè kwalukila kumbelu. Mêmè kwamba ne: “Meda, ovesha bânà mâyi kwîsù. Longolola bilambà byabo. Nkaadi ngumuka.” Mêmè ne: “Bôbò kabaakupetaku nansha mene mwa . . . Byônsò, ngonyonyi yândàmùnù myadi.”

²⁷ Mêmè ne: “Ncinyi cîndi mwenze? Ngambilaaku.” Mêmè ne: “Kacya, mêmè ewu, ndola binunu makumi anaayi? Kya! Kwèna ufika ku dyumvwa cidibi byumvwija kûndi to.”

Ke kubwelaye, bu mudi mukaji mukese mulenga maalu mufwanyine kwenza amu, ne . . .

Mêmè kwamba ne: “Nkaadi ngumuka.”

²⁸ Yêyè ne: “Udi wêwè wela meeji ne aci ncifwanyine kwenza bwalu bwîmpè anyi? Ukaadi musambileku pa bwine bwalu abu anyi?”

²⁹ Mêmè kudyambidila ne: “Ee, pâmwâpa bikengela nsambile cyakabidi’s.” Mêmè kwalukila mu nzubu. Bivwa byenze anu bu ne Mukalenge ùvwa ungambila’s, Mufundu.

³⁰ Misangu yônsò, bikengela kutangila Mifundu, cikaadîku Nzambi mwenze pa bwine bwalu abu, nudi numona’s.

³¹ Nenu dîngà dituku, baakaMwela lukonko, nudi bamanye’s, bakeba bwa—bakeba paa kuMfundila kwa mbulamatadi. Bôbò ne: “Mbikumbane bwa twêtù beena Yuda badishikamine aba kwikala tufuta mulambu anyi bitadi kudi Kaayisa anyi?”

Yêyè ne: “Nudi ne dikuta mwaba awu anyi?” Yêyè ne: “Cidi cifundapu eci ncyanganyi?”

Bôbò ne: “Ncyà Kaayisa.”

³² Yêyè ne: “Nenu peeshaayi Kaayisa bintu bidi bya Kaayisa. Kadi Nzambi, bintu bidi bya Nzambi.”

³³ Mêmè kwelanganapu meeji. Mêmè kubuulula mu Bible e kucibala. Mêmè kudyambidila ne: “Bulelela, Mukalenge, bwa aci ncyà bushuwa. Kadi eci kî ncyà Kaayisa to. Eci civwa Cyebe Wêwè. Kacivwa cya Kaayisa to. Bu ne civwa ncyanyi mêmè, nunku ndi mufute bitadi bipite ne piine apu anyi cintu kampanda, ee, nunku mbwalu bukwabo, bwa ne civwa ncyà Kaayisa. Kadi, eci, eci’s nCyebe Wêwè. Wamonu anyi? Ne cyôci kacivwa—kacivwa cya Kaayisa to, twamb’eku twamb’eku.”

34 Nudi bamanye's, Yèyè utu anu ne dyandamuna misangu yònsò mu Dìyi. Mémè kutungunuka ne kubala ndambu, ke Yèyè kwamba ne: “Amba tũng, Simona, kwênàku ne ndobo wa mishipa mu mpaaya mwaba awu?” Nwamonu anyi? “Wèwè ewu's utu misangu yònsò wenda anu ne ndobo wa mishipa ne nshinga. Mémè paanyi's ndi mfuma ku dyela lupetu mu cibucilu mu dinda emu, mu banki wa mishipa ku—ku musulu kwaka, udi mumanye.” Wamba ne Yèyè . . . “Ndi mwele lupetu mu cibucilu, ne ncyà bushuwa ne mulombodi wa banki neapatule cidiye mupete aci. Pweka wèwè anu kuntwaku wèlè ndobo mu musulu amu. Nenku pawatupula banki awu, umaanune mukana mwende amu, udi umona's, nenku yèyè ne—neapatule lupetu alu. Katubalendwishi to. Kubatwadidi cilendwishi to. Wamonu anyi? Uye ukalufute, Simona. Neciikale bwanyi Mémè ne wèwè.”

35 Mémè kudyambidila ne: “Cya bushuwa, Nzambi. Wèwè nyawu utu ne banki ya mishipa ne bikwabo byònsò, mu ditunga dijima. Mémè ncyèna mumanye mwenzekabi to.”

36 Kadi twètù kupweka. Mémè kwangata bânà beetu mwaba ewu mene mu ekeleeziya ewu bààkiimanà ku luseke lwanyi, ke mémè kuuja dibeji dya dipatwisha naadi, ne mémè kupeta ndola binunu makumi anaayi ayi, e kuyifuta.

37 Mémè kwalukila kumbelu. Mwawa nkeba kumanya mushindu wùmvwà muuje kiine kabeji kaa shekè aku, ne bavwaku mwa kumpinganyina cyakabidi. Mémè kwamba ne: “Eci mbwena kwamba ne ngàshàadi mudishikamine ku bitadi byònsò. Ee, bikengela anu bôbò bafunde dînà paanyima paa aku aku, ncyà bushuwa ne bôbò nebabwelakane paanyima paa cyôci aci.” Mémè kutungunuka anu ne kubiikila, mbiikila banki, bwa kumona ne bavwa bafwanyine kucyenza.

Kadi, ndekeelu wa byònsò, Bob kungambila, ne: “Billy, bacyènji.”

38 Mémè kubwela e kwela mukajaanyi diboko kunshingu, kwamba ne: “Munanga wanyi, ngàshàadi mudishikamine.” Mushindu awu wa didyumvwa's, dya kwikala mudishikamine!

39 Ne pa nanku ndi mwa kuyifuta mpindyewu, bācīmpeepèjìdi bikole be. Ndi mwa kuyifuta ku ndola binunu binaayi ku cidimu. Mpindyewu, ncyèna mwa kuloofwaku kabidi to, balumyana wa yaaya. Bikengela mpatuke nye kenza mudimu. Pa nanku mémè—mémè . . . Bidi binkengela bidimu dikumi bwa kuyifuta. Nenku piikala ne—piikala Yesu kayi mulwe to. Ne piine apu, paalwaYe apu, mabanza ônsò neajike dîbà adi wôwò miine. Nwamonu anyi? Pa nanku, pa dîbà adi, nenku ndi—ndi ntekemena ne nwènù bònsò . . . Masambila enu . . . Nenku, diloolo edi, nêntungunukè ne cintu kampanda ciikale anu citangila cyôci aci ndambu. Kadi masambila enu ngadi mankwacishe. Twasakidilaayi, wa manza tente. Nzambi anubeneshe. Nnasha tusanganyiibwa penyi, ncyadyakupwaku aci mwoyi to.

40 Diloolo edi, bu Mukalenge mwa kwanyisha, ndi njinga kwambaku amwe a ku maalu ândi mumanye. Nenku nwikale batwishiibwe bwa kulwa. Mpindyewu, vulukaayi: *Bakalenge, Tudi Dìbà Kaayi?*

41 Mpindyewu, netwikale mwa. . . Ndi ngeela meeji ne, badi ne ndongamu muule tente bwa citupa cya. . . lumingu cidi cishaale eci. Nenku mu dimwe diloolo mudi. . . Masangisha, diloolo edi, leelu ne diloolo edi, ne mu dimwe. Mu dimwe diloolo nekwikale masangisha a nciisha. Nenku—nenku pa dìbà adi cidi cinupa diibidi, Dituku dya Cidimu Cipyacipya; pawikala wa pambelu paa cimenga, udi mwa kwalukila kwebe kumbelu.

42 Nenku netwikale ne ndambu wa bambi balenga mwab'ewu bwa diine disangisha adi. Twètù, ka—kasumbu kaa baakudi balenga, ne nebaakule ku muntu ku muntu benda bàshìilangana, biya nanku too ne mundankulu. Ne misangu mikwabo badi bangata meesa a Mukalenge, piikalawu mateekiibwe mu ndongamu awu. Ncyêna mumanye ne bàèna musangu ewu, anyi kabààkuèenza. Anu padibo bôbò beela mbila ya masanka, beela mikunda, batuuta midilu muulu, banwa maala, benza bintu bya lukutukutu apu, twètù netwikale twangata meesa a Mukalenge. Amen. Netubange Cidimu Cipyacipya mu mushindu mulenga, ne meesa a Mukalenge. Mpindyewu, nudi babiikidiibwe bônso. Ne ndi ntekemena ne, nwênù, Nzambi wa mu dyulu neanupe mpunga wa kushaala too ne ku dìbà adi panwikala ne mushindu.

43 Mpindyewu, kumpala kwa kulenga Dìyì, ndi muswe kwamba eci, kabidi, ne ndi bushuwa nsakidila ekeleeziya ewu, bidimba byende, bwa bilàmbà bilenga bya nkooci binudi bansumbile ebi. Twasakidilaayi, wa manza tente. Aci ncyà mushinga be bwanyi mêmè. Twarta twenu twônso ne bikwabo bya mu movù wa—wa—wa Noël abi, ne mapà anudi batumine famiye awu, ne, kaa, mêmè, bivwa búngì kabuyi kubala bwanyi mêmè. Ne tuumatoba tukese tudi katuyi mwa kulenga ditoba dya mu mwoyi wanyi atu, kakwena cintu nansha cimwe cidi cifwanyine kucyenza mu mushindu awu to, pa kumanya ne mbifumine kunudi nwênù. Ne bamwe baa kudibo mbantumine amwe a ku mapà abo a Noël mu mfranga.

44 Ne bamwe baa kudibo mbantumine bya nanku awu. Mwaneetu wa balume kampana mmuntumine mpùtùmùnyì, ne mmumwenze ne dîna dyanyi difundapu. Kaacitaata kakese kaa dyasa ne mpengele kaudi utangidilamu; kadi ne Disambila dya Mukalenge mwômò amu. Nenku, kaa, bintu bu nanku awu, bidi anu, bitudi anu banange bikole. Mukajaanyi ne mêmè ne bânà, tudi ne dijinga dya kunwambila anu ne: “Twasakidilaayi, wa manza tente.” Aci ncikese bikole. Kadi nêngãmbè nunku ewu ne, dìyì ditambe bunene dîndi mêmè ngeela meeji ne ke didi muntu mufwanyineku kwamba ndyôdi edi: “Nzambi anubeneshe.” Kakwena cidi cifwanyine kwikalaku citambe bunene to.

45 Mpindyewu, ne bwa bânà beetu baa mu ekeleeziya ewu, badi bansumbile cingoma aci, ndi—ndi muvwale nkooçi wanyi awu, kadi ncivwa—ncivwa ne mushindu wa kulwa ne cingoma aci mu ekeleeziya to. Kadi civwa . . . Aapu’s bavwa bafwanyine kupeta cya kumbanda naaci bulelela, kî mmwômò anyi? Pa nanku ncyá bushuwa ne ndi—ndi—ndi nzwela anu twasakidila, nwênù bânà beetu. Ne nkaavwa muswe kubala mênà abo pa kabeji kakese . . . Kadi umwe wa ku bânà beetu abu mmulwe kûndi makeelela awu, mungambile ne: “Kaa, ku—ku—kungeedi twasakidila to, Mwaneetu Branham. Ncifwanyine anu kuumusha disanka diine dya bwalu abu.” Wamonu anyi? Pa nanku ke mêmè kudyambidila ne bakwabo baa kudibo mbafwanyine kwela meeji amweamwe awu. Kadi ndi ne dînà dyebe. Mbaàtuuté ku mashinyi. Nêngùikalè anu mudivuluke. Nenku Mukalenge akubeneshe bikole.

46 Nenku nutu bamanye kûntù mpetela dyanyi diikisha, nkubwela mu cibambalu cya ciikishilu mwamwa ne kusòmbamù, ne kumononona byònsò abi. Pândi mfika mu mushindu wa mwikale mubinduluke, nciciyi mwa kuya kule menemene to, pa dîbà adi ndi ngeela meeji ku lwendu kampanda lwa buluwà lûngàkenzà mwaba kampanda, anyi mwaba kampanda wûngàakayà kaloba mishipa. Ntu nganyisha aci bikole. Nzambi anubeneshe.

47 Mpindyewu, twânjàayi kwinyikaku mitu yetu bwa katanci kakese, patudi tuseemena ku Dîyi apa. Ndi mutwishibwe cya bushuwa ne kudi malomba muneemu emu mu dinda emu, mapitepite bûngi mu mushindu wa katuyi mwa kuàbala bwa mpindyewu to. Kadi ndi ndikonka, patucidi ne mitu yetu miinyika apa, dilomba dyebe dya sungasunga adi, bu wêwè anu mwa kudilama pa mwoyi webe, kadi kwela anu byanza muulu cyanaana, wamba ne: “Nzambi, Wêwè ngudi mumanye cîndi ngeela meeji mpindyewu.”

48 Mukalenge Yesu, Wêwè udi mumone cyanza cyònsò. Ne Wêwè udi mumanye cidì paanyima paa cyôçi aci. Kwinshi menemene kwa cyanza aci kudi dilomba kampanda. Nenku nyewu tulwa mpindyewu, ne kaneemu kònsò, tubanda too ne ku Nkwasa wa butumbi wa Nzambi udi ne mwoyi, dibwe dinene ditooke dya busanga didi dyalabale eku ne eku kwa cipoolo cya cikondo adi, mudi Yehowah Nzambi musòmbèle Mwômò amu, ne Mashì a Kilisto miikale asanganyibwa pa cyoshelu. Nenku tudi twakwila mu Mashì awu, ku Ewu wâkamba ne: “Nulombe Taatu cintu kana cyònsò mu Dînà Dyanyi, nebanupeesheci.” Kwênàku muswe kuteeleja anyi, Nzambi, mu dinda emu, bwa kwandamuna ku malomba abo? Nyewu nteeka dyanyi paanyi dilomba pamwe ne abo bôbò, leelu ewu, bwa Wamona mwa kudifila.

49 Mishwala nyeyi miteeka mwaba ewu, Mukalenge, nya babeedi ne badi mu ntatu. Ne twâkayiila mu Bible, ne: “Bavwa

bangata pambidi paa Pólò Munsantu mishwala ne tulùlù, ne bavwa bayiteeka pa babeedi, ne nyuma ya bukooya iwva ipatuka munda mwabo, ne masaama avwa umuka.” Nenku, Taatu, bu mutukaadi bamanye kukaadi ntanta mule, ne biikale bamanye cya bushuwa ne twètù katwena Pólò Munsantu to. Kadi, twamb’eku twamb’eku, tudi tuumvwa ne kacivwa m’Pólò Munsantuawu to. Ûvwa n’Kilisto uvwa munda mwende. Ne Wèwè udi “umweumwe awu makeelela, leelu, too ne kashidi,” bilondeshile Mufundu. Mpindyewu, bantu aba, Mukalenge, mbiitabuuje ne twètù balombe Nzambi, ne bangate mishwala eyi bakayiteeke pa babeedi baabo, nebasangale. Ndi ndomba ne biikaleku nanku, Mukalenge, paateekiibwa mishwala eyi pa babeedi abu.

⁵⁰ Ne bu mwakambiibwabi, musangu kampanda ne, Izaleela mwikale wenda uya mu njila wa mudimu, mutangile ku buloba bulaya, kadi Mbù Mukunze kubacyamakana mu njila, anu mu kajila kiine kaa mudimu aku. Kadi Nzambi wakatangidila panshi mu Dikunji dya Kapyà adi, ne mèsù a cijji, ne ke mbù awu kukwacikaye bwòwà. Ke kwalujaye mavwala ende cyanyima, màyi ende. Ke Izaleela kupicilamu wendela pa buloba bùme, mutangile ku buloba bulaya.

⁵¹ Mpindyewu, Mukalenge, leelu ewu, tangidilaaku mu Mashi a Yesu. Ne Wèwè udi mumone cyenzi eci cya diitabuujà citudi twenza kaaba aka mu dinda edi. Nenku swaku bwa Sataana akwacike bwòwà ne umuke. Ne swaku bwa umwe ne umwe wa ku beena lwendu badi kaaba aka aba, ne umwe ne umwe wikalabò mwa kutentekela mishwala eyi, swaku bwa bôbò. . . njila akanguke, ne masaama umuke, ne swaku bwa batungunuke ne lwendu batàngile ku buloba bulaya, biikale balombodiibwe kudi Nyuma Mwîmpè, Dikunji dya Kapyà. Enzaku nanku, Mukalenge.

⁵² Mpindyewu, beneshaaku masangisha, mèyi, dyumvwija, kubala. Ne swaku bwa Nyuma Mwîmpè angate Dìyi, mu dinda emu, ne àtwàbànyìnèDi muntu ne muntu ne kalolo kònsò, Mukalenge, patudi twenda tuseemena pabwîpi ne cintu kampanda cya cinene menemene citudi katuyi bamanye ne ncinyi apa. Myoyi yetu idi inyunga mu mushindu wa pabwawu, Mukalenge. Nenku tudi tulomba mpindyewu, bu mutudi tuseemena kùdi Wèwè ne Dìyi Dyebe ne kaneemu kònsò, bwa Wèwè kutuumvwija cididi diswa kwamba. Bwalu tudi tulomba nanku mu Dìna dya Yesu. Amen.

Mpindyewu, diloolo edi, kanupu mwoyi . . . *Dìbà, Tudi Dìbà Kaayi?*

⁵³ Nenku mpindyewu, mu dinda emu, ndi muswe kubuulula, ne nwènù peenu badi ne Bibles yenu. Anyi kucifunda, pawikala ne dijinga adi, mu Mifundu, mwaba utudi baswe kwakwila, mu tusunsa tukese emu, ùdi ùsanganyiibwa mu Mukanda wa

Byenzedi. Tudi bafwanyine kubala myaba ibidi anyi isatu. Byenzedi 26.15, dyambedi. Byenzedi, nshapita wa 25 ku mvensa wa 15, bwa kubangilapu.

⁵⁴ Pashiishe tudi baswe kubala Byenzedi 23.11. Nenku nudi bafwanyine kusakidila ku cyôci eci, panwikala baswe, pâmwâpa ncyakupeta dîbâ dya kucibala to, Filipoooyi 1.20. Byônsò bidi ne mmwenekelu umweumwe, mêtî amweamwe.

⁵⁵ Mpindyewu, mu Mukanda wa Byenzedi, 26.15, tudi tubalamu nenku ewu:

*Ke mêmè kwamba ne: Wêwè udi nganyi, Mukalenge?
Ke yêyè kwamba ne: Ndi Yesu ûdi ukengesha awu.*

. . .juuka, wimanyine kuulu: bwalu ndi mukumwenekela mmu kiipacila aka, bwa kukuvwiya mwambi ne ntemu wa bintu byônsò byûdi mumone ebi, ne wa bintu bîngikalâ mwa kukumwenekela;

Nkusungila kudi bantu, ne kudi baa Bisamba bya bende, . . . kûndi nkutuma mpindyewu eku,

Bwa kubatabeeja mêtî, ne bwa kubakudimuna kubuumusha ku mîdimâ kubatuma ku bukênkè, ne kubuumusha ku bukole bwa Sataana kubatuma kudi Nzambi, bwa kupetabo difwidiibwa dya luse ku mpekaatu, ne bumpyanyi munkaci mwa badi bajidiibwe ku diitabuwa didi mu mêmè.

Pa nanku, Êyî. . . Agripa, ncyakashikuka ku cikeena-kumona cya ku dyulu to:

Kadi kuleeja dyambedi kudi baa mu Damaseke, ne mu Yelusalema, ne mu mîbangubangu yônsò ya Yudaaya, ne badi . . . pashiishe kudi baa Bisamba bya bende, ne bidi bikengela kunyingalalabo ne kukudimukilabo kudi Nzambi, ne kwenzabo byenzedi bidi bikumbanangane ne kanyinganyinga.

⁵⁶ Mu Byenzedi 23, ku mvensa wa 11 cyakabidi:

Nenku bufuku bwâkalondâ Mukalenge wakiimana pawîpî nende, ne wakamba ne: Ikala mukoleshe mwoyi, Pôlò, bwalu . . . wâmanyi kumfidila bujaadiki mu Yelusalema, ke mûdi ne cya kufila kabidi bujaadiki mu Loomo.

⁵⁷ Nzambi asakidileku mabeneshâ Ende a cijila ku dibala dya Diyî didi ditambe kwikala dya ngâsâ, dya cijila ditudi naadi kumpala kwetu eku edi.

⁵⁸ Mpindyewu, mvwa nteeleja muntu kampanda wakula, anyi uyiikila, anu abidi adi panshi aa, ke yêyè kwamba mwaku ewu ne: *Cyeyemenu*. Ke mêmè kudyambidila ne: “Awu mwaku’s mmulenga be.” Ntu ngumvwa bawamba misangu yâbûngî be ne: “Kakuyi mpatâ to.” Mbwena kwamba ne . . .

⁵⁹ Mêmè kutangila mu nkonga-myaku, wa Webster. Bilondeshile Webster, ùdi “Cipwangane mu cyôci ciine; kacyi mikalu mu bukole bwaci; nangananga nkàmisha.” Ne *nkàmisha* mbwena kwamba ne “Amen awu. Kwajiki.” Cyeyemenu, ke cyôci aci. Cidi “Kacyi mikalu mu bukole,” mwaku ewu *cyeyemenu*. Cidi—cidi: “Cipwangane mu cyôci ciine. Ke cyônsò cidiku. Aci ncikose bwalu.”

Mêmè kudyambidila ne: “Aci’s ncintu cya butumbi. Awu’s mmwaku mulenga be.”

⁶⁰ Nenu mpindyewu, dîyì ditu mmeji mapatwila mukana. Dyambedi, cidi ne cya kwikala meeji, ne pashiishe cidi cilwa dîyì. Bwalu, kwêna wakula wamba mêyi ebe kakuyi meeji to.

⁶¹ Patudi twakula mu myakulu, katwena ne meeji nansha makese to. Nzambi ngudi wangata meeji. Meeji a Nzambi ngadi akwata mudimu ne mishiku yetu. Katwena twela meeji anyi bamanye cyûdi wamba paudi wakula mu myakulu apu to, piikalabi ne ndyakula disonsola. Paudi wandamuna, kwêna mumanye cyûdi wamba aci to. Wêwè udi ucymba peebe anu cyanaana. Kwajiki. Nwamonu anyi? N’Nzambi awu. Ne dyamba dya ciprofeta, kwêna ukwata mudimu ne meeji ebe wêwè to. N’Nzambi, bwalu wêwè udi wamba bintu byûdi kuyi mufwanyine kwela meeji pa ciibidilu ne newâmbè to. Nwamonu anyi?

⁶² Kadi mwaku ewu *cyeyemenu* udi “nkàmisha.” Nenu, ke bwa cinyi, ndi ngeela meeji ne bivwa bikengela bwa muntu ne muntu kwikalaye ne nkàmisha. Ne cyenzenzi cinene cyônsò cya bulobo cikaadiku cyenjiibwe eci, kuvwaku anu cyeyemenu kampanda paanyima paaci apu. Nansha byôbi ne civwa ncinyi, civwaku anu ne cyeyemenu kampanda paanyima paaci apu. Ne muntu wetu yônsò ewu, bwa kukumbajaye cintu kampanda, bidi bikengela añji kwikala dyambedi ne cyeyemenu aci. Ne cyôci aci ke dyalukila dya ndekeelu, kupicila ku *cikampanda*, *cikansanga*, kwalukila kupicila ku *cikankenga*, too ne mùdi ukafika ku cyeyemenu aci, anyi amen awu, anyi nkàmisha awu. Cya ku cyûdi. . . Udi ne cintu kampanda cidi cikengela wêwè kudiswikilaku, mu ngaakwilu mukwabo. Cidi ndikunji dya ndekeelu dya ciswikidi, ku cyenzenzi cyônsò cya bulobo. Cidi mwaba kampanda. Ncifwanyine kujingakana kupicila ku bintu bishiileshiilangane too ne mudici cikafika ku dikunji dya ciswikidi adi, kadi pôpò apu ke padi amen awu ku cyôci cyônsò. Kudi ne cya kwikala cintu cya mushindu awu. Kwêna mwa kutungunuka wenda uya mu nsômbelu kuyi naaci to.

⁶³ Wêwè, pawakabwela mu dibaka, byakakengela bwa wêwè kwalujaku mu meeji ebe amu, cintu kampanda, too ne pawakafika ku dikunji dya ciswikidi adi. Nenu byakakengela kwikalaci dinanga bwa mukajeebe, anyi bwa bayeebe. Ee, pâmwâpa mukaji awu kî mmulenga kwîsù mudi wa John

to; anyi mukaji, ee, kèna *cikampanda*, *cikansanga* aci—aci to. Kadi kudiku anu cintu kampanda kudiye aku, cya ne, wêwè, cidi cikulenga wêwè. Wêwè—wêwè—wêwè udi wamba ne: “Mukaji awu mmufwanyine kubenga kwikala mulenga kwîsù mudi mukwabo wawa,” anyi ne: “Mulume awu mmufwanyine kubenga kwikala mulenga kwîsù mudi mukwabo wawa.” Kadi byakakengela bwa kwikalaku cyeyemenu kampanda mwaba awu, cidi cyenza ne muntu awu ikale mmushiilangane, ne pôpò apu ke paudi mukwacile. Aci kaciyiku to, mbipiciibwe ne kuyi mubwele mu dibaka adi. Dikunji dya ciswikidi adi! Cyeyemenu aci!

⁶⁴ Tudi mwa kwela meeji ku bààbûngì bavwa ne byeyemenu, mu Bible. Kaa, mushindu mwine utudi bafwanyine kwangata, kulondesha emu ne emu mwa Bible awu, ne kwikala anu apa mbingu ibidi kubangila ku mpindyewu; kadi katuyiku mwa kulenga nansha pampala piine to, bwa twêtù bafwanyine kwela meeji ku byeyemenu mu Bible. Cileejiilu, lekelaayi ngânji nteleku cimwe anyi bibidi, bwa kubyamba anu mu cikoso.

⁶⁵ Tangilaayi Yobo. Mpindyewu, yêyè uvwa ne cyeyemenu kampanda. Maalu ônsò akenda muntu awu kabesa, muntu mwakane. Mpindyewu, katwenaku bafwanyine kudinga kwamba ne kavwa muntu mwakane to, bwalu Nzambi wakamba ne yêyè uvwa mwakane. Kakuvwaku muntu nansha umwe bu Yobo pa buloba to. Yêyè uvwa mupwangane, ku mèsù kwa Nzambi. Ne yêyè uvwa mucimanye, bwalu uvwa ne nkàmisha kampanda. Uvwa ne cyeyemenu kampanda, pavwa maalu ônsò amweka bu adi amulwisha.

⁶⁶ Disaama kubwayikadi. Balunda bende bavwa bafwanyine kwikala bambe ne: “Mpindyewu, s’ke wêwè awu, Yobo. Aci’s ke cidi cijaadika ne utu wenza mpekaatu. Udi mupiile.” Ke pashiishe beepiskopo kupwekabo e kulwa. Mbababiikile ne mbasambi baa Yobo. Kadi pamutu paa kumusamba, bôbô kabaakamonaku cîngà cintu to anu mpekaatu mu nsòmbelu wende, bwalu Nzambi wakamwenza mwakenza Ye amu.

⁶⁷ Ne bânà bende baakashipiibwa. Bintu byende—byende byakooshika mudilu. Maalu ende—ende ônsò akamwenda kabesa. Nansha nsòmbelu wende mwine ukaavwa mu njiwu, musòmba pa mushiki wa butu, kubangila anu ku lubombo lwa mutu too ne mu bidyacilu bya makàsà, ke byûjà kubwayika. Nansha mene mwena kwende munanga, mupole, mamwëndè wa bânà bende abu awu, wakamba ne: “Bivwa bikengela wêwè kwela Nzambi mulawu ne kufwa lufu mene’s.” Kadi mumpala mwa biine byônsò abi, Yobo uvwa ne cyeyemenu.

⁶⁸ Kaa, mu cikondo cya masaama, twîkalapù nansha mwa kudiswikila ku cyeyemenu aci’s we!

⁶⁹ Yobo uvwa mumanye ne ukaavwa mwenze dîyi dituma dya Yehowah. Ne yêyè uvwa ne diitabuuja mu civwaye mwenze,

bwalu ncivwa Yehowah mulombe. Bu twêtù mwa kwenzaku anu nanku's. Yehowah uvwa mulombe mulambu mwosha bwa mpekaatu wende. Kadi Yobo, kabiyi anu bwende yêyè nkaayende to, kadi bwa bânà bende, uvwa mufile mulambu mwosha, ne ke cyònsò civwa Nzambi mulombe.

“Kaa,” mùdì mufwanyine kwamba, “mêmè ndi njinga ne ciikaleku ne ke cyònsò cidiYe mulombe leelu.”

⁷⁰ S'ncishaadile ne ku ciine aci. Anu diitabuuja nkaayaadi mu Dìyì Dyende! Kadi wêwè, wêwè mwangate Dìyì Dyende bu cyeyemenu cyebe, s'udi mwa kukumbaja bwalu. Mulayi kana wònsò wa Nzambi mu Bible, wêwè's udi mwa kuswikilaku musuuka webe. Nansha mavwala mwa kukutuuta mfimbu eku ne eku, udi anu kacya waswikiibwa; cyeyemenu cyebe.

⁷¹ Nenku yêyè uvwa anu kacya wakwataku. Ne paakamba bamusambi bende ne: “Udi mwenze mpekaatu,” yêyè uvwa mumanye ne kavwa mumwenze to. Ûvwa mwakane, bwalu uvwa mwenze dîyì dituma dya Yehowah. Nenku pavwa wende yònsò . . .

⁷² Muntu kubwelaye, wamba ne: “Bânà beebe mbafwe.” Mukwabo kubwelaye, wamba ne: “Tuumeelu twebwe ntwashike. Nkulwe mudilu mutuuluke mu dyulu.”

⁷³ Tangilaayi numone cishimbi-dîyì civwa naaci bamukengeshi bende. “Wamonu anyi? Mudilu mufumine mu dyulu. Mpindyewu, Yobo, aci's ncijaadike bwalu.” Kî ncijaadike cintu nansha cimwe to. “Mpindyewu, Yêyè kavwaku mwa kwikala mushipe bânà beebe to, Yobo; wêwè's udi muntu mwakane.”

⁷⁴ “Kadi,” mwakamba Yobo, “mêmè's ndi mumanye ne ndi mwenze cidi cyakane.” Yêyè uvwa anu kacya wakwata. Ûvwa ne cintu kampanda civwaye mwa kupoopela bikole. Ke cyôci aci. Yêyè uvwa mucitâbe. Ûvwa mwenze anu menemene civwa Nzambi mumwambile bwa kwenza, nenku ùvwa mutwishiibwe kakuyi mpatà to. Eyo.

⁷⁵ Pashiishe paakafikaye pa kaaba kiine, paakakwata cyeyemenu aci, pa dîbà adi ke ndekeelu wa byònsò yêyè kubanga kuumvwa mwonji unanyika. Wòwò paawu's ukaavwa wenda ukutuluka, muzebelele, kadi wakabanga kunanyika. Ke Nyuma e kumwikila. Ke kujuukilaye kuulu, bu muvwaye muprofeta, kwambaye ne: “Ndi mumanye ne Mupikudi wanyi udi ne mwoyi.” Amen. Nwamonu anyi? Ûvwa mudiswikile bikole ku cyeyemenu cyende. Wakabwela mu dipetangana. Ûvwa mumanye ne uvwa mwenze civwa cijaalame, ke dîngà dituku kukengelabi bwa adikoke too ne ku cyôci aci. “Ndi mumanye ne Mupikudi wanyi udi ne mwoyi, ne ku matuku a ndekeelu, Yêyè neimane pa buloba ebu. Nansha paanyima paa misanda ya mu dikoba mimane kubutula mubidi ewu, nansha nanku mu musunya wanyi nêmmônè Nzambi.” Wakamanya pa dîbà adi. Pa dîbà adi ke cyeyemenu cyende kwelaci lwongo.

76 Abraham, cyeyemenu, ufumina ku Baabulona, ku kaleyi aku, upatuka ubwela mu Shinear, ubwela muvwaye musòmbèle ne tatwëndè amu, pàmwāpa mwikale cidime. Kadi dīngà dituku, lwà mundekeelu mwa meetu ne bisuku mwaba kampanda, pàmwāpa mwikale utuula mbèèlèbeelee, anyi—anyi uya bwa kushipa nyama bwa kupetaye munyiinyi; kadi mu mwaba kampanda mwamwa, Nzambi e kwakula nende, pakaavwaye ne bidimu makumi mwandamutekete ne bitaanu. Nenku uvwa . . . Yèyè ne mukajende, Sarah, mwikale pende ne bidimu makumi asambombo ne bitaanu, kayi mwânà—kayi mwânà. Kabavwa ne bânà to. Ke Nzambi kumwambila ne: “Neupete mwânà ne Sarah. Kadi, bwa wèwè kukumbaja ciine eci, bikengela utapuluke.”

77 Milayi ya Nzambi itu misangu yònsò anu ku mishìngà. Udi ne cya kwenza nanku, kakuyi mpatà to. Nansha wèwè mwikale mwitabi wa maalu mudiwu bishi bwa mulayi, cidi ku mishìngà, misangu yònsò. Mushindu mwine utudi bafwanyine kwimana kaaba aka ne kwendakana mu Mufundu awu, tutwa kumpala tutwa paanyima, mèbà ne mèbà, nwamonu's, bwa ne mushìngà ke ùdi ne mushinga. Udi mwa kwikala anu mwitabi wa maalu mudiwu mùdi muswe, kadi bidi anu ku mishìngà ku mulayi, didyanjila kulongolola, ne bikwabo. Monaayi.

78 Mpindyewu: “Abraham, yèyè wakiitabuuja Nzambi, ne baakamubadilaci bu bwakane.” Mpindyewu, ncifwanyine kwikala cintu cya—cya cikwacisha bwôwà kaayi cya kutuutakeena ne bantu baa—baa matunga mashidimuke, muntu wa bidimu makumi mwandamutekete ne bitaanu, mwikale ne mukaji wa bidimu makumi asambombo ne bitaanu, bamane kusòmba pamwe kubangila pacivwabo babaka batekete, bwalu uvwa mwanaabo wa bakaji wa tatwëndè, nenku mpindyewu ne uvwa mwa kulela nende mwânà. Kadi yèyè uvwa ne cyeyemenu. Kakuvwa cintu civwa mwa kumunyungishaku to.

79 Nenku pa dībà adi, ngondo wa kumpala, pavwaci kaciyi cyenzeke to, cyeyemenu cyende civwa anu kacya cyakwata, bwalu ùvwa mumanye ne ùvwa mwakule ne Nzambi. Ngondo mwibîdi, cidimu ciibîdi, bidimu dikumi, kadi bidimu makumi abidi ne bitaanu paanyima, pakaavwaye ne bidimu lukama, Sarah pende ne bidimu makumi citeema, cyeyemenu cyende civwa anu kacya cyakwata.

80 Ne Bible mmwambe, paakafundiibwa dibalulula dya maalu a nsòmbelu wende, Yèyè ne: “Abraham kaakatenkakanaku ku mulayi wa Nzambi, ku bupidya to, kadi ùvwa ne dikanda, ùfila butumbi kudi Nzambi.”

81 Bwa cinyi? Nukaadiku beele meeji ne mbwa cinyi anyi? Kakuyi mpatà to, yèyè uvwa mutwishiibwe. Nenku cintu cimwepele civwà cikèngelà bwa kwenzaye civwa nkutapuluka ne baa kwabo. Ne Nzambi kaakamubeneshaku to too ne pàakacyènzàye. Kwangataye tatwëndè. Tatwëndè kufwaye.

Kwangataye Lota. Kadi, paanyima paa Lota mumane kutapuluka ne Abraham, pa díbà adi ke paakalwa Nzambi kudiye, ne: “Mpindyewu endakanaaku mu buloba.” Nwamonu anyi?

⁸² Butumike, mulayi, ku mishìngà, ke bitu anu misangu yònsò byenda pamwe ne Nzambi ne Dìyì Dyende. Mpindyewu tangilaayi. . .

⁸³ Twangataayi Mòsà. Mòsà, mu—muprofeta-musadidi munyeemakanyi awu, uvwa Nzambi mujuule ne mulongeshishe tulaasa mu nzubu wa bukalenge wa Pâlò awu. Ke—ke Mòsà kupatukaye ne dilonga dyende dya teoloji adi, nenku kuvwa muntu wa kumpala wâkashipayè. Pashiishe, kaacilema kakese kaa kumpala kulwaku, ke Mòsà kukwacikaye bwòwà bwa lufu.

⁸⁴ Bwa cinyi? Kavwa ne cyeyemenu to. Ùvwa yêyè anu ne bujaadiki bwa kudi ma—mamwëndè bwa dilediibwa dyende. Ùvwa mwànà wa ukemesha. Ùvwa ne buntemu bwa kudi mamwëndè pa bwalu abu. Ùvwa ne biseba bivunga bivwa pàmwäpa Nzambi mufundishe pa mabeji mwaba kampanda, bivwabo bafunde, bivwabo benda baya naabi, bya ne Nzambi uvwa mwa kulwa kumwenekela bânà Bende. Ùvwa mumanye ne díbà adi dyakakumbana.

Mutudi bamanye mpindyewu emu, bamanye ne cintu kampanda cidi pabwípi ne kwenzeka.

⁸⁵ Mpindyewu, Mòsà uvwa mumanye ne díbà adi dikaavwa dikumbane, ne ùvwa mumanye ne yêyè ke uvwa musungula bwa bwalu abu, kadi kavwa ne cyeyemenu to. Nwamonu anyi?

⁸⁶ Ke dîngà dituku, lwà mundekeelu mwa cipeela, pakaavwaye mujimije cikeena-kumona aci, Nzambi e kumumwenekela, mu cipuka cilakuka kapyä. Ke kwambaYe ne: “Mòsà, ngãmònu ntatu ya cisamba Cyanyi. Ngũmvù mikemu ne myadi yabo, ne mudi benzejanganyi baa midimu ku bukole abu babakengesha amu. Nenku nyewu ngävùluku mulayi Wanyi. Ndi mutuuluke bwa kubasungila. Mpindyewu wêwè pwekaaku mu Ejiipitu.” Kaa, ekelekele!

⁸⁷ Mòsà kwamba, udyabakeena, wamba ne: “Ncitu ngakula bîmpè menemene to. Mushindu wa dyanyi—dyanyi dyakula kî mmwîmpè menemene to. Kabaakungiitabuujä to.”

Yêyè ne: “Cidi mu cyanza cyebe amu ncinyi?”

Yêyè ne: “Dikombo.”

⁸⁸ Yêyè ne: “Dyèlè panshi.” Kwandamukadi nyoka. Yêyè ne: “Mukwacilaaku ku mukila aku.” Kwandamukadi cyakabidi dikombo. Ùvwa munkaci mwa kumupeesha ditwishibwa, cishindiki.

⁸⁹ Patu Nzambi ufila cyeyemenu kampanda, Ùtu ufila cishindiki ku cyeyemenu aci, misangu yònsò.

⁹⁰ Pashiishe Mòsà, pakaavwaye mumane kupweka mwômò amu, ne paakeelaye dikombo dyende panshi kumpala kwa beena majimbu ne kwa Pâlò, ne paakalwa beena majimbu abu kwela abo paabo makombo panshi, Mòsà kaakanyeemaku lubilu kwamba ne: “Akaa, ee, mvwa mutupakane. Éyì, cintu’s ndiyelè dikese dya majimbu, nenku pàmwâpa mvwa mutupakane” to.

⁹¹ Kadi yêyè uvwa mumanye. Ûvwa mutwishiibwe ne ùvwa mutuutakeene ne Nzambi, ke kushaawaye mupuwe. Twâmbè ne wakenza anu menemene civwa Nzambi mumwambile bwa yêyè kwenza. Ke mwakenza pende Yobo anu menemene mvwa Nzambi mumwambile bwa yêyè kwenza. Mòsà uvwa mulonde mêyì Ende matuma. Pa dîbâ adi, shaala mupuwe kadi umone butumbi bwa Nzambi. Mòsà uvwa muswikiibwe ku cyeyemenu cyende, ku mudimu mumutuma naawu, nenku wakashaala mupuwe. Nenku paakashaalaye mupuwe, wende nyoka kuminaye nyoka mikwabo ayi. Nwamonu anyi? Ûvwa muswikiibwe ku cyeyemenu aci.

⁹² Nzambi uvwa mwambe ne: “Pawasungila bâna abu, nenuNkuukwile cyakabidi pa mukuna ewu.”

⁹³ Mpindyewu, mwena lukuna, mu mushindu wònsò udiye mwa kwenza awu, neateete anu bwa kukuseesula ku ciine cyeyemenu aci.

⁹⁴ Mbenze anu babanga kupatuka mu Ejipitu, kudimonabo bacincimikiibwe anu mu kaacijengu kaa buloba kavwa—kavwa Mbû Mukunze mwambe kunyungulukila, mikuna ku luseke ne ku luseke. Mbenze anu bapicila mu cibandabanda nunku, ke Mbû Mukunze wawa. Kakuyi mushindu wa kupandukila lwà pa tukuna, kakuyi mushindu wa kupandukila *eku*, cilwilu cya Pâlò paaci civwila *eku*. Mwaba kaayi wa kwimanyina awu’s we!

⁹⁵ Udi umona mudi dyabulu ukufikisha mu mwaba wa kuciya umanya cya dyenza anyi? Kadi wavuluka ne, wêwè muswikiibwe ku cyeyemenu aci, abu bwalu mbutuuke.

⁹⁶ Mòsà uvwa mumanye ne Nzambi uvwa mumulaye yêyè, ne: “Nenukuukwile pa mukuna ewu pawikala mubapatule. Nenku ndi Mêmè mutuuluke, bwa ku cyanza cyebe wêwè, kubasungila ne kubateeka mu buloba bukwabo abu.” Yêyè kushaala anu naaci. Ke Nzambi kutuma lupeepele lwà ku esete ne kutuutalu pa mâyì ne kuwumusha, kuwumusha panshi paa mbû, ke kusabukabo benda bendela pa buloba bûme. Cyeyemenu’s!

⁹⁷ Mushindu mwine utudi bafwanyine kuya eku ne eku mu Mifundu’s: Danye, cyeyemenu cyende; Shadraka, Meeshaka, ne Abedenego, cyeyemenu cyabo; Davidi, cyeyemenu cyende; bònsò, cyeyemenu.

⁹⁸ Pòlò uvwa naaCi, yêyè pende, citudi tubala Eci. Wakapeta dibiikila dishindameene pa Kilisto, ne ke cyakadi cyeyemenu cyende. Ke bwa cinyi kavwa ne bwôwâ bwa civwa Agripa mufwanyine kwamba to. Mwimane mwaba awu, ne Agripa

uvwa mwena Yuda, bu mutudi bamanye. Ne pa nanku padiye mwimane kumpala kwa bamfumu aba ne bikwabo apa, Nzambi ukaavwa mumwambile anu kwine kwônsò aku ne neimaneku. Pa nanku, ùvwa ne cyeyemenu, ke kulondaye anu menemene muvwa cikeena-kumona cya ku Dyulu aci. Kwambaye ne: “Ncyêna. . . Ncyakacidyombola to. Mvwa. . . Ncyakacikeeka to. Ncyakaditwala bibi to.” Kadi wakashaala mukwateku, ne kaakashikuka. Yêyê wakacikumbaja, mu kantu ne kantu kônsò, bwalu Civwa cyeyemenu.

Ne nsòmbelu yônsò udi mushindameene pa Kilisto ewu, ke cyeyemenu cyebe ncyôci aci.

⁹⁹ Mpindyewu, kubangila anu paakatuutakeenaye Nende apu, mpala ne mpala, mu njila wa ku Damaseke, aci civwa ne mushinga wàbûngi be bwa Pôlò.

¹⁰⁰ Mpindyewu, vulukaayi ne, yêyê uvwa mumanyi wa dibàla, kumpala. Ùvwa muntu wa bukole mu Mifundu. Kadi kavwaku ne dikunji dya ciswikidi to pa kuumusha Tubàdì twa beena Yuda tuvwa tumutwa nyama ku mikolo atu, ne—ne dipolome dya kudi mu—mu—mulongeshi munene adi. Ùvwa muntu munene mu cyende cipaapu aci. Kadi ùvwa mwindile. Cintu cimwepele civwaye naaci, cyende cyeyemenu civwa cifwanyine kwikala cikole anu muvwa bukole bwa bulongolodi bwende abu. Ke bwende pende bukole bwônsò buvwaye mufwanyine kwikala naabu mbwôbò abu. Nenku yêyê uvwa ukwata mudimu ne lulamatu lwônsò ku ciine aci, ne ùvwa wangata beena Kilisto, ubaswika, ubanyangakaja, ne kufikaye too ne ku dyasa Stefano mabwe.

¹⁰¹ Ngeela meeji, pashiishe mu nsòmbelu wende, ncyakayiilaye ku Yelusalema: Pàvwà, muprofeta mumwambile ne: “Kuyi kuntwaku to, Pôlò, bwalu nkanu ne buloko mbyabi bikwindile.”

¹⁰² Ke Pôlò kwamba ne: “Aci’s ndi mumanye. Kadi ncyêna nya ku Yelusalema anu bu ntemu patupu to. Kadi, nyaayaku, mudilongolole bwa kufwa bwa Yesu Kilisto.” Bwalu yêyê uvwa mumanye civwaye mwenze, ne kiipacila kende kavwa nkaa kutwa citampi ku bujaadiki bwende ne mashi ende yêyê mwine, kufwa bu muntu mufwile diitabuuja, bwalu wakashipa umwe wa ku bantu bafwile diitabuuja baa Nzambi.

¹⁰³ Kadi mpindyewu nyewu ukaavwa mu njila mutangile ku Damaseke, ne tulaasa twende twônsò tulonga atu. Musòmbè ku makàsà a mulongeshi munene awu, Gamaliele, ne mushindu mwine uvwaye mulongeshiibwe mu ntendeleelu yônsò wa beena Yuda awu. Kadi nansha nanku, ne biine byônsò abi, ùvwa anu muntu wa kalendalenda, ne kayi ne dikumbanyina dya kwenza bimwe bintu to. Ke dyakamwe, kulwaku Bukênkè kampanda, ne mukungulu, pàmwàpa, ne dikubakuba. Ke kutuucikaye, ne kudishindaye panshi.

104 Ke kutangilaye muulu. Kuvwa Bukênkè bwikale bukenka, bwine bwâkamufomijà mèsù abu. Kadi civwa cintu cya cikemesha. Muntu mukwabo nansha umwe kaakamona Bukênkè abu to, pa kuumusha Shawula. Buvwa bulayibwe, bwa bushuwa menemene kudiye, mu mushindu wa ne Bwakamufomija mèsù. Kàcivwa mwa kumona to. Mufofome anu menemene, ku Dikunji dya Kapyà dyakamuteemena buludi mumpala adi. Ke kuumvwaye Dîyì dyamba ne: “Shawula, Shawula, udi uNkengesha bwa cinyi?”

Yèyè kwamba ne: “Mukalenge, Wèwè udi Nganyi?”

105 Ke Yèyè kwamba ne: “Ndi Yesu. Ne mbikole bwa wèwè kukandameena misongolo eyi. Juukaaku mpindyewu, ubwele ku Damaseke, ne mwômò amu muntu kampanda neatumiibwe kûdi.” Pa dîbà adi mmwenze anu ujuuka mwaba awu . . .

106 Nenu nyawu kuvwa muntu, muprofeta, mu cimenga amu, uvwa mumone mu cikeena-kumona pavwaye munkaci mwa kusambila, ke kulwaye. Ananiya kulwaye, kubwelaye muvwa Shawula amu. Kumutentekelaye byanza, ne yèyè kwondopiibwa ku dyondopa dya kudi Nzambi. Wakajuuka pa dîbà adi, wakabatiijibwa, wakooweshiibwa ku mpekaatu yende, usoka Dînà dya Mukalenge. Ke pa dîbà adi kupetaye cyeyemenu. Kaakashaalaku kabidi wa mwomumwe paanyima paa cyôci aci to. Wakaya buludi, ku ekeleziya ne ku ekeleziya, ku kaaba ne ku kaaba, uteeta bwa kwibakulula byakateetaye bwa kushimbula abi.

107 Mushindu mwine udi ditunga edi, mushindu mwine udi beena Kilisto baa pa buloba, mu dinda edi, bibakengela cyeyemenu cya mushindu awu aci’s we. Aba baa bafwanyine . . .? . . . twitabaayi ne bilele, mbiteete, ku dilongesha dya kudi bantu, bwa kuteeka ku luseke Dîyì dya Nzambi ne kadyena dimwedimwe adi makeelela, leelu, too ne kashidi. Bidi bibakengela cyeyemenu, dilabula dya dituutakeena, mu njila wa ku Damaseke, ne Nzambi udi ne mwoyi Udi mwa kwondopa babeedi awu, ne kubiisha bafwe, ne kwipata badémons. Cyeyemenu cishuwashuwale!

108 Pòlò uvwa mumanye ne cintu kampanda civwa cimwenzekele. Kakuvwaku muntu nansha umwe uvwa mufwanyine kuumumushaci to. Cintu cikwabo nansha cimwe kacivwa ne mushinga to. Ûkaavwa muswikiibwe, ne ke civwaku ncyôci aci. Nansha bu cinyi mwa kulwa, yèyè wakamanya ne ùvwa muswikiibwe, nsòmbelu mushindameene pa Kilisto. Kaa!

109 Nsòmbelu uvwaye nende kumpala uvwa nsòmbelu mushiilangane. Mpindyewu, vulukaayi ne, ùvwa mutendeledi.

110 Nenu bwa bamwe baa kunudi mu dinda emu (ne ndi mumanye ne nudi bamanye ne mukaba wa mêyì ewu udi munkaci mwa kukwaciibwa, newediibwe mu ditunga ne ditunga dyònsò mwinshi mwa mau lu emu, pamwe ne matunga ònsò, mu

buloba bujima); ne bamwe baa kunudi, badi kaaba aka aba; ne bamwe baa kunudi badi mu myaba yikala mikaba ya mëyi mwa kwediibwa mu matunga makwabo (kudi mwandamunyi kampanda mwikale ubifikisha kudi bisamba bya Afrike, lwà mu ba-Hottentots mwamwa, ne—ne mu nyungulukilu mwònsò amu); ne kunudi nwènù balombodi baa ntendeleelu badi bapete anu dilonga dya kalaasa dya Bible patupu:

¹¹¹ Nudi badipete anu mu mmwenenu wa maalu malonda cyanaana, ne pàmwāpa biikale mwa kuumvwija bintu byònsò ebi, kadi pawikala kuyi mupete cyeyemenu to, kuyi mupete di—dilabula kampanda, ne piikala dilabula diine dyùdi—dyùdi ulaka mukana wamba mùdi naadi adi dyòdi dikufikisha ku divila dya Dìyì dyònsò dya *Eci* ne kadyena anu dilelela bwa Ekeleeziya wa leelu ewu muvwaDi kwònsò eku amu, kadi wèwè mwikale mweyemene dipolome dyebe dya Licencié adi anyi nî ncinyi cyònsò cyùdi mufwanyine kwikala naaci aci, pawikala mweyemene meeji a bulongolodi bwenu budi bufwanyine kwamba ne: “Matuku a bishima akaadi mamane kupita, ne katwena ne dyondopa dya kudi Nzambi to, ne dibatiiza dya Nyuma Mwîmpè mu mushindu wakadipetabo mu Dituku dya Mpenta awu kadicyena bwa bantu leelu ewu to,” piikalabi ne ke cyònsò cyùdi peebe naaci aci, wèwè mwaneetu wanyi wa balume, mwaneetu wa bakaji wa mushinga mukole, bidi bikukengela dilabula dya njila wa ku Damaseke!

¹¹² Bidi bikengela utuutakeene ne Nzambi udi ne mwoyi ewu, mùdi wèwè, kabiyi anu meeji a mu mutu webe makwatakaja anu patupu awu to, kaciyi kaaluzakalu kampanda, anyi disaluka dya mushindu kampanda to, kadi dilongesha kampanda ne dilabula dilelela, dishuwashuwale. Yesu umwèumwè wa bwena uvwa wendakana mu Ngelela awu udi ne mwoyi leelu ewu, ne udi ne mwoyi kashidi ne kashidi. Ne Yèyè udi umwèumwè awu makeelela, leelu, too ne kashidi. Cyeyemenu, bwa kabiciyi bikukengela bwa kwangata cidì nî nganyi yònsò mwambe to. Udi udimanyina wèwè mwine, kaciyi disaluka kampanda to.

¹¹³ Ne piikala disaluka dyùdi mupete adi, ne muntu kampanda, ndifwanyine kwikala disaluka dilelela dya Bible, kadi muntu mukwabo uteeta bwa kukunyengadi ku dyumvwija dyende, wamba ne bintu abi bivwaku mu dituku dikwabo kampanda. Watapa ntaala wadimuka. Ndilelela. Watapa ntaala wadimuka. Kadi kudi mushindu wa kumanya. Uciteete ne Dìyì. Ke dizola ndyòdi adi.

¹¹⁴ Piikala nzubu wenda ubanda bibengangane ne dizola, mwenji wa makumi a bya diibaka naabi neamuupule ne neamwibakulule. Kadi ùdi ne cya kubànda bilondeshile dizola.

¹¹⁵ Dilabula dyebe nansha diikale dya bishi, pa dîbà adi, piikala cintu kampanda munda mwebe amu cikwambila ne Bible awu kî mmulelela to, ne bukole bwa Nzambi abu, bapostolo, baprofeta,

ne balongeshi, ne bampaasata, ne mapà a Nyuma ne kabyena bimwebimwe abi anu muvwaYe paakapongolokelaYe bapostolo abu ku Mpenta, kudi cintu cipampalamuke mu cyeyemenu cyebe aci. Cidi ne cya kwikala ciswikiibwe ku twitabaayi wa cyena mangumba pamutu paa ku Bible wa Nzambi. Padibi ne, Yèyè mmwambe ne: “Ne mauulu ne buloba byônsò nebijimine, kadi Dîyî Dyanyi kadyakupangilaku to.” Tangila cidi cyeyemenu cyebe aci.

116 Kakuyi mpatà to udi mufwanyine kwikala mutwishiibwe ne udi mu dyumvwangana dilenga ne mpaasata. Ne kakuyi mpatà to udi mufwanyine kwikala mutwishiibwe ne udi mu dyumvwangana ne mukulu wa distriki. Ne kakuyi mpatà to udi mufwanyine kwikala mutwishiibwe ne udi mu dyumvwangana ne mwepiskopo anyi ne muntu munene kampana mukwabo mu ekeleeziya wenu amu. Kadi piikalabi ne kwêna. . . Cyeyemenu cyebe kî n’Yesu Kilisto to.

117 “Bwalu pa Lubwebwe elu Nênteekepû cyeyemenu Cyanyi, ne biibi bya iferno kabyakucitambaku bukole to.” Dibuulula dya nyuma dya ne Yèyè udi Nganyi, ne kumanya! Eyo. Kaa!

118 Mpindyewu, paudi ushaala bu Pôlò, upeta cyeyemenu cimwecimwe cyakapetaye yèyè aci, nsômbelu mushindameene pa Kilisto udi nnsômbelu mushiilangane ne wa bwena wûvwà nende kale awu. Cibî mmufwanyine kwikala nsômbelu wa cyena ntendeleelu menemene wûvwà nende awu.

119 Kaa, mêmè nkaadi muumvumvwe bantu bamba ne: “Mpindyewu, s’mbatendeleedi baa menemene.” Aci kacyna ne dyumvwangana nansha dimwe ne Cyôci aci to.

120 Ndi mufume ku dimona ntendeleelu yâbûngî, bantu badifile ne kasuki, biikale ne meeji matooke misangu yâbûngî kutamba mudi beena Kilisto baa leelu ewu balaka mukana emu. Mu mushindu wa ne, maamû udi mwa kwangata mwanende mukese wa mu diboko, mupatakane, wa bafiike, wa wipacila *mona* bule, kadi kumukupa mukana mwa ngandu, bwa dinanga dya kanzambi kende. Ntu ngaadikonka mushindu mwine udi meeji matooke adi naawu bwena Kilisto. Padibi ne, muntu udi mwa kudikengesha mu mushindu wa ne, mmufwanyine kudipayika ndobo cinunu mu mubidi wende, nunku *ewu*, mulembelejileku mabungu a mâyi tente, mamushindamijile panshi nunku *ewu*, kadi kupicila mu cikutu cya mudilu wenda wendelamu, kuumukila apa kafika too ne mundekeelu mwa tabernacle mwamwa, utwa walukila, ne mwine mudilu awu mukunjija kunzuu, mupwidija ne mubanza nunku *ewu*, bwa didifila dya kudi kanzambi kende, lupingu lwikale mwaba awu ne mèsû a tunkenya maasamu, ne bikwabo. Mêmè ntu ngaadikonka mwaba udi bwena Kilisto. Uh-huh. Uh-huh. Pa nanku kanwikadi nutuma meeji ku “meeji matooke” to. Meeji

matooke nkaayaawu kaena Cyôci aci to. Meeji matooke mmîmpè piikalawu mateeka pa cintu cijaalame.

¹²¹ Byenze anu mùdi ngangabuka mwikale ufila bwanga. Mmufwanyine kukupa bwanga bwa mulùngù mukole, ne meeji matooke ônsò, ne mmufwanyine kukupa acide wa soufre, ne meeji matooke ônsò. Udi mwa kupeta kabeji keebe kaa bwanga kuuja bibi, peebe mufwanyine kubunwa ne meeji matooke ônsò, kadi aci kaciyena cisungila mwoyi webe to. Nwamonu anyi? To, mukalenge. Bikengela wikale mumanye ciine cyùdi wenza aci. Ne cintu cyônsò cidi cibengangane ne Dìyì dya Nzambi, nansha cyôci ciikale cinganyi, anyi ne cikaadiku kubangila ntanta mule bishi, cidi anu neya mafi.

¹²² Peetelo wakabapa kabeji kaa bwanga kaa Cyendelele Dituku dya Mpenta. Wakamba ne: “Nyingalalaaayi, muntu ne muntu wa kunudi, nubatiijibwe mu Dîna dya Yesu Kilisto bwa dilekelediibwa dya mpekaatu yenu, nenku nenupete kupa kwa Nyuma Mwîmpè. Bwalu kabeji kaa bwanga aka nkeenu nwênù, ne bânà beenu balela, ne bônsò badi kule, mu bûngì bwônsò bwabiikila Mukalenge Nzambi wetu abu.” Neya bushuwa. Nkabeji kaa bwanga kaa Cyendelele.

¹²³ Mpindyewu, musumbishi wa manga a lwondopu wa mafi mmufwanyine kutwapu cyanza kadi kukushipa. Eyowa. Cya bushuwa’s. Nudi bamanye’s, mudi mulùngù bûngì kampanda mu kabeji kaa bwanga amu, wa kulûnga naawu kishì, ne nga—ngangabuka mmumanye anu bîmpè ne mbûngì kaayi bwa mulùngù budi mwa kukushipa, budi mubidi webe mwa kutwala. Yêyè mupicishe bûngì bwa mulùngù, mmufwanyine kukushipa wêwè. Wêwè peebe kuyi muwupete bûngì bukumbane to, mmufwanyine kwenza cinyi pa dîbà adi? Kî mbifwanyine kwikala ne dikwacisha nansha dikese kûdi bwa kunwa bwanga abu to. Yêyè ngudi mumanye cidi mubidi webe mwa kutwala.

¹²⁴ Mpindyewu, mushindu awu ke udi kabeji kaa bwanga kaa Nzambi. Nansha muntu kampanda mukwabo mwambe ne bidi ne cya kwenzeka mushindu *kampanda*, anyi mushindu *kansanga*, kùcîtàbùùjîku to. Paudi ulonda Dìyì anu ku dileeta ku dileeta menemene, ke cyôci aci. Shaala anu kacya wakwataKu. Mpindyewu, tudi ne...aba badi bamba ne: “Badi ne cya kukumyamina mâyi pa mutu.” Badi ne baa nanku awu. Pa nanku: “Nudi ne cya kukwata mudimu ne myânzù ya Taatù, Mwânà, ne Nyuma Mwîmpè.” Bintu bya mushindu awu kabituku mu Bible to. Kakwena mwaba nansha umwe ukaadiku muntu mubatiijibwe, mu Bible, mushindu mukwabo pa kuumusha mu Dîna dya Yesu Kilisto to. Aci ndìyì diswika dyakasakidilabo mu ekeleeziya wa Katolike wa cyena Loomo, didibo basambulujilangane mu bilele. Netulenge bwalu abu diloolo edi.

125 Kadi monaayi, munkaci mwa biine byônsò abi, kabeji kaa bwanga kadi kashaala anuku. Ke bwa cinyi tudi ne bânà basaama bûngì cyanaana, mbwalu kabeena bateeleja cidi Ngangabuka mwambe to. Cyeyemenu, paukaadi mudiswike ku Cyôci aci, kwajiki. Ke Dîyi dya Nzambi ndyôdi adi. Kadyenaku mwa kupangila to.

126 Nsòmbelu mushindameene pa Kilisto! Wa cyena ntendeleelu menemene, kadi kavwa mushindameene pa Kilisto to. Bààbûngì baa kutudi badi ne cyôci aci leelu ewu.

127 Nenu paudi upeta nsòmbelu mushindameene pa Kilisto ewu, udi ukwenzeja bintu byûdi kuyi mufwanyine kwenza pa ciibidilu to. Ûdi ukwenzeja maalu mashiilangane ne audi mufwanyine kwenza pa ciibidilu. Ncyênà muswe kwamba ne nkwenza maalu makutakane to. Ndi muswe kwamba dyenza dya maalu mu Nyuma, cintu kampanda ciikale cilelela, cintu kampanda ciikale cishuwashuwale. Ne paudi umona muntu wenza maalu makutakane, udi umanya anu ne yêyè awu udi udingidija pende naka cintu kampanda. Ûdi uteeta anu kutentula mwaba udi cintu cishuwashuwale aci.

128 Paudi umona ndola wa mafi, wavuluka ne kudi ndola mwîmpè padibo batentwile yêyè awu. Nwamonu anyi? Paudi umona wa mafi awu, kakuyi mpatà to yêyè awu mmundidimbi wa cintu kampanda cidi cilelela. Nku cintu kampanda cidi—cidi cishuwashuwale, kudibo batentwile yêyè awu.

129 Monaayi, cidi cikwenzeja bintu byûdi pa ciibidilu kuyi mufwanyine kwenzaku to. Kaa, s'ncintu kampanda. Udi mutwishiibwe. Udi mutwishiibwe anu menemene bwa cyôci aci, paudi upeta cyeyemenu eci. Udi mutwishiibwe bwa cyôci aci. Kwêna wangata cidi dilabula dya muntu kampanda mukwabo to.

130 Ke bwa cinyi bwena Kilisto bukaadi bulwe bu mudi bânà bakese mu Bible, anyi, to, numfwile luse, bânà bakese mu kalaasa. Badi bateeta kutentulangana. Kadi padi yêyè awu mutupakane, cintu cyônsò mu kaabujima's ncyà mafi. Nwamonu anyi? Ûdi ubweja musumba mujima awu mu ntuapakanyi. Kaa, ekelekele! Kutentulu to. Twilangana Nende Yêyè, wêwè nkaayeebe.

131 Mulunda wanyi mulenga kampanda, udi mwimanyine lwà paanyima apa ewu, mmukulumpe. . . mmwânà wa balume wa nyaanaanyi kampanda, mulunda wa kashidi, Jim Poole mwânà. Mona's, tatwëndè ne mêmè tuvwa bakolele pamwe mu kalaasa. Nenu, kaa, muntu kaayi mulenga's we! Jim mwânà ne mêmè tudi tusambila ku musangu ne ku musangu bwa Jim mukole kulwaye mwena Kilisto, mwena kwitabuuja mulelela. Nenu Jim mwânà ne mêmè tuvwa tuyiikilangana makeelela awu bwa mutuvwa tupeta Nzambi mu diitu ne tuMumona mu bufuki.

Mwômò amu ke munudi nuMupeta. Bwalu, Yèyè m’Mufuki, ne Ûtu usanganyibwa mu bufuki Bwende.

¹³² Nenku ndi mvuluka ne, Jim ne mêmè tuvwa ne ciibidilu cya kuya—kuya, baswe bwa kwikala kuya katwa buluwà. Nenku pavwa bufuku bwila, ee, tuvwa ne ciibidilu cya kupweka, kwangata makalu etu, kupweka pa makalu mu mùsèèsù ewu kaaba aka, biikale ne bwôwà bwa mufwanyine kufwa bwa kupicila mu nkita paanyima paa kwîsù kumane kufiika, kadi tupweka tuya kakeba nyonga wa butamu butalale bwa mabeele.

¹³³ Nenku Jim yèyè uvwa muswe kwikala kunaya billard. Mpindyewu, tucivwa anu bânà batekete’s, baa bidimu dikumi, dikumi ne bibidi, dikumi ne binaayi. Ne musangu awu Jim uvwa munange kwikala kusômba mwikale ubala mikanda ya maalu malonda a pa ditwa dya buluwà ne dyela dya mateyi.

¹³⁴ Kadi mêmè mvwa mwa kwikala musômbe nnana meeji. Nwamonu anyi? Bu...Nenku mpindyewu bamwe baa ku bansongaalume badi mwa kummona. Nenku mvwa mwa kumona kaamutândà kakese menemene mwaba kampanda. Mvwa ne ciibidilu cya kwamba ne: “Balumyana, kàka’s nkafwanyine kwikala kaamutândà kîmpè kwikala naaku mu mikuna’s.” Nenku mvwa misangu yônsò anu ndyelela meeji ne dîngà dituku ngaadyakwikalaku ne kaamutândà ku mikuna, ne cisumbu cinene cya mbwa ya ditwa naayi buluwà, ne—ne bingoma. Nenku mvwa anu misangu yônsò ndyambidila ne: “Ngîkalapù mwa kupeta cingoma cyanyi mêmè cya 30.30, mu cyanyi cikondo eci.” Ndyambidila ne: “Mêmè wabo ewu ndiku mufwanyine kupeta kaacingoma kakese kaa 30.30 kaanyi mêmè bishi’s?”

¹³⁵ Kadi dituku dikwabo, mwimane, mutangile ku cimanu cyanyi, ne nkùmòna bimwe bya ku bingoma bilenga bidi mwa kupeteka, mêmè kudyambidila ne: “Ngàsà udi ukèmesha.”

¹³⁶ Mêmè kudyambidila ne: “Nëndîbidijèku ku dituuta dya bingoma, ne kutuuta ne ndudî. Ne pàmwâpa musangu mukwabo pashiishe kupeta, kwenza lwendu kuya mu mikuna, cilembi kampanda mwîmpè neangangate nkamufilemu. Anu bwa kwikalaku mu mushindu kampanda...Bwalu, yèyè awu mmufwanyine kuswa bwa kukuba mwoyi wende, pàmwâpa, kumpala kwa ours wa ubundulangana. Kavwa mutwishiibwe menemene to. Muntu mubanji kampanda, mmufwanyine kungangata bwa nkamufilemu, anu bwa kuyaku nende cyanaana, mwenze anu bu mumulami nanku awu. Pàmwâpa dîngà dituku ndi mufwanyineku kuya katwa buluwà mu Afrike, mwenze bu mulamyanganyi. Ngîkalapù nanshà mwa kudiibidija’s we! Cintu cimwepele cîndî mwa kwenzaku ncyà kudiibidija bwa kwikala mwena ndudi mwîmpè, wa dilambu.”

137 Kaa, mvwa ngeela meeji ne: “Nzambi, elabi meeji, Wêwè ewu kundekela mêmè ntwà buluwà, pa buloba bujima.” Cintu cilenga kaayipu’s we!

Jim uvwa yêyè ne ciibidilu cya kwikala musòmbè ubala mukanda awu. Mêmè kwamba ne: “Jim . . .”

Yêyè kwamba ne: “Ndi—ndi muswe kubala pa cyôci aci.”

138 Mêmè ne: “Jim, aci’s ncikaadi muntu kampanda mukwabo mwenze. Mêmè ndi muswe kudyenzelaci, mêmè mwine. Ndi mêmè muswe dilabula.” Pângààkalwà kudi Kilisto, ncivwaku mwa kwangata dilabula dya muntu mukwabo kampanda to. Mvwa muswe dyôdi adi, mêmè mwine.

139 Ndi mvuluka pângààkabalà *Mulami Wa Diitu Wa Cyenda-Nkàâyà* wa Zane Grey. Mêmè kunyangila maman nkombo ibidi anyi isatu, mubàndepù ngenda nyunguluka nzubu, ngenda ntupika bu udi pa kabalu, pâmvwà mubànde pa lukombo alu bu kabalu kaa mucì. Mvwa—mvwa mubale bwalu bulonda bwa—bwa *Mulami Wa Diitu Wa Cyenda-Nkàâyà* abu, mwakafilaye bwakane mu Big Bend.

140 Pashiishe mêmè kubala bwalu bufwikakaja bwa *Tarzan, Nsòkòmntù* bwa Edgar Rice Burroughs. Maamu uvwa ne tapis wa kale mwikale ne myôsà, tapis wa ciseba kampanda cya nzevu wa mu mâyì, anyi cintu kampanda, civwa Mandamu Wathen mumupe paanyima paa midilu. Civwa cyadija mu nzubu wende wa bulaalu, kadi mêmè—mêmè kupatuka ne tapis awu pambelu. Maman ukaavwa anu mumane kumanya ne kî ndupeepele luvwa lumwambule luye nende pambelu to. Ke mêmè kumupatula, kumukosolola tupese tupese, ke mêmè kuditelela civwalu cya Tarzan, kadi kubànda kuulu kwa mucì. Mêmè—mêmè kwikala nkaadi mpicishila cyabibidi cimwe cya dîbà dyanyi anu kuulu kwa mucì aku, pambelu apu muvwale civwalu cya Tarzan aci. Bwalu mvwa mumone civwaye mwenze, mêmè kujinga kucyenza paanyi.

141 Kadi dîngà dituku, ku ngàsà wa Nzambi, mêmè kutwa cyanza pa Mukanda mulelela awu, Bible. Wanyi musambu ne bwanyi bwalu bulonda kwikalabu bukaadi anu ne: “Kwikala bu Yesu, pa buloba ndi njinga kwikala anu bu Yêyè.” Ncitu muswe kwikala mwepiskopo anyi—anyi muntu kampanda wa munene mu ekeleeziya, paapà kampanda anyi nsaserdose kampanda to. Mêmè ntu muswe kwikala bu Yesu. Cyeyemenu, cikuvwija mushiilangane. Kudi cintu kampanda mu cyôci aci, kubala kwa Diyì Dyende, ne cintu kampanda mu mwoyi webe, udi ujinga anu kwikala bu Yêyè. Udi mutwishibwe.

142 Cidi bu mùdì, cyeyemenu bwa Kilisto, cyeyemenu bwa mwena Kilisto, cidi mùdì . . . Cyôci, cidi bu mùdì lwongo ku mazuwa a mâyì. Eyowa’s. Wêwè, bidi bikengela bwa wêwè kwikala ne cyeyemenu. Nenku piikalabi ne Kilisto ke cyeyemenu cyebe, ncyenze bu mùdì lwongo. Bwa ne, paudi . . . Mbù mwikale

muvwanduluke, ne mazuwa miikale pabwîpì ne kutùkina mu mâyi, nenku, wêwè, ditekemena dimwepele dyûdi naadi, ndya ne, kwela lwongo mu mâyi. Nenku pashiishe pakaadi mazuwa abanga kutankakana, umone ne lwongo nelukwate mazuwa anyi. Nudi bamanye's, tutu ne musambu, nyewu ngâpù mwoyi dînà dya muwusaki awu mpindyewu, kadi: *Lwongò Lwànyì Ndukwàte*.

143 Anu mùvwà mwânà wa balume mutekete awu, mutukaadi badyâmbilâmbile misangu yâbûngì, mwikale ubuusha kandeke. Kuyiku mufwanyine kumona cintu to, kadi yêyè uvwa ne kanshinga. Ke muntu kupicilaye mwaba awu e kwamba ne: "Cyûdi wenza eci ncinyi, mwanaanyi wa balume?"

Yêyè ne: "Ndi mbuusha kandeke kaanyi."

Yêyè ne: "Cyûdi naaci mu cianza aci ncinyi?"

Yêyè ne: "Nkanshinga."

144 Yêyè ne: "Kandeke kiine kèpì?" Yêyè ne: "Mémè ncyèna mukamone to. Ee, wêwè mwine udi umanya bishi ne udi ubuusha kandeke?"

145 Yêyè ne: "Ndi mwa kukùmvwa. Kadi kakoka." Nwamonu anyi? Kundekeelu kwa kanshinga aku, kuvwa cyeyemenu. Mu mushindu wende wa bwânà awu, kandeke aku ke kavwa cyende cyeyemenu, mu mushindu wa ne yêyè uvwa mwa kwamba ne ùvwa ubuusha kandeke. Nansha muvwaye kayi mwa kukamona amu, kadi ùvwa mukwate, cintu kampanda, civwa cikakwate.

146 Mushindu awu ke udi muntu, padiye mulediibwe cyakabidi ku Nyuma Mwîmpè, mmukwate cintu kampanda cidi ne lwongo dyamwamwa, nenku bipeepele bya bikole abi kabiyiku mwa kumunyungisha to. Mmumanye ne udi anu bîmpè. Mmwele lwongo. Eyo.

147 Mpindyewu, twètù biikale mu kaabwâtù keetu kakese, biikale baleleme twenda tukosolola mu mbû wa kayi tuseku wa mwoyi wa panu, bu mwàkacyâmbà mwedi wa kasala munene:

Mwoyi wa panu kî nciloota cya munda mutupu
nansha!

Ne musuuka udi mulaale mmufwe,
Ne bintu kabyena mùdibi bimweka amu to.

Mwoyi ngwa cya bushuwa! Ne mwoyi ncyeyà!
Ne lukita lwawu kî nne ke kiipacila kaawu to;
Bwalu cya ne wêwè udi lupwishi, ne udi
walukila ku lupwishi aci,

Kacyakambiibwa bwa musuuka to.

148 Kaa, ntu ndyambidila ne abi's mbilenga be! Mpindyewu, Longfellow ngwâkafûnda cyôcì aci, *Musambu Wà Mwoyi*. Nwamonu anyi?

Patudi twendela mu mazuwa pa mbû wa kayi
tuseku wa mwoyi wa panu apa,
Bwa mwaneetu udi kacyi ne ditekemena ne
mupete njiwu,
Paamonaye, wapetululaku bukole.

149 Nwamonu anyi? Mpindyewu tudi babànde mu mazuwa a mâyi, biikale twendela pa mbû wa kayi tuseku wa mwoyi wa panu, ne Kilisto, bwa mazuwa adi asanganyiibwa mu bipeepele bikole bya bikondo. Pakaadi bipeepele bikole bineema bujitu, ne biikale bitankakajangana, ndi ne disanka dya kwikala ne lwongo ludi lukwate mu cilàmà cikudika dyamwamwa, mu mwaba kampanda. Nansha lufu lwine kalwenaku mwa kukutuulaku to. Udi muswikiibwe ku cyeyemenu cyebe. Kilisto ke lwetu lwongo. Yêyè udi cinyi? Ûdi Dîyì. “Ku cibangidilu kwakadi Dîyì, ne Dîyì dyakadi ne Nzambi, ne Dîyì dyakadi Nzambi. Ne Dîyì dyakavwijiibwa mubidi, ne dyàkasòmbela munkaci mwetu.”

150 Nenu, patudi tumanya ne byenzedi byetu bidi menemene bipetangana ne Dîyì, tumanya ne dilongesha dyetu didi dipetangana anu menemene ne Dîyì, katuyi tusakidila kantu anyi katuyi tuumushila kantu to, anu Dîyì pa dyôdì. Ne biikale tumona bipeta bimwebimwe abi, bivwa bakwabo bààkeelà lwongo mu Dîyì dimwedimwe adi, biikale ne mwoyi mu wetu nsòmbelu, pa dîbà adi lwongo lwebe ndukwate. Mwoyi wa Kilisto mwikale muleejiibwe byamba kwenza anu bu dîyì dyandamuke anu mubidi wètù ewu, munda mwebe, muvwawu munda mwa Kilisto amu, bwalu: “Ûvwa n’Nzambi munda mwa Kilisto, upungisha baa pa buloba ne Yêyè mwine.” Nenu wêwè mwikale umona Nzambi munda mwebe wêwè mwine, mukwate mucu umweumwe wa dijaalamija naawu awu pa Dîyì, anu menemene mwakenza Yesu. Wêwè mwikale umona mwoyi Wende Yêyè. “Byenzedi bìndi Mêmè ngenza nenûbyènzè peenu, ewu udi witabuuja.” Kî ng’ewu udi witabuuja bya budìngìbudìngì to, kî ng’ewu udi udyambidila ne udi witabuuja to, kadi: “Ewu udi witabuuja.” “Ewu udi ungitabuuja Mêmè, byenzedi bìndi Mêmè ngenza neàbyènzè pende.” Bwa cinyi? Mmwele lwongo lukwate ku Lubwebwe lumwelumwe alu. Lubwebwe alu luvwa ncinyi? Dîyì, misangò yònsò. Wêwè udi mwele lwongo mwòmò amu. Ke webe Mutooto wa ku nord paudi mujimine pa mbû.

151 Nudi bamanye, tutu ne mitooto yàbûngì, kadi kudi mutooto wa bushuwa anu umwepele, utu kawuyi utentemuka to. Wôwò awu ke mutooto wa ku nord, bwalu mmwimanyine mu nkacinkaci wa buloba. Nansha wêwè usanganyiibwa paanyima, kuulu, anyi nî mpenyi pònsò paudi usanganyiibwa, mutooto wa ku nord awu udi anu umweumwe awu. Ke mutooto webe wa ku nord ngwôwò awu. Mpindyewu, nudi numona’s, kudi mitooto yàbûngì yidi yenza kutentemuka yumuka pa mwaba yiya pa mwaba mukwabo. Kadi wêwè usanganyiibwa mu. . . pa mbû, mona’s, mwendeshi yònsò wa mazuwa a mâyi mmumanye,

anyi cilembi yònsò utu wendakana mu meetu ewu, mmumanye ne mutooto webe wa ku nord awu ke webe—ke webe mwaba. Kwajiki. Pa dîbà adi, mmwenze bu ne ke keebe—keebe—keebe kaleeji-nord. Kaleeji-nord keebe kakaakufunkunaku ku Mars, anyi ku Jupiter, anyi nî mpenyi to. Nekafunkune ku mutooto wa ku nord awu. Bwa cinyi? Ké cyeyemenu cyebe ncyôci aci.

¹⁵² Kaa, ekelekele! Monaayi, cyeyemenu cyebe's! Kaa, ndi muswe kwamba cintu kampanda! Ndi ncyumvwa anu cilwa. Monaayi. Kadi ngădyŭmvù kwôkò butendeleedi bumbwele pa dîbà edi, bwalu eci ke ditwishiibwa. Monaayi.

¹⁵³ Kaleeji-nord keebe kadi mwa kufunkuna anu ku mutooto wa ku nord. Ke mwaba umwepele udi kôkò aku mwa kufunkuna. Piikalaku kaleeji-nord kalelela, nekaleeje mutooto wa ku nord musangu wònsò. Ncyá bushuwa anyi?

¹⁵⁴ Pa dîbà adi, pawikala ne Nyuma Mwîmpè, Yèyè udi mwa kufunkuna anu ku Dîyi. Kaadyakufunkunaku ku dingumba to. Kaadyakufunkunaku ku twitabaayi to. Kaadyakufunkunaku ku mwaba wa cyanaana to. Neafunkune buludi ku Dîyi. Ndi ndyumvwa anu mwa kwela mbila's. Monaayi, cidi—cidi n'Cintu kampanda munda mwa muntu, cituuta, paudi umona Mutooto webe mwimane kwaka naka, Yesu Kilisto, Dîyi. Nenku udi umona ne Nyuma udi munda mwebe awu kaakucilekela ciya nî nku dyabalume nî nku dyabakaji to. Anu Yèyè awu ke umwepele udi mwa kwena nanku. Yèyè mmulwe bwa kwangata bintu bya Nzambi, ne bwa kubileeja, kubimwenesha.

¹⁵⁵ Ne Yesu wakamba ne: “Yèyè neenzè anu menemene bintu bîndi Mémè ngamba. Neanubuulwile maalu acivwavwa,” udyanjila kunuleejawu kumpala kwa dîbà, kumpala kwa kulwawu apa. Nwamonu anyi? “Yèyè neangate maalu adi Aanyi Mémè ne neanuleejewu, ne pashiishe Yèyè neanuleeje maalu acivwavwa.” Yone 15.

¹⁵⁶ Tudi tumona ne Yèyè udi uleeja maalu. Ne Ûdi wangata maalu adi a Nzambi ne unuleejawu. Ne Yèyè neanubuulwile maalu akamba Yesu. Mu ngaakwilu mukwabo, Yèyè nealeeje bwalu patooke. Teeka bwalu abu lwà mu ditumba kampanda, diloolo edi, bwalu ke citwikala mwa kukwata naaci mudimu, mu katanci kakese emu. Kwikala mutwishiibwe, kuvwija cyôci aci cilelela, nwamonu's, dîbà adi udi umanya. Pawikala . . . Mutooto webe wa ku nord, udi mwikale Dîyi awu, bwa mwena Kilisto kana yònsò ewu.

¹⁵⁷ Cintu cyònsò cidi cibengangane ne Dîyi aci! Tangilaayi. Lekaayi nnupe bwalu. Teelejaayi eci ne ntema yònsò. Eci ke dibuuludiibwa mu kaabujima, dya Bunzambi dya Nzambi, diswa Dyende, ne Dilwa dya Kilisto. Ne byònsò bidi bisanganyibwa anu mu Mukanda ewu, bikumbanangane. Kadi cintu cyôci ciikale cikukoka cikumusha ku Cyôci aci, imansha kaleeji-nord aku anu kule, bwalu cidi anu ntwitabaayi. Cidi anu

bulongolod-...Cidi anu ndibeji dya cyanaana dyûdi wenda naadi mu mpaaya, dyûdi mukudike mu cibambalu cyebe, dyela mu kadre. Ntwitabaayi. Pa dîbà adi, keba kaleeji-nord kadi kakufikisha ku Dîyi. Amen.

158 Nudi numona ne, dilabula edi paakalengadi Pôlò, yêye wakapweka mu Ejipitu ne mu Arabie, mu mwaba kampanda, ne wakalonga munda mwa bidimu bisatu. Butumbi's we! Yoyôyò! Bivwa bikengela ikale mutwishibwe. Kadi paakamonaye, paakumulombola Nyuma Mwîmpè, ku mwaku ne ku mwaku, wakapeta mushindu wa kufundaye Mukanda wa Ebelu awu ne kuleeja beena Yuda abu. Cya bushuwa's. Bwa cinyi? Ûvwa mushindamija. Kaleeji-nord kaa Nyuma Mwîmpè aku kaakamuteeka buludi pa Mutooto wa ku nord.

159 Mpindyewu, wêwè mwikale ne cintu kampanda cikukoka cikumusha ku Wôwò awu, mbîmpè ucilekele. Mwânà, Kôkò aku nekafunkune ku Dîyi Dyende, ne anu ku Dîyi Dyende, bwalu Nyuma Mwîmpè mmulwe bwa kumwenesha, anyi bwa kushindika, milayi ya Nzambi. Kakwenaku twitabaayi wenza aci to. Bulongolodi nansha bumwe kabwakucyenzaku to. Kakwena nî mmakole anyi nî ncinyi cidi mwa kucyenza to. Anu Nyuma Mwîmpè, ku Dîyi. Ne Yêye ke Mutoloku.

160 Mpindyewu, angata lutete lwa blé, lutete lwa blé lulenga alu, kadi kalwena mwa kwenza cintu nansha cimwe to. Ndufwe padi mutoloku kawuyi anu mwanji kubwelamu to. Padiwu ubwelamu mpadilu lupatula ntete ya blé yâbûngî.

161 Ne Kilisto ke Mwoyi mwine awu, cyeyemenu. Blé yêye kayi ne cyeyemenu aci munda mwende to, kaadyakutolokaku to. Blé awu yêye kayi ne cyeyemenu aci to, udi mwa kwikala mulenga wa dikema lwà pambelu apu, kadi kêna mwa kwikala ne mwoyi to, bwalu kamwena cintu munda mwende amu cidiye mwa kwikala ne mwoyi ku cyôci to. Kadi padiye upeta cyeyemenu aci, ùdi mwa kutangilangana ne badyudi bônso mpala ne mpala, kwamba ne: "Nênjuukè cyakabidi." Bwa cinyi? Bwalu mmupete cyeyemenu. Cidi munda mwende amu. Ùdi ne cya kajuuka cyakabidi. Nenuki piikalaye... "Nwênù bashaale munda Mwanyi, ne Mèyi Aanyi mashaale munda mwenu, pa dîbà adi nulombe cinwaswa aci." Ke cyôci cyeyemenu aci.

162 Kadi paudi ne twitabaayi ne bikwabo byônso biswikilaMu apu, kwêna mwa kusambakaja maanyi ne mâyi to. Udi anu wangata ne ubicibula mushindu wônso wûdi muswe, kabyadyakusambakanaku nansha, bwalu mmyengungu ibidi mishiilangane. Ne kwêna mwa kwenza ne twitabaayi ne Bible, udi mubêngàngâne ne Bible awu, bisambakane to. Kwêna mwa kwenza ne dingumba ne ntendeleelu mulela mu budishikaminyi, anyi lupandu lulela mu budishikaminyi, bwa kusambakanabi to. Bwalu, mu bulelela, Nzambi utu ukwata mudimu anu...

¹⁶³ Nêngãmbè bwalu abu, nansha bishi. Nzambi katu unyangakajaku ndongamu Wende nansha. Kêna mwa kumunyangakajaku to, bwalu Yêyè kêna ne mikalu to. Nenku mêmè ndi mumanye bîmpè ne, nudi bamanye's, mêmè, ne Cyôci aci ciyaaya kumpala kwa bantu bààbûngì. Nwamonu anyi? Kadi Nzambi katu mwa kunyangakajaku ndongamu Wende to. Kêna mwa kwenza cintu kampanda mu dituku *kampanda*, kadi kucishintulula, ku kwenza cintu kansanga, kwamba ne civwa cibi dituku *adi* to.

¹⁶⁴ Nzambi katu ukwata mudimu ne tusumbu twa bantu to. Nzambi utu ukwata mudimu ne muntu nkaaya, bwalu bantu batu ne mmwenenu kabukabu. Yêyè mmwibaka bishiilangane, mu ngiikadilu. Bikengela Nzambi angate muntu awu, kadi kumubwejakajangana, kadi kumukoka eku ne eku, kumupatula mu yêyè mwine, too ne paamufikishaYe mu Wende ngiikadilu. Nwamonu anyi? Ke pashiishe Nzambi kukwataye mudimu ne muntu awu. Tangilaayi munda mwa bikondo byônsò, Noa ne Môsà, baprofeta, kacyapu kakuvwaku babidi musangu umwe to. Umwepele, ku musangu ne ku musangu, kuntwadijilu too ne kundekeelu kwa cikondo.

Ke bwa cinyi, wêwè wamba ne: “Mu ciibûngì cya mibelu ke mudi dikubiibwa.”

¹⁶⁵ Tangilaayi, nenku anu mûmvwà muyiishe mwab'ewu abidi adi panshi aa, mu tabernacle. Kuvwa Aakaba, ne kuvwa Yehoshafata. Nenku bavwa baya ku Laamota-Gilada, bwa kwipatangana. Bilondeshile muvwa maalu, bavwa babinge, buloba abu buvwa mbwabo cya bushuwa. Kadi beena—beena lukuna, beena Suuliya bàvwàmù abu, bavwa buuja mafu a baabo bânà ne blé uvwa ukengela ne beena Izaleela biikale bôbò badya awu. Buloba bubapa kudi Nzambi, ba nanku, bilondeshile muvwa maalu, bivwa bimweka anu bîmpè. “Tuye ukamfile, tubande kuntwaku, nenku tûbîpâtè pambelu paa buloba abu.” Ee, aci's cidi cimweka cilenga be. Bilondeshile muvwa maalu, civwa ncyôci, kadi's kudi mmishîngà.

¹⁶⁶ Yehoshafata, mwikale muntu mwîmpè, kwambaye ne: “Kadi kabivwa bikengelaku twêtù kukonka Mukalenge anyi?”

¹⁶⁷ Mu bushuwa bwa bwalu, Aakaba, muntu uvwa mutwe cîmpîngà awu, kwambaye ne: “Ee, cya bushuwa's.” Mwena kwitabuujja wa ku mikalu awu, nudi bamanye's. Yêyè ne: “Kaa, s'ncyà bushuwa's, s'bivwa bikengela mêmè kwikala mweleku meeji ku ciine aci. Ndi ne baprofeta nkama inaayi baa beena Ebelu. Bôbò abu nkama inaayi, bândi ndiisha, mbâkùba. Bôbò ke badi batambe bulenga mu ditunga emu. Netubatwale.”

¹⁶⁸ Nenku bônsò abu cyapamwe, ne dîyì dimwe, kwambabo ne: “Ndaaku. Mukalenge udi neebe.” Bilondeshile muvwa maalu, bavwa babinge, kadi kabavwa bakwate ku cyeyemenu aci to.

Pashiishe paakambaye ne: “Kakwenaku mukwabo anyi?”

169 Yêyè ne: “Eyo. Kudi mukwabo, kadi ntu mumukine.” Yêyè ne: “Yende misangu yônsò ùtu anu ungamba maalu mabi, wamonu’s, byende bidiye wamba misangu yônsò.”

170 Mmunyi muvwaye mufwanyine kwamba ciprofeta cîmpè, pavwa Dîyi dyônsò mu kaabujima, Eliya uvwa mumudyanjidile awu, mwambile Aakaba ne: “Mbwa neyilake mashi ebe”? Mpindyewu, mmunyi muvwa muprofeta mushindika awu mufwanyine kwamba cintu kampanda civwa kaciya diswa dya Nzambi? Kabidi muvwabi, ne: “Mbwa yivwa mwa kudya Izabela, ne bufukà buvwa mwa kwikala mu madimi, mu mushindu wa kabayi bafwanyine kwambaku ne: ‘Mwaba ewu ke udi Izabela’ to.” Ne mulawu wa mushindu awu pambidi paa muntu, mmunyi muvwa muntu mukwabo kana yônsò ewu mufwanyineku kubenesha?

171 Mushindu awu ke udibi leelu ewu. Mmunyi mudi muntu mwa kubenesha bintu bidi dîbà dyônsò bisàka bantu kule ne Nzambi ebi? Kudi cintu anu cimwepele cya dyenza, piikalabi bikengela bwa wêwè kwikala mwimane paa nkaayeebe: kwela cintakanyi aci mulawu, mu Dînà dya Mukalenge, kadi kushaala ne Dyôdi adi, piikalabi ne udi mutwishiibwe.

Wêwè udi wamba ne: “Ee, Mwaneetu Branham, s’udi ufikisha bantu ku dikukina’s.”

172 Nzambi Yêyè neannange. Ke cyanyi cyeyemenu ncyôci aci. Ncyêna mwa kwikalaku mweyemene pa diboko dya musunya nansha. Bikengela bwa wêwè kwikala mweyemene pa Dîyi, cidi Nzambi mwambe bwa wêwè kwenza aci.

173 Mmunyi mwakamanya Miika ne yêyè nguvwa mu bulelela? Wakindila. Kupetaye cikeena-kumona. Baakapeta cikeena-kumona, bôbò paabo, kadi cikeena-kumona aci kacivwa cyôci cikumbanangana ne Dîyi to. Ne leelu ewu, cintu cimwecimwe aci. Miika wakafwanyikija cyende cikeena-kumona ne Dîyi, ke kumonaye pa dîbà adi ne yêyè ne Dîyi bivwa byumvwangane. Leelu ewu, piikala cikeena-kumona cyebe cibengangana ne Dîyi, ucilekele, bwalu ncyeyemenu cya mashimi. Cyeyemenu cya Miika civwa cikumbanangane anu menemene ne Dîyi, pa nanku ùvwa mwa kwimana kwamba, yêyè, cyakambaye aci, ne—ne kuciitabuujja.

174 Pa dîbà adi, kumonangulabo dipi ku mishiku, bamba ne: “Nyuma wa Nzambi mmuyiile njila kaayi?”

175 Yêyè ne: “Neujandula pawikala ukaadi musòmbèle mu cibambalu cya munda.” Cya bushuwa.

176 Yêyè ne: “Pângiikalà mwalukile mu ditalala...Elaayi muntu ewu mu nzubu wa buloko wa munda, nenku pângiikalà mwalukile mu ditalala,” mwakamba Aakaba, “mêmè ke watangila bwalu bwa mulumyana ewu.”

¹⁷⁷ Kaa, mpindyewu, Miika, bwa aci udi wamba bishi? Mutu webe's nebawukose paapinganaye. Miika kushaalaye kacya wimana mwaba awu muumishe mu dîsù anu bu mwakenza Stefano. Amen. Mwikale ne budiswîle anu bu mwakaya Mukalenge wanyi ku nkuruse. Bipeepele peepelee anu mwakabwela Danyeke mu bwina bwa ntambwe, anyi mwakaya Shadraka, Meshaka, Abedenego ku cikutu cya kapya. Kakuyi mpatà to! Kushaalaye kacya wimana mwaba awu kadi kwambaye ne: "Bwa wêwê anu mwalukile..." Bwa cinyi? Ûvwa mutwishiiabwe. "Bwa wêwê anu mwalukile, apu kaayi Nzambi kî mmwakuleku naanyi to. Bwa apu kaayi unkose mutu." Yêyê uvwa ne cyeyemenu. Ûvwa mumanye ne kaleejinord kende, kâvwâ kamulombole ku cikeena-kumona aci aku, kavwa kapetangana anu menemene ne Mutoto wa ku nord. Eyowa's, mukalenge. Lwongo lwende luvwa lukwate, eyowa, Dîyi ne anu Dyôdi nkaayaadi.

Piikala cyeyemenu cyebe, piikalabi ne utukù ne cyeyemenu mu nsömbelu webe. . .

¹⁷⁸ Kuvwaku cikondo, nudi bamanye's, civwa bimanyinu bya bukalanga biikale ne cyeyemenu. Ncyêna mwa kuvuluka dîna dya mwine mukaji awu to, kadi ditunga dijima edi divwa dyeyemena civwa mukaji awu wamba. Nyewu ngâpù dîna dyende mwoyi. Mvwa mwikale mfunda tuubintu pa dibeji mwab'ewu. Ncyêna mufwanyine kuvuluka dîna dya mwine mukaji awu ne, uvwa nganyi to. Kadi muneemu emu, kukaadi ndambu wa bidimu, bivwa bikengela kwikalabo, mukaji mwine ewu, civwaye wamba yêyê. Yêyê mwambe bwa kwikala kukwata keele ne cyanza cya dyabakaji, ke civwa—ke civwaku, ke civwa cyeyemenu. Yêyê ke uvwa dya—dyandamuna ku byônso bwa cyôci aci. Bivwa wêwê mukwate nsomo ne cyanza cya dyabakaji, dîbâ adi kakuyi mpatà to uvwa mutupakane. Dîna dyende divwa nganyi apa's? [Disangisha didi dyamba ne: "Emily Post."—Muf.] Kaa, s'ke dyôdi. Cya bushuwa. Eyo. Ke yêyê awu. Mpindyewu, wêwê uvwa—wêwê uvwa mutwishiiabwe. . . Yêyê ke uvwa—yêyê ke uvwa cyeyemenu bwa cimanyinu cya bukalanga. "Bidi ne cya kwikala mushindu awu." Bu mudi, kaa, bintu byâbûngî bitudi tusangana mushindu awu. Kadi, tudi tujandula ne, mpindyewu cikaadi ciye. Nukaadi nudya mushindu unudi baswe. Eyowa's, mukalenge. Eyo. Kadi cyôci aci ke civwa cyeyemenu bwa cimanyinu cya bukalanga. "Bivwa bikengela kucyenza mushindu awu."

¹⁷⁹ Kuvwa cikondo civwa Adolf Hitler mwikale cyeyemenu bwa Allemagne, cyônso civwaye yêyê wamba aci. Pavwaye wamba ne: "Tupikaayi," bavwa batupika. Wamba ne: "Shipaayi," bavwa bashipa. Milyô ya beena Yuda, yêyê uvwa ushikula anu mutu cyanaana. Nudi numona cyakenzekela cyeyemenu cya mushindu awu aci anyi? Civwa cimweka anu bu ne mbukole, kadi civwa cibengangane ne Dîyi.

“Wêwè wâmanyi bishi ne civwa cibengangane ne Dîyi?”

¹⁸⁰ Nzambi ngudi mwambe. Paakateeta Baalama kutangila Izaleela ne dipeetu, bwa kumwela mulawu, wakamba ne: “Ndi mmumona mwenze bu kabalu kaa lusengu lumwe. Mushindu mwine udi nnta yebe myakane’s we! Ewu yônsò wâkwela mulawu awu neèdiibwè mulawu. Ewu yônsò wâkubênesha awu neabeneshiibwe.”

¹⁸¹ Bimweeka anu bu ne Hitler uvwaku mufwanyine kwikala mumone cyôci aci. Bimweeka anu bu ne beena Kilisto baa beena Allemagne abu bavwaku bafwanyine kwikala bamone cyôci aci’s, nwamonu’s, cyeyemenu aci. Kakuyi mpatà to cibengangane ne Dîyi adi. Nudi bamanye’s, anu bu mudibi byambiibwe ne: “Muntu . . . Nzambi mmwenze muntu, kadi muntu mmwenze yêyè bapika.” Muntu ukeba bwa kukookeshaye mukwende. Twêtù tudi ne Mukookeshi umwepele, ke Nzambi.

¹⁸² Kadi Hitler uvwa cyeyemenu bwa Allemagne. Cîtangilaayi leelu ewu. Mpindyewu, nudi numona cidi cyenzeke anyi? Civwa ncyeyemenu cya mashimi. Bwa cinyi? Civwa cibengangane ne Dîyi. Kadi patudi twakulangana apa nudi bamone kukaadibi bikafike’s: bundu.

¹⁸³ Nunku piikala cyeyemenu cyebe ciikale mu bulongolodi kampanda, anyi mu disaluka kampanda, anyi cîngà cintu pa kuumusha Mupersona wa Yesu Kilisto, neukafike ku citupa cimwecimwe cya bundu aci, kadi citambe bubi, wamonu’s, piikala cyeyemenu cyebe kacyi Kilisto to. Anu aci ke dikunji dimwepele dya ncacinkaci wa nsômbelu wa muntu, ne Kilisto udi n’Dîyi; kî ng’ekeleeziya wenu, kî ndiyi dyenu nwênù to. Dîyi adi! Nwamonu anyi? “Pa cyeyemenu eci Nêngiibakilèpu Ekeleeziya Wanyi,” pa Kilisto, Dîyi.

¹⁸⁴ Kuvwa cikondo civwa Mussolini mwikale cyeyemenu bwa Loomo. Ncyêna mumanye to, ndi mufwanyine kwikala mubale kaabwalu kampanda, anyi mbifwanyine kwenzeka ne ngiikale mukabale mu mukanda kampanda, anyi muntu mundondele, kadi mpavwa muntu kampanda bayiikilangana nende kudi Mussolini. Ûvwa . . .

¹⁸⁵ Ûvwa muswe—muswe kubweja Loomo mu benji baa manayi a dipiiyangana, manayi a dipiiyangana. Nunku kudi lupingu lunene luvwa pa ciibidilu lwikale lwimanyika mwaba awu, lwende yêyè, lutangila maalu a manayi a dipiiyangana. Aci cidi anu cîmpè. Beena Ngelika bavwa ne mmwenenu awu kukaadi bidimu. Loomo utu misangu yônsò anu uteeta kwikala naaci. Benji baa manayi a dipiiyangana bidi anu bîmpè, kadi—kadi manayi a dipiiyangana’s. Kadi—kadi vulukaayi ne, aci kacyakwangataku kaaba kaa Kilisto to. Nansha nwênù biikale ne dikanda dya bishi, kacyenaku ne dipentanga ne cyôci aci to. Yêyè ngudi bukole bwônswâbwônso. Kadi nudi numona mwaba uvwaye ukeba kwibakila Loomo. Nunku ùvwa ukeba kwibakila

Loomo pa cintu cya cyeyemenu kampanda, cya ne yèyè nguvwa cyeyemenu aci.

¹⁸⁶ Nenku bavwa balonda ne, dîngà dituku, mwendeshi wa mashinyi ende—ende—ende wakalwa kasunsa kamwe kumpala kwa dîbà, ke kumwasaye cingoma. Kwambaye ne: “Mémè ncivwa mwambe ne, ‘wikale apa kasunsa kamwe kumpala kwa dîbà citeema to.’ Mvwa mwambe ne: ‘Wikale apa pa dîbà citeema jaajaaja.’” Pang! Ke kumwasaye cingoma’s. Nwamonu anyi? Nwamonu anyi? “Ncyêna muswe wikale apa kasunsa kamwe kumpala to. Ndi muswe wikale apa pa dîbà citeema jaajaaja.” Nwamonu anyi? Tangilaayi numone ne ùvwa ukeba kudyenza yèyè mwine cyeyemenu kaayi. Kadi nudi numona cyakenzeka anyi?

¹⁸⁷ Nudi bavuluke, bààbûngì beenu mwab’ewu, baa bikondo bya kale, Roy Slaughter, pâmwâpa, ne baa kale kupita apu, mbavuluke kwaka pângààkanwàmîlâ bwa ciprofeta. Dituku dikwabo, kwînshi kwaka ku nzubu wa Odd Fellows, kumpala kwa katuyiku banji kulwa kaaba aka to, mémè kwamba ne: “Mussolini neakafike ku ndekeelu wa ukwacisha ne bundu.” Mémè kwamba ne: “Dibucikilangana dyende dya kumpala, neaye mu Éthiopie, ne Éthiopie neapone ku makàsà ende. Kadi yèyè neakafike ku ndekeelu wende, ne muntu nansha umwe kaakumukwacisha to. Neajikiibwe mu bundu.” S’ke yèyè awu.

¹⁸⁸ Mémè kwamba ne: “Nkujuuke tusumbu tusatu. Nazisme, fascisme, ne communisme.” Mémè kwamba ne: “Tusumbu atu netutungunuke kadi netukabwele mu kamwepele, ne kôkò aku nekiikale communisme. Nwatapaayi ntaala nwadimuka. Communisme ke wâlwa kwosha Loomo.” Nwamonu anyi?

¹⁸⁹ Nwacitabaleelaayi. Uh-huh. Ncyamu cya mudimu mu cyanza cya Nzambi. Bôbô badi beela meeji ne badi balwishangana ne Nzambi. Bôbô’s badi munkaci mwa kukwata mudimu benda babwelamu, dîbà dyônsò, kabayi bamanye to. Yèyè ngudi ukwata anu naabo mudimu bu mudi muntu wa benzeja maalu, uh-huh, cyamu kampanda cya mudimu mu cyanza Cyende, anu mwakenzaYe ne Nebukandeneesa ne bakwabo bààbûngì amu. Mpindiyewu monaayi. Monaayi, mpindiyewu.

¹⁹⁰ Kuvwa cikondo civwa Pâlò mwikale cyeyemenu bwa Ejipitu, kadi tangilaayi numone kukaadici patudi twakulangana apa. Nwamonu anyi? Cyônsò’s ncipangile bwalu.

¹⁹¹ Kaa, s’ncya mushindu wa mafi, pa nanku misangu yônsò bidi anu bipangila bwalu. Mbyeyemenu bikwatakaja kudi bantu. Kwêna mwa kwangata cyeyemenu cikwatakaja kudi muntu nansha. Nansha ciikale mfu—mfumu wa ditunga, nansha ciikale mfumu wa cimbambila, nansha ciikale mfumu kampanda, nansha ciikale ekeleeziya kampanda, nansha ciikale bulongolodi kampanda, nansha ciikale twitabaayi kampanda. Byônsò bya ku

bintu abi nebibutuke, anu bu mwakabutuka byeyemenu byônsò bya mushindu awu munda mwa bikondo.

¹⁹² Tudi mwa kutangilaayi paanyima. Tangilaayi paanyima. Tangilaayi numone bantu baakeeyemena bamfumu baa mamfumu maalabale. Tangilaayi numone bantu baakeeyemena bamfumu baa cimbambila. Tangilaayi numone bantu baakiibakila ditekemena dyabo pa byeyemenu bya mushindu awu, kadi tangilaayi numone kukaadibo leelu wa Ndaaya ewu.

¹⁹³ Mpindyewu twǎnjàayi kukudimuka tutangile bantu baakateeka ditekemena dyabo pa Bible, pa Diyì dya Nzambi, ne baakakwata ku Dyôdi bu cyeyemenu. Tangilaayi numone kukaadibo patudi twakulangana apa.

¹⁹⁴ Pòlò udi unupa cikoso cya bôbò biine abu, mu Ebelu, nshapita wa 11, cyakenzabo. “Mwakacimunabo makalenge, mwakavwijabo bwakane, ne bikwabo. Ne baakalalakana bavwale biseba bya mikooko ne biseba bya mbuji. Bôbò bàdi buloba kabuyi bwakanyine.” [Katupa kaa mukaba wa mèyi munda mutupu—Muf.] Mbindile mu Butumbi dibiishiibwa dinene dya ku lufu adi. Nwamonu anyi? Eyo. Bwalu bôbò, bamwe baa kudibo, kabaa—kabaakapeta bishima ebi to, kadi baakafila mibidi yabo, nansha nanku, bindile dibiishiibwa dya ku lufu adi. Bwa kujikija mwoyi wabo wa panu, kabaakawucyuka to. Baakajinga kutungunuka ne kudilambula bôbò biine, bwa baamona mwa kupeta dibiishiibwa dya ku lufu adi, ne ke cyakenzabo.

Mpindyewu, byeyemenu, ke bitudi twamba ebi, cyeyemenu.

¹⁹⁵ Nudi bamanye’s, tubàdi twetu tutumbuke’s ncyeyemenu. Ke cyeyemenu. Ke—ke ndekeelu wa ndekeelu wa makokyanganyi ônsò mu ditunga edi. Ncya bushuwa. Dyatu dipangadika ditu cyeyemenu, mu tubàdi twetu tutumbuke. Cya bushuwa. Kaa, ndi mumanye ne misangu mikwabo twètù katutu baswe dyôdi adi to, kadi’s ditu—ditu ncyeyemenu, nansha nanku. Eyowa’s, mukalenge. Anji ambaayi tũng bu ne katuvwa ne ciine aci? Ncinyi pa dîbà adi? Kadi’s ncyeyemenu. Ncya bushuwa’s. Bwa cinyi? Bidi ne, ditunga dyetu, ndiswikiibwe ku cyôci aci. Ndekeelu wa byônsò padi tubàdi tutumbuke atu tufika ku dyangata dipangadika dyatu dya ndekeelu adi, kwajiki. Kakwena mwaba mukwabo wa kuya wa mupite apu to. Kuwaya nkwèpi, paanyima paa twôtù atu? Neulonde anu dipangadika dyatu adi, kwajiki. Udi anu ne cya kudilonda. Twôtò atu ke dîyi dya ndekeelu. Twôtò atu ke amen.

¹⁹⁶ Nudi mwa kulumbulwisha cilumbu aci mu tubàdi twa pa kaaba twa mu cimenga. Nudi mwa kucilumbulwishila kudi nzuji wa tubàdi tukese, pashiishe kuya ku twa bukalenge bwa cinsangansanga, ku tubàdi twa mishindu mishiileshilangane, ne ku tubàdi twa bukalenge bwa cinsangansàngà. Kadi patudi anu tukafika ku tubàdi tutumbuke, s’kwajiki. Cya bushuwa.

Misangu mikwabo twètù katutu baswe to, twamba ne: “Ee, mèmè ncýèna muswe dipangadika dyabo adi to,” kadi uddinge anu udibenge musangu nansha umwe’s. Aci’s ke cyeyemenu cya ditunga. Kadi ambaayi tǔng bu ne katuvwa naatu? Eyowa.

¹⁹⁷ Bikengela twikale ne cyeyemenu kampanda. Bikengela bwa muntu ne muntu ikale naaci. Wèwè utu naaci. Kadi cìndì mèmè nteeta kunwambila, ndi ndongolola paa kubijaadikila mwaba awu, bwa kunuleeja ne byeyemenu ncinyi.

¹⁹⁸ Mpindyewu, tubàdì tutumbuke twa ditunga ke cyeyemenu cya ditunga dijima. Ke cintu cya ndekeelu mu dikokangana dya mushindu kana wònsò. Twòtò ntudi tukosa bwalu abu. Cidi twòtò atu twamba, ke cyòcì.

¹⁹⁹ Kutu cyeyemenu mu manayi a ndundu. Ke mwedi wa kashiba. Kaa, eyowa’s. Misangu mikwabo katùtu baswe dipangadika dyende to, twètù peetu, kadi’s didi—didi—didi ndyòdì, nansha bibànde nansha bipweke. Mwedi wa kashiba, dyende dipangadika ke dīyì dya ndekeelu, ncyà bushuwa, nansha bakwabo bamba cinyi. Yèyè mwambe ne ndituuta dya ndundu, cidi ndituuta dya ndundu. Ncyà bushuwa. Bulelela. Bakwabo nansha bambe cinyi, kacýena ne dipetangana ne cyòcì aci to. Neku twǎnjàâyìbì kwela meeji ku bwalu abu. Wèwè. . . Mèmè nciitu nya mu manayi a ndundu to, kadi mbyenzeke anu ne mfunde bwalu abu. Mwedi wa kashiba, yèyè ke cyeyemenu mu manayi a ndundu.

²⁰⁰ Umwe wabo wamba ne: “Ndundu mmubwele.” Mukwabo ne: “Wèwè udi mwena mashimi.” Ewu ne: “Cidi mushindu *kampanda*. Bivwa bikengela wèwè kwikala mushindu *ewu*.”

²⁰¹ Mwedi wa kashiba mwambe ne: “Tuuta!” Neumone bakwabo abu bapingana mu nkwasà yabo basòmba panshi. Cidi cifikisha bamwe baa ku kudibo ku didyabakeena. Kadi ndi ndicinkila ne mbafwanyine kumwela cibingu mwaba awu, munda mwa myoyi yabo, ne bikwabo, kadi cidi anu “kutuuta” nansha bibànde nansha bipweke. Bwa cinyi? Yèyè ke udi dīyì dya ndekeelu.

²⁰² Udi ku cimanu wa kumpala awu yèyè mwambe ne: “S’udi mumanye ne mmupite ku luseke’s.” Mukwabo wamba ne: “S’udi mumanye ne cidi. . .”

²⁰³ Yèyè ne: “Cidi ndituuta dya ndundu.” Uh-huh. Ke cyònsò cìdìku. Ûdi ubwikila mukana pa dībà adi, wàlukila pa mwaba webe.

²⁰⁴ Ambaayaaku tǔng bu ne kakuvwaku mwedi wa kashiba mu dinaya dya ndundu? Ekelekele! Nudiku mwa kudifwanyikijila ne ncifwanyine kwikala dinaya dya mushindu kaayi adi? Umwe wabo wamba ne: “Civwa ndituuta dya ndundu.” Mukwabo wamba *cikampanda*. Mukwabo wamba *cikansanga*. Mukwabo wamba ne: “Wèwè udi mwena mashimi.” S’mbifwanyine kwikala bya makokyanganyi ne mvita’s.

205 Bwa kwenza dinaya dya ndundu, bikengela nwikale ne cyeyemenu. Nenku yêyè awu udi upatuka kwaka, nansha kanuyi bamuswe to, anyi nî ncinyi, yêyè—yêyè ke cyeyemenu, nansha bibànde nansha bipweke. Yêyè ke cyeyemenu. Dyende dîyi ke nkàmisha, cyûdî wêwè wamba pa bwalu abu nansha ciikale cinyi. Bidi mushindu awu. Mpindyewu, bu ne kabavwa nende to, nunku dinaya dyônsò's ndyandamuke cimvundu cinene. Neya bushuwa anyi?

206 Ditunga divwa difwanyine kwikala bishi bu ne kakuvwaku tubàdî twa bukalenge bwa cinsàngansàngà? Bu ne kakuvwaku tubàdî tutumbuke mu ditunga emu, divwa mwa kwenda bishi? Bavwa bafwanyine kuya penyi? Nunku ditunga's ndibwele mu cimvundu cinene. Bu ne kakuvwaku. . .

207 Bu ne kakuvwa mwedi wa kashiba mu dinaya dya ndundu, s'mbifwanyine kujika, nunku kanuvwa mwa kukùpakù ndundu musangu umwe muntu kayi mufwanyine kujuula makokyanganyi to. Muntu kampanda wimana pààpa, ne pàmwàpa bulelela ndundu muye ne mu kazubu, kadi muntu mukwabo mufwanyine kwamba ne: "Kaa, to. To, to. Kî mmubwele to." Pa dîbà adi, kadi's ke nwênù abu. Ndundu wa kumpala wediibwa, bôbò bafwanyine kujuudilapu bilumbu. Umwe wabo wamba ne: "Civwa ndituuta dya ndundu." Mukwabo ne: "Kacivwa dituuta dya ndundu nansha." Nwamonu anyi?

208 Bikengela nwênù kwikala ne muntu kampanda udi dinaya adi diswikila kudiye, ne yêyè awu ke mwedi wa kashiba. Padiye wamba ne: "Kutuuta," nkutuuta. Padiye wamba ne: "Ndundu," nndundu. Cyônsò cidiye yêyè wamba aci, biyaaya anu nanku. Ke mudibi. Kadi nwênù kanuyi nende to, kanuvwaku bafwanyine kwenza dinaya nansha dikese to.

209 Lekelaayi nnuleeje cyeyemenu cikwabo, mmudilu mukunze. Mudilu mukunze, padiwu wamba ne "imana," ùdî ùswa kwamba kwimana. Wêwè muwupite, neufute bwa bwalu abu. Kadi bu ne cimenga eci kacivwaku citeekeshe midilu mikunze pambelu pààpa to, midilu ya diimanyikangana, ncifwanyine kwikala cimenga cya mushindu kaayi? Nwamonu anyi? Bidi bikengela ciikale ne cyeyemenu kampanda. Cìdî mpulushi mwambe nansha ciikale cinyi, anyi cìdî nî nganyi mukwabo mwambe, udi mwimane mwaba awu. Awu yêyè udi ulondela pashiishe. Bu muntu kampanda mwa kujaadika ne wêwè udi mupite dîbà dya mudilu wa mâyi a matamba, cìdî mpulushi mwambe nansha ciikale cinyi, mmupiile. Padi mudilu awu mwambe ne "ndaaku," mbwena kwamba ne nkuya. Ke cyeyemenu ncyôci aci. Udi mwa kujaadika cyôci aci ne, mudilu ngudi mwambe ne "ndaaku." Mpulushi mmufwanyine kwikala mwimanyine mwaba kampanda, mulombodi wa cimenga mmufwanyine kwikalapu, mwaba kampanda, aci kaciyena ne cìdici cishintululaku to nansha kakese. Pawikala ne cijaadiki

cya ne civwa “ndaaku,” wêwè ndaaku. Kadi bu muntu mwa kulwa kudikuma kùdì, aci cilema cidi anu ncyende yèyè. Wêwè udi mwa kucijaadika. Neya bushuwa.

Nenku tudi mwa kujaadika bitudi twamba. Cya bushuwa.

²¹⁰ Mpindyewu, kadi ambaayi tũng bu ne kakuwaku mudilu mukunze? Muntu uvwa mwa kulwa too ne mu masangu, ne cidi. . . tangilaayi cìdì cifwanyine kwikalaku aci. Muntu wamba ne: “Ê! Umuka mu njila. Mémè ndi lukasa. Bikengela nye ku mudimu. Dìbà dikaadi dimpìte mpindyewu. Mémè ngudi upita mpindyewu.” Mukwabo pende ne: “Wêwè’s ngudi wela meeji nanku. Bwalu, mémè ngudi upita, bwalu mémè ngudi mufike kumpala mwaba ewu.” Nenku ndi mwa kumona mukaji upatuka ubanga kudilongolola nsuki. Kadi ambaayi tũng bu ne katuvwaku ne mudilu mukunze? Nunku kî nkufwanyine kwikala dipatakaja dya njila kudi mashinyi anyi!

²¹¹ Ke lutatu ndwòlò alu ludi naalu maekeleeziya. Nwamonu anyi? Neya bushuwa. Ke bwa cinyi tudi ne dipatakaja dya njila dya cyena mangumba dya dikema. Eyowa’s. S’ncya bushuwa menemene. Muntu nansha umwe kacyi ne kuyaayaye to. Bakaadi anu kacya biimana, bakokangana.

²¹² Ewu ke Mudilu wa Nzambi. PadiWu wamba ne “ndaaku,” ndaaku. PadiWu wamba ne “imana, apa mpakumbane,” pa dìbà adi imana. Neya bushuwa. Pôpò apu ke patudi bashindameene, pa Cyôcì aci, Dìyì adi, kî neidì musumba kampanda wa bantu mwambe, anyi cidi musumba mukwabo kampanda wa bantu mwambe to. Yesu mmwambe ne: “Bimanyinu ebi nebifile badi biitabuuja.” Tuyaayi. “Ndaayi pa buloba bujima, nuyiishe Evanjeeliyo kudi cifukiibwa cyònsò.”

²¹³ Nudi bamanye’s, dilonga dya tulaasa nansha diikale dîmpè bishi, kadi kî ng’aci cyakalomba Yesu to. Neya bushuwa. Maekleeziya nansha miikale mîmpè bishi, bitanda, kî ng’aci cyakalombaYe to. Mpitaadi nansha miikale mîmpè bishi; twêtù, maekleeziya, tukaadi twasa mpitaadi. Aci’s cidi anu cîmpè. Tudi twanyisha ciine aci. Kadi kî ng’aci cyakalombaYe to.

²¹⁴ Yèyè wakambila Ekeleeziya ne: “Nuyiishe Evanjeeliyo.” Ne Evanjeeliyo kaakalwa anu mu Dìyì nkaayaadi to, kadi ku bukole ne dimwenesha dya Dìyì. Pòlò ngwákamba nanku. Pashiishe kuya, kumwenesha Evanjeeliyo, kaa, ekelekele, bìikalapù nanku’s we.

²¹⁵ Kaa, twêtù, leelu ewu, tudi ne mwoyi mu cikondo citukaadi ne bangangabuka balenga baa kacya. Tukaadi ne manga malenga a kacya twòndopanganakù naawu. Aci’s nudi bamanye. Ne twêtù biine tudi twela balume abu kaalumbandi. Tudi tubasambidila. Ke cîndi ngenza, ne ndi ntekemena ne ke cinudi peenu nwenza. Balume abu, bàdì ne luumvu ludibo naalu lwa lulengu. . . Badi ne byumvwilu bibidi kudibo bakwacila mudimu, ke lumono ne lulengu, ne badi. . . ne luumvu. Badi

bakwacila mudimu ku mutooyi kampanda wa mu mwoyi, anyi—anyi dibaabata dya cyùjà, anyi cintu kampanda, anyi lumono lwa cintu kampanda cidibo mwa kumona, ditampakanangana dya disaamà, anyi—anyi cintu kampanda kwîsù, cidì cibwikile kwîsù kwônso anyi pambidi pajima, mwaba kampanda. Bôbò—bôbò badi bakwacila mudimu pa byôbi bintu abi. Nwamonu anyi? Mbwalu aci cidì. . . Nenku badi bateeta kwangata manga, ne bûngì kampanda bwikalà mwa kucishipa abu, kadi piine apu kaayi mwa kukushipa wêwê to, ne—ne bikwabo. Bôbò kabaaku-. . . Ke wabo mudimu ngwôwò awu, wa kukwacilapu mudimu. Nenku tudi twanyisha ciine aci. Aci ncîmpè bikole. Kadi, tudi bapete bangangabuka baa batambe bwîmpè, manga a matambe bwîmpè, mpitaadi ya mitambe bwîmpè, kadi masaama bûngì bupite butuvwaku naabu kacya kwônso eku.

²¹⁶ Tudi ne bupidya bûngì bupite butuvwaku naabu kacya kwônso eku. Eyowa's, mukalenge. Menemene. Bambi mbalwe kudyzenza malongolodi, ne balwe kupeta mangumba manene, ne biikale babwejamu cintu cyônso naka, ne bikwabo, ciine aci cintu cyônso naka, bacivwija cidimba cya ekeleeziya. Nenku baye ku seminere kampanda, mwenze bu nzoolo mutooyishila mu cyamu, mwikale ubatooyishila mu cyamu cya kupela naaci cidì cibapatula mushindu awu, ne mîngà misangu kabayi bamanye kantu nansha kamwe pa bidi bitangila Nzambi to anu mudi Hottentot kayi mumanye kantu pa bidi bitangila mwanu wa beena Ejipitu wa mafuku cinunu ne bumwe awu. Babapicishilamu mushindu awu, kadi ke bwalu mbwabu's. Nwamonu anyi?

²¹⁷ Kaa, cidì citùkèngelà mu ekeleeziya yetu mmuntu mwikale ne cyeyemenu. Cidì citùkèngelà mu ekeleeziya wa ba-Méthodistes, ekeleeziya wa ba-Baptistes, ekeleeziya wa beena Mpenta, ekeleeziya wa ba-Presbytériens, ncyeyemenu, mulume wa Nzambi wîkala mwa kushaala mwimane muswikiibwe ku Dîyì ne kudi Kilisto, ne wâfikisha disangisha adi mwinshi mwa ngiikadilu awu wa mwaba udi cidimba cyônso cyendela mu ngiikadilu wa Dîyì edi, bamona Dîyì adi dimweneshiibwe, dibalonda. “Bimanyinu ebi nebifile badi biitabuuja, too ne pa buloba bujima.”

Bavwa bôbò bamba ne: “Aci's cyakamana kuumushiibwa.”

²¹⁸ Yesu wakamba ne: “Ndaayi pa buloba bujima, nuyiishe Evanjeeliyo kudi cifukiibwa cyônso.” Katuyi nansha banji kufika pa buloba bujima to, kabidi bacikàle kule ne cifukiibwa cyônso. Too ne penyi? “Pa buloba bujima.” Kudi nganyi? “Cifukiibwa cyônso.” Cyènzekà ncinyi? “Bimanyinu ebi nebifile badi biitabuuja. Mu Dînà Dyanyi nebiipate badémons. Nebaakule myakulu mipyamipya. Bôbò bakwate nyoka ne byanza, anyi banwe cintu cidì cishipangana, kî ncifwanyine kubenzela bwalu to. Bôbò batenteketele babeedi byanza, babeedi nabasangale.” Ke cyeyemenu ncyaci cikwàte mwaba awu, Dîyì,

Mutooto wa ku nord awu, kaleeji-nord aku kadi kiikale kacya kaashaala anu naaDi. Ke cidi cîtükèngelà ncyôci aci.

219 Kadi twêtù tudi bapatuke bakenze bilongeshelu, bavwije bantu malongolodi, babwejemu bidimba, ne bakokangane ne ba-Baptistes anu bwalu kî mbiitabuuje mushindu utudi twêtù biitabuuje, ne ba-Méthodistes anu bwalu kî mbiitabuuje, mushindu ewu. Nenku—nenku twâtooyîshi seminere mutambe bunene, twibaki ekeleeziya mitambe bunene, ne bibasa bya disòmba bitambe bwîmpè ne binefuke, ne cisanji cya orgue citambe bunene, ne bikwabo, ne musumba wa bantu biikale ne mvwadilu mutambe kwikala wa kapelu, ne bapete mulombodi wa cimenga ne bônso biikale balwa mu ekeleeziya. Kadi citwavu kupeta ncinyi? Mushiki wa lufu, luswikila ku cyeyemenu cya cyena mangumba. Lufu! Kaa, kabiikadiku nanku to!

220 Bu mêmè mwa kufwila mu mudimu wanyi, cyeyemenu cyanyi n'Yesu Kilisto, pa cyôci aci mpândi mwitabuuje, piikala bônso mwa kupatuka kuya. Muntu kampanda wakamba, Docteur Davis ungambila mêmè ne: “Billy, wèwè uyiisha cintu bu cyôci eci, s'newikale ukaadi uciyiisha makunji a mu ekeleeziya.”

221 Mêmè kwamba ne: “Nêngiikalè nyiisha makunji Dîyi dya Nzambi, dîbà adi, bwalu Nzambi udi ne bukole bwa ku makunji aa kujuudila Abraham bânà.” Cya bushuwa. Dîyi dya Nzambi ndilelela.

Yèyè ne: “Udi wela meeji ne nebakwitabuuje anyi?”

222 Mêmè ne: “Kacyena . . . Abu kî mbwalu bwanyi mêmè to. Bwanyi bwalu mbwa kushaala ne lulamatu ku Dîyi adi.” Ncyà bushuwa.

223 Yèyè ne: “Wèwè udi wela meeji ne udi mufwanyine kutwilangana ne bantu balonge tulaasa mushindu ewu, ne teoloji wa—wa dyondopa dya kudi Nzambi anyi?”

224 Mêmè ne: “Kî ndyondopa dya kudi Nzambi dyanyi mêmè to. Mmulayi Wende Yèyè. Yèyè ke Wâkafila mudimu muntuma naawu awu.” Kaa!

225 Nenku ndi mvuluka paakapwekaYe kuntu kwaka mu Bukênkè bunene abu, mêmè mwimane kwinshi kwa musulu kwaka, mu cidimu cya 1933, mu ngondo mwisambombo, paakambaYe ne: “Bu—bu mwakatumiibwa Yone Mubatiji bwa kudyanjidilaye dilwa dya kumpala dya Kilisto, Ndi nkutuma ne Mukenji kudi baa pa buloba, bwa kudyanjidila Dilwa diibidi dya Kilisto.” Ne Wôwò ukaadi muye pa buloba bujima, padi tupya twa ditabulujateemeshiibwe kukaadi bidimu dikumi ne bitaanu pa mukuna bu wônso. Dyondopa dya kudi Nzambi mu matunga ônsò, ne bukole, ne dyalujulula.

226 Ne patudi twakulangana apa ndi ngiitabuuja ne Wôwò ukaadi pabwîpi ne kulenga mu katongobela kaa ndekeelu mwamwa, bwa kulela Diitabuuja diikalà mwa kwambula

ne kubweja Ekeleeziya mu Butumbi. Ne Dyôdi adi didi disanganyibwa mu Mayiisha. Tukaadi bulelela ku cikondo cya nshiikidilu. Tukaadi babwâmbâmbé, ne byônsò, kadi cintu cyâtûfikidî patudi twakulangana apa. Eyowa's. Eyowa's, mukalenge. Dikwabu's ndyôdi edi. Ncya bushuwa.

227 Mu—mu—mudilu mukunze, bu mûngâmbî amu, ke udi ukosa cilumbu. Kwajiki. Mudilu mukunze ke udi unwambila ne uyââya nkampanda. Nansha cidi muntu mukwabo yônsò mwambe ciikale cinyi, anu cidi mudilu mukunze wamba aci. Ncya bushuwa ne nudi mwa kupeta dipatakaja dya njila dya mashinyi panwikala kanuyi—kanuyi nucyuka mudilu mukunze to. Kudi ne cya kwikala cyeyemenu. Eyowa's, mukalenge.

228 Anu mudibi bwa Ekeleeziya, bikengela kwikale cyeyemenu. Bwa bantu mu Ekeleeziya, bikengela wikale ne cyeyemenu cyebe.

229 Kadi, leelu ewu, ekeleeziya ne ekeleeziya udi ne cyende cyeyemenu. Nwamonu anyi? Kadi kuteeci kwangata cya ne: “Twêtù ba-Baptistes tudi twitabuuja *cikampanda*. Twêtù ba-Méthodistes tudi twitabuuja *cikansanga*. Twêtù ba-Presbytériens tudi twitabuuja *cikankenga*. Twêtù beena Mpenta tudi twitabuuja *cikankenga*” to. Aci cidi anu cîmpè, kadi bwa cinyi kanuyi nwangata bikwabo bya Cyôci aci? Cidi cibi mu bikwabo bya Cyôci aci ncinyi?

230 “Twêtù ba-Baptistes tudi twitabuuja diinyijangana dya mu mâyi.” Aci ncîmpè. Kadi bishi bwa dibatiiza dya Nyuma Mwîmpè, mpindyewu? Kadi bishi bwa dyakula dya mu myakulu? Kadi bishi bwa mapà a dyondopa? Kadi bishi bwa ciprofeta? “Kaa, to. Twêtù katwena tubiitabuuja to. Abi, abi bivwa mbwa cikondo cikwabo.” Kaa, balumyana wa yaaya!

231 Nwênù beena Mpenta, nudi nwamba ne: “Ee, twêtù tudi twitabuuja dyakula dya mu myakulu, bu cileeki.” Cya bushuwa, dyakula dya mu myakulu ndîmpè, kadi aci kaciyena anu cileeki to. Bantu bââbûngî batu baakula mu myakulu, aci ncya bushuwa, kadi mbaye kiimanyina paabo anu piine apu. Dyabulu's udi mwa kutentula dipà kana dyônsò didiku edi, dipà kana dyônsò didi mu Bible edi.

232 Pôlò mmwambe ne: “Nansha ngaakula mu myakulu ya bantu ne ya Banjelo, nansha mufile mubidi wanyi bwa wôwò kwoshiibwa bu mulambu, nansha musumbishe bintu byanyi byônsò bwa kudiisha bapele, anyi nansha mêmè ne diitabuuja dya kutuntumuna naadi mikuna, nansha mêmè muye ku seminere mukalonge dimanya dyônsò didiku didi dikengela kulonga adi, ndi anu cintu cyanaana.”

233 M'Mupersona wa Kilisto. Kilisto, uMwakidile Yêyè, ne kwêna mwa kuMwakidila paudi kuyi wakidila Dîyi Dyende to. Bidi bikengela bwa Dîyi dilwe dyambedi, pashiishe Mwoyi udi ubwela mu Dîyi adi ne umwenesha Dîyi adi.

234 Yesu kaakambaku ne: “Mêmè nciyi ngenza byenzedi bya Taatu Wanyi, nanku kanuNgiitabuuji” anyi? S’civwa n’Diyi dya Nzambi dimweneshiibwe. Nzambi uvwa munda mwa Kilisto, upungisha, uDileeja patooke kudi baa pa buloba, civwaYe aci. Ke civwa—ke civwa cyeyemenu ncyôci aci. Ke civwa cyeyemenu cya Cyendelelele mwaba awu ncyôci aci.

235 Mpindyewu wêwè udi wamba ne: “Aci ncyà Cyendelelele anyi, Mwaneetu Branham?” S’ke muvwaci. “Kadi bishi bwa leelu ewu?”

236 Yesu wakamba ne: “Ewu udi ungiitabuujà Mêmè, byenzedi bîndi Mêmè ngenza yêyè neàbyènzè pende.” S’ncyeyemenu anu cimwecimwe aci. Eyo.

237 Muntu ne muntu udi ne cyende cyeyemenu. Kaa, ekelekele! Bidi anu bu mwakadibi mu matuku a balumbulwishi ne: “Muntu ne muntu uvwa wenza civwa cyakane ku mèsù kwende.” Mu matuku a balumbulwishi, muntu ne muntu uvwa ne cyende—cyende cyeyemenu. Ūvwa wenza anu civwaye muswe pende kwenza aci. Nenuku mushindu awu ke udibi mpindyewu. “Muntu ne muntu uvwa wenza civwa cyakane ku mèsù kwende.” Mpindyewu, nudi bamanye kabingila kavwabo benzela ciine aci mu Balumbulwishi anyi? Eci ncifwanyine kupapulangana ndambu. Kadi kabingila kavwabo bacyenzela mu Balumbulwishi, mbwalu kabavwa ne muprofeta mu miine matuku awu to, bwa Dìyi dya Mukalenge kulwadi kudiye. Pa nanku muntu ne muntu uvwa mwa kwenza civwaye muswe pende kwenza aci, ku mèsù kwende yêyè.

238 Nenuku ke cyôci aci menemene cidi cyenzeke leelu ewu. Katwena ne muprofeta mu matuku a mangumba aa to, kadi Nzambi utu mutulayeye. Nwamonu anyi? Nwamonu anyi? Kadi Yêyè mmulaye. Mu matuku a ndekeelu, Yêyè uvwa mwa kajuula ne kutuma cyakabidi Eliya mu cyalu ne: “Ne yêyè uvwa mwa kukudimuna myoyi ya bânà ne kuyipingaja ku Diitabuujà dya baataatù,” kuyipingaja ku mpenta wa ku cibangidilu. Nudi bamanye ne ke cyakambaYe.

239 Mpindyewu, ndi mumanye ne nwênù nenuleedile, bu mwakaleedilaYe kwaka naka ku Yone, mu—mu Maataayi nshapita wa 11, ku mvensa mwi6, ngeela meeji ne nyêyè, paakambabo ne: “Udi wamba ne muntu ewu uvwa nganyi, mwine Yone ewu?”

240 Yêyè kwamba ne: “Panwikala mwa kuciitaba, yêyè ewu ke uvwabo bambe ne: ‘Mona, Ndi ntuma musanjeela Wanyi kumpala Kwanyi.’” Awu m’Maalaki 3, kî m’Maalaki 4 to.

241 Kadi, vulukaayi ne, bu ne civwa m’Maalaki 4, nanku’s Diyi ndipangile, bwalu Yêyè wakamba ne: “Kadi anu pa diine dibà edi mene, buloba bujima buvwa mwa kwoshika, ne baakane bavwa mwa kupatuka bwa kwendela pa butu bwa beena lwonji.” To. Kubwejakajiku aci to, mwaneetu. Enza ne Cyôci aci cyâmbè anu

menemene cìdiCi cyamba aci. Ncya bushuwa. Ke cyakalayaYe mu dituku dya ndekeelu, ne neciikale anu munkaci mwetu mene.

²⁴² Vulukaayi ne, mu cikondo cya balumbulwishi, muntu ne muntu uvwa wenza muvwaye muswe. Kakuvwa muntu nansha umwe, muntu nansha umwe uvwa mwa kuvwija Diyì adi ne mwoyi to. Kakuvwa muprofeta nansha umwe to. Diyì dya Mukalenge ditu misangu yònsò dilwa anu kudi muprofeta. Cya bushuwa. Ne yêyè misangu yònsò utu anu mukinyiibwe. Anu kasumbu kakese nkadi kamunanga, nwamonu's. Kadi, ndi muswe kwamba ne, kuvwa anu cyôci aci misangu yònsò.

²⁴³ Nzambi katu ushintulula ngenzelu Wende to, Kêna mwa kumushintululaku, kadi kwikala Nzambi to. Nzambi Yêyè wamba cintu kampana anyi wenza cintu kampana, Ûdi ne cya kucyenza musangu udi ulonda. Padi cikondo cya lutatu aci cifika, Yêyè kayi mwenze musangu mwibidì mushindu wakenzaYe musangu wa kumpala awu to, Ûvwa mwenze bibi musangu wa kumpala awu. Kadi wafunda Nzambi ne wakenza bibi ke nganyi? Ûdi nganyi wêwè, udi mwa kwela Nzambi mpekaatu pambidi? Aci's ncyakamba Yesu ne: "Nganyi wa kunudi aku udi mwa kuMpiisha bwa mpekaatu?"

²⁴⁴ Mpekaatu ncinyi? Bupidya. "Ewu udi kayi witabuuja mmumane kupiishiibwa."

²⁴⁵ "Nganyi wa kunudi aku udi mwa kundeeja Mémè ne Ncyêna muuje byònsò bivwa Maasiya ne cya kwenza?" Nwamonu anyi? Bònsò baakashaala matama bu byâta. Yêyè wakacyuja. Maasiya uvwa Muprofeta, ne Yêyè wakajaadika ne ke civwaYe. Kabavwa bapete muprofeta to kukaavwa bidimu nkama, kacya ku Maalaki, kadi's ke Yêyè ewu mujooke mu cyalu. Ûvwa wa kayi umwika to kudi bantu, ne dibwe dya cilendwishi kudi ekeleeziya wabo.

²⁴⁶ Bwalu, Yêyè wakamba ne: "Monaayi, Ndi nteeka mu Siona, dibwe dya mu ditumba, Dya mushinga mukole, diteeciibwe, kaa, dibwe dya cilendwishi." Eyowa's. "Kadi ewu yònsò wâMwitabuuja kaakufwishiibwaku bundu to." Ncya bushuwa. S'ke Yêyè awu. Ne aci cyakuuja Mufundu anu menemene. Kadi aba bàakaMwitabuuja baakapeta cyeyemenu.

²⁴⁷ Marta mutekete awu, paakamonaye Lazârô upatuka mu majambu, wakamanya ne Yêyè awu uvwa nganyi. Nansha mene kumpala kwa Cyôci aci kwenzekaci, uvwa ne cyeyemenu cya dimanya. "Ndi ngiitabuuja ne Wêwè udi Mwânà wa Nzambi, uvwa ne cya kulwa pa buloba awu. Nansha mpindyewu, nansha mwaneetu wa balume mwikale mufwe, amba anu dîyi cyanaana. Nzambi neàcyènzè." Amen. Ûvwa mutwishiibwe kakuyi mpatà to. Ncya bushuwa. PavwaYe. . . Kwambaye nanku, ne mwikale mucyâmbè ciikale cyumukila munda mwa mwoyi wende.

Yêyè ne: "Nudi bamujiike mwaba kaayi?"

Yêyè ne: "Kûmonè."

248 Ke Yêyè awu mwimane mwaba awu, ne cikeena-kumona. Bwalu, Yêyè uvwa mwambe ne: “Mêmè nciu ngenza cintu nansha cimwe padi Taatu kayi muNdeeeje dyambedi to,” Yone Munsantu 5.19.

249 KuMutumaYe, kuumuka ku ba-Lazàrô. KuMutuminabo mukenji bwa alwe, asambile. Yêyè uvwa mumanye ne Lazàrô neafwe. Nenku paanyima paa mukùngùlù wa dîbà, Yêyè kwamba ne: “Mulunda wetu, Lazàrô, mmulaale tulù.”

Bôbò ne: “Ùdi wènza bîmpè.”

250 Yêyè ne: “Mmufwe. Kadi bwa bwalu bwenu nwênù, Ndi nsanka bu mûmvwà Nciyipu to.” Bavwa bafwanyine kwikale baMulomba bwa kumusambidila.

251 Pashiishe kwalukilaYe, kwamba ne: “Kadi Ndi nya kamubiisha.” Kaa, ekelekele! (Kabiyi ne: “Nênye katangila cîndî mwa kwenza” to.) “Nênye kamubiisha.” Bwa cinyi? “Taatu ukaadi mumane kuNdeeeja anu menemene cya dyenza.”

252 Kupweka e kuyabo ku majambu. Ke Muntu udi mwimane apu awu. Ke Nzambi udi mwimane mu mubidi awu, uvwa mwa kwikala mwambile dibwe adi ne: “Enguluka,” ne dyôdî difwanyine kwenguluka. Kadi Yêyè kwambila bakaji abu, bakaji batekete bavwa bakwate ne bya luse abu, nsongakaji ya bitende ayi, ne: “Umushaayi dibwe adi.”

253 Udi ne cintu kampanda cya kwenza, wêwè peebe. Wamonu anyi? Ke bôbò kubunguluja dibwe adi e kudyumusha. Ke cyôcî kubendesha ku mwoyi; ùkaavwa ùnunka mupuuya mubole be.

254 Mwaba awu, Yêyè kwimana mwaba awu. Kaa, ekelekele! Ndi mwa kuMumona unana kapidibidi kakese aku. Bwalu, Bible mmwambe ne: “Kakwena bulenga butudi bafwanyine kuMujingila to.” Yêyè mwine, kavwa mutambe kwikala wa batangila to. Nwamonu anyi?

255 Anu bu Davidi menemene, wakasungudiibwa bu mfumu pacivwaye anu kaacintu kakese kakunzubile. Nwamonu anyi?

256 “Balumyana bônso baa banene abu,” mwakambaye, “kaakumwekaku mulenga ne cifulu cya butumbi ku mutu kwende anyi? Angata mwanaanyi wa balume wa mukulumpe ewu,” mwakamba Isaayi.

257 Samwele kwambaye ne: “Nzambi mmumubenge.” Kulwaye ne bânà bende baa balume bônso abu. Yêyè ne: “Kwênàku ne mukwabo anyi?”

258 “Eyo, tudi nende’s, kadi kî mmufwanyine kwikala ne mmwenekelu wa mfumu to. Mona’s, s’nkalumyana kakese menemene, kaa tukaaya tukobame, kamweke kakunzubile.”

“Ndaaku, ukamwangate.”

259 Nenku mmwenze anu ufika, ulwa kumpala kwa muprofeta awu, Nyuma e kumwikila. Kwasaye lubilu ne maanyi awu,

kumupongolwelawu pa mutu, kwamba ne: “Ke mfumu wenu nyèyè ewu.” Ke cyôci aci. Eyowa’s, mukalenge.

²⁶⁰ Yesu kwimana mwaba awu, ne tukaaya tukobame, pàmwâpa, mubange kutoloka mvya Pende kayi nansha mwanji kwikala ne bidimu bipite pa makumi asatu to. Bible mmwambe ne: “Ûvwa mufwanyine kumweka bu uvwa ne bidimu makumi anaayi.” Beena Yuda baakamba ne: “Wêwè udi Muntu wa kuyi ne bidimu bipite—bipite pa makumi ataanu to, kadi Udi wamba mùkaadi Wêwè ‘mumone Abraham’?”

Yèyè ne: “Kumpala kwa Abraham kwikalaku, NDI.” Maawu wa yaaya maawu! Kaa, ekelekele! Yone Munsantu 6.

²⁶¹ Pashiishe, twâlu kujandula ne, ke Yèyè uvwa mwimane ewu, pabwîpî ne majambu. Ûvwa mumanye ne cikeena-kumona aci civwa ne cya kukumbana. Ûvwa mumanye ne civwa ne cya kwenzeka. “Umushaayi dibwe adi.” Yèyè udi . . .

²⁶² Ûkaavwa ununka mupuuya mubole, mujîngila mu bilâmbâ bya dijiikangana naabi, mufwe kukaavwa matuku anaayi. Dyûlû dyende dikaavwa dibetelele, cikondo cyônso aci.

²⁶³ Mwaba awu, Yèyè kwimana mwaba awu, kunana kabidibidi Kende kakese aku. “Mêmè ndi dibiika dya ku lufu, ne Mwoyi.” Hum! “Ewu udi ungiitabuuja Mêmè, nansha byôbî ne mmufwe, nansha nanku yèyè neikale ne mwoyi.” Anji ngambilaayi tûng muntu udi mufwanyineku kwamba diyî bu nanku awu. “Ewu yônso udi ne mwoyi ne ungiitabuuja Mêmè kaadyakufwaku to. Udi witabuuja aci anyi?”

²⁶⁴ Yèyè ne: “Eyowa’s, Mukalenge.” Nansha mukaavwaYe mumwele mâyî ku makasa, mwakamwekabi. Paakabiikilaye, Yèyè kaakaya to. Kubiikilaye cyakabidi; Yèyè kaakaya to. Kadi ke yèyè ewu wamba ne: “Ndi mumanye ne Wêwè ke Kilisto uvwa ne cya kulwa pa buloba awu.”

²⁶⁵ Yèyè kwamba ne: “Lazârô, patuka.” Mwine awu muntu ukâävwa mufwe kukaavwa matuku anaayi. Bwa cinyi? Ncinyi? Kilisto uvwa ne cyeyemenu. Ûvwa mumone cikeena-kumona. Cyôci kacivwakû mwa kupangila to. Neya bushuwa. Kacivwakû mwa kupangila to. Ûvwa mutwishiibwe kakuyi mpatâ to.

²⁶⁶ Ne Marta uvwa mutwishiibwe kakuyi mpatâ to. Bu ne yèyè uvwa mwa kuMufikisha ku dijingulula civwaye witabuuja ne Yèyè uvwa nganyi, uvwa mwa kupeta civwaye ulomba aci. Cya bushuwa. Ke bôbô abu mwaba awu. Cyeyemenu, civwa ciswika pamwe ne Diyî, ne ke civwaku aci.

²⁶⁷ Muntu ne muntu leelu ewu udi wenza, ku mèsû kwende yèyè mwine, cidiye mumone cîmpè aci, bwalu kakwena muprofeta nansha umwe to. Tangilaayi mu matuku a balumbulwishi.

²⁶⁸ Tangilaayi mu matuku avwa Eli-. . . ngeela meeji, civwa ng’Eliya anyi ng’Elisha, umwe wa kudibo. Eyo. Aci, mwânâ mufwe awu. Mukaji mwena—mwena Suunema, wakenza . . .

269 Eliya uvwa muntu wa Nzambi wa mu dituku adi, kayi anu mulongeshi mwîmpè, wa meeji matwe to. Mona's, yêyè uvwa muntu mukulakaji uvwa wendela kuntu aku. Nudiku bafwanyine. . . Kulwaye, bu yêyè mwa kufika ku ciibi cyebe wêwè leelu ewu, pâmwâpa wêwè's udi mufwanyine kumwela lubilu. Ditunga dijima divwa dimukine. Izabela ne bakwabo bônso bavwa bamukine.

270 Bwalu, mukaji awu uvwa musòmbèle mu nzubu wa bukalenge mu Maison Blanche ne mufikishe bakaji bônso ku dyenza mushindu uvwaye yêyè wenza awu, ne bwônso bwabo bavwa bamwidikija yêyè. Kadi Aakaba uvwa mukùdimuna, mutu wende uvwa mukùdimuna, kudi bukookeshi bwa mukaji awu. Katwena twètù bapangakane ne cyôci aci ntanta mule menemene leelu ewu to. Mbiswe kwikala anu bimwebimwe abi, nenku's ke—s'ke bwalu mbwabu. Ne bwônso bwabo bavwa anu mu lwakamanyabo. Nenku, kaa, bavwa bônso bangacikemu.

271 Kadi mukaji mukese, mwena Suunema mukulakaji awu! Kayi mukaji mwena Suunema to, kadi mukese. . . Eyowa. Ngeela meeji ne uvwa mwena Suunema. Paakalwaye ne kumonaye ne bukole abu buvwa munda mwa Eliya, wakamba ne: "Ndi njingulula ne mmuntu wa cijila." Nenku pakaavwa mwânà awu mulaale panshi mufwe, kwambaye ne: "Swika ciseba paanyima paa kampundu kaka ne kwimanyiku to." Kuyaye kuntu aku. Ûvwa mumanye. Nenku mêmè ndi munange cyôci aci, mushindu wakalwaye awu. Kufikaye ku cyeyemenu cyende, dikunji dyende dya ciswikidi.

272 Eliya kwambaye ne: "Ke mwena Suunema ulwalwa wawa. Mmubungame. Kadi ncyêna mumanye ne lutatu ludi cinyi to." Nwamonu anyi? Nzambi katu uleeja basadidi Bende maalû ônsò to; anu cidiYe muswe bwa bôbô kumanya aci. Ke yêyè ne: "Mwoyi wende mmubungame, kadi ncyêna mumanye to." Yêyè ne: "Nda lubilu, ujandule, Gehazi, umone ne lutatu ludi cinyi."

273 Yêyè ne: "Maalu ônsò adi enda neebe bîmpè anyi? Maalu ônsò adi enda bîmpè ne bayeebe anyi? Maalu ônsò adi enda bîmpè ne mwaneebe wa balume anyi?"

274 Mutangilaayaaku. Kaa, ekelekele! Ke cyôci eci. Kwambaye ne: "Maalu ônsò adi bîmpè." Bwa cinyi? Ûvwa mufike ku cyeyemenu cyende. "Maalu ônsò adi bîmpè."

275 Ke kutwaye binù. Kudyupwilaye, dyambedi, ku makàsà ende. Kadi Gehazi kumujuulaye ne: "Aci kî ncîmpè to," kumpala kwa mfumwende—mfumwende. Kumujuulaye. Ke mukaji awu kubangaye kumulondela.

276 Mpindyewu, kavwaku yêyè ne cyeyemenu mpindyewu to. Ûvwa mumanye ne ùvwa ne bukole, ku cikeena-kumona, bwa kumupa mwânà awu. Kadi mpindyewu cyakenzaye ncinyi? Wakangata mulangala wende ne wakabwela mu cibambalu, kwinjilaye biibi byônso, kupatulaye bantu bakwabo bônso

pambelu. Kubangaye wàtwa eku wàtwa kwaka mu cibambalu amu. Ùvwa ne cyeyemenu, kadi bu yêyè anu mwa kuCilenga's we. Wàtwa kumpala wàtwa paanyima, wàtwa eku wàtwa kwaka mu cibambalu amu! Kaa, ekelekele! Dyakamwe kumvwaye Cintu kampanda cimulenga. Kulaadilaye pambidi paa mwânà awu. Kujuukaye cyakabidi, kwasaye Iwendu e kuya. Mwâ—mwânà awu ke kwenzaye bu wânyungù, luuya kulwalu pambidi pende. Kujuukaye, utwa kumpala utwa paanyima. Kavwa mupete dilengangana dîmpè ne cyeyemenu aci to. "Civwa ncinyi, Mukalenge? Cyûdî Wêwè muswe kwamba bwa kwenza ncinyi?"

277 Kakuyi mpatà to, paakakudimukaye, wakamona cikeena-kumona, kânà kaa balume aku kiikale kanyeema lubilu, kanaya, katupika ku mwonji, cintu kampanda cikwabo cya nanku awu, kanaya. Kudyelaye pambidi paa mwânà awu. Kutwaye dyûlù dyende yêyè pa dyûlù dya mwânà, mishiku yende pa mishiku ya mwânà, ke bukole bwa Nzambi kjujulabu mwânà awu ne kumupa mwoyi.

278 Civwa ncinyi aci? Cyeyemenu cya mukaji awu civwa mmuprofeta awu. Cyeyemenu cya muprofeta civwa n'Nzambi. Ne bônso pamwe, biikale ne Dîyî ne: "Mêmè ndi dibiika dya ku lufu ne Mwoyi." Mêmè ndi mmona bukole bwa Nzambi. Mufuki udi mwa kwenza byônso. Wakajuuka cyakabidi, mwânà awu. Cya bushuwa.

279 Kabingila kavwa kenze ne muntu ne muntu ikale wenza mu mushindu wende yêyè, mbwalu kabavwa ne muprofeta bwa Dîyî dya Nzambi kulwadi kudiye to. Dîyî ne baprofeta bivwa bipangike mu diine dituku adi.

280 Kaa, mêmè's ngâkamôna cyôci eci ku dikudimuna dyanyi dya mucima, cya dituku dituvwa ne mwoyi adi. Ndi ne disanka dyâbûngî dya muvwa Nzambi mumpete kumpala kwa ekeleeziya kumpetaye. Nunku pâmwâpa mvwa mwa kwikala mushaale mwena dyabulu. Eyowa's, mukalenge. Mêmè. . . Cinkûtunkûtù mùyômbelè cyônso eci, cimvundu, ne bantu bônso ne: "Ee, lwâku ushaale wa kutudi twètù. Kadi wêwè mubenge, ee, udi mwa kwangata mukanda webe mufundilangana bwa uye kashaala wa mûngà mwaba." Kaa! "Kwêna muswe kulwa ne mukanda webe mufundilangana awu bwa kubwela mu cyetu cisumbu anyi?"

281 Ndi mêmè ngiitabuuja ne kudi mukanda mufundilangana anu umwepele, mpadi Kilisto ufunda dînà dyebe mu Mukanda wa Mwoyi wa Mwânà wa mukooko. Anu mwômô amu nkaayaamu ke mùdidi difundiibwe.

282 Pâmmwènè mangumba ônsò awu! Wetu muji twètù tudi ba-Irlandais, bavwa mu bikondo bya ku cibangidilu biikale beena Katolike. Ke mêmè kumona ne aci civwa cinyanguke ne cibole. Mêmè kupweka kuya ku ekeleeziya kampanda wa cyena mangumba muneemu mu cimenga emu, bamba ne: "Kaa, twètù's ke njila, Bulelela, Bukênkè. Twètù ke badi ne cyônso Aci." Mêmè

kuya ku mukwabo mu New Albany: “Kaa, ekelekele! Balumyana badi kuntu kwaka abu kî mbamanye bidibo bamba abi to.” Beena Katolike bamba ne: “Nwênù bônso nudi bapiile.”

Mêmè kudyambidila ne: “Kaa, ekelekele!”

²⁸³ Mvwa ne ciibidilu cya kunaya ne mwânà wa balume mukwabo mutekete wa ba-Luthériens. Ke mêmè kudyambidila. . . Mwânà mutekete wa ba-Luthériens baa cyena Allemagne. Mêmè kuya kudiye e kwamba ne: “Wêwè ewu utu uya katendeleela mu ekeleeziya kaayi?”

“Ntu nya mu ekeleeziya *wawa*.”

²⁸⁴ Mêmè kukuya, ke mêmè kujandula ne bavwa bamba ne bôbò ke njila. Mêmè kuya kudi Mwaneetu Dale, mu ba-Baptistes baa Emmanuel, kadi, anyi ba-Baptistes baa ku Cibangidilu. Bavwa bamba ne: “*Ewu* ke njila.” Mêmè kuya ku ekeleeziya wa ba-Irlandais, awu ne: “Ee, *ewu* ke njila.”

²⁸⁵ “Kaa, ekelekele! Kadi ngaapeci kwôkò cibwejakaji cya eyo. Ngaapangi cya dyenza. Kadi paanyi’s ndi muswe kuditeekaku mu bulongame.” Ngâkapanga cya dyenza’s. Bya bwalu nciyi mumanye mwa kunyingalala to.

²⁸⁶ Mêmè kufunda mukanda. Mêmè kudyambidila ne: “Mêmè ewu’s nkaadiku muMumone mwitu.” Mêmè kuMufundila mukanda. Mêmè kwamba ne: “Mukalenge munanga, ndi mumanye ne Wêwè ewu utu upicila mu kajila kadi mwab’ewu aka, bwalu ntu nsòmba mwab’ewu ntwa buluwà bwa nshindi. Ndi mumanye ne Wêwè utu upicila mwab’ewu. Ndi mumanye ne Wêwè udi mwab’ewu. Ndi nKukebaku. Ndi muswe nKwambile bwalu kampanda.”

²⁸⁷ Mêmè kudyambidila ne: “Mpindyewu anji indilabi kakese tûng. Ncituku—ncituku mwanji kumona muntu nansha umwe to. Ncitu mumumoneku to. Ndi muswe kwakulaku ne Cyôci aci. Ndi—ndi muswe kwakulaku Nende Yêyè. Ndi muswe kwakulaku Nende Yêyè.” Mêmè kudyambidila ne: “Ee, mpindyewu, ncyèna mumanye mushindu wa kwakula nende to.”

²⁸⁸ Mêmè kupatuka kuya mu kaacisaasa amu e kutwa binù, mâyì, mubole. Kashinyi kakese, kaa kale aku kiimane pambelu pààpa, kanyangukangane kônso. Mêmè kwamba ne: “Ngeela meeji ne nkaadiku mumone cimfwanyi, ngeela meeji, batu bateeke byanza byabo mushindu *ewu*.” Ke mêmè kutwa binù. Ke mêmè kwamba ne: “Mpindyewu ncinyi cingùikalà mwa kwamba?” Mêmè ne: “Kudiku mushindu kampanda udi ukengela kwenza ciine eci, kadi mêmè ngudi nciyi mumanye to. Ndi mumanye ne kudiku anu mushindu wa kuseemena ku cintu cyônso. Kadi mêmè ncyèna. . .” Mêmè ne: “Nèntekè byanza mushindu *ewu*.”

²⁸⁹ Mêmè ne: “Mukalenge munanga, ndi njingaku bwa Wêwè kulwa kwakula naanyi, bwa katanci kakese cyanaana. Ndi

musweku bwa nKwambile mushindu wûndi mubi.” Mushaale muteeke cyanza mushindu *ewu*. Mêmè kushaala muteeleje.

²⁹⁰ Bantu bavwa anu bamba ne: “Nzambi mmwakule naanyi.” Ne mêmè mvwa mumanye ne bulelela Yêyè uvwa wakula, bwalu ngâkaCyûmvwaku pâncîvwà mwânà, cingambila bwa “ncinu maala to” ne bikwabo.

²⁹¹ Kaakangandamuna to. Mêmè kwamba ne: “Pàmwâpa bivwa bikengela mêmè kuteeka byanza mushindu *ewu*.”

²⁹² Ke mêmè kwamba ne: “Mukalenge munanga, ncyêna anu mumanye menemene mushindu wa kwenza cyôci eci to, kadi ndi—ndi mutwishibwe ne Wêwè newikale mwa. . . Udi mwa kunkwacishaku Wêwè anyi?”

²⁹³ Ne muyiishi yônsò uvwa anu wenza kungambila ne, mêmè nye kashaala wa mwabo bôbò, nenku bantu bajuuka bamba ne bângàci Yesu Kilisto, ne badi “biitabuuje ne Yesu m’Mwânà wa Nzambi.” Démons paayi’s yitu yitabuuja cintu cimwecimwe aci.

Ke mêmè kudyambidila ne: “Bikengela ngii—ngiikale ne cintu kampanda citambe aci nanku ku bwîmpè.” To.

Mvwa musòmbè mushindu *ewu*.

²⁹⁴ Mêmè kubala mwaba uvwa Peetelo ne Yone bapicile ku ciibi civwabo babiikila ne Cilenga awu, ne kwikale muntu mulume uvwa cikalaba, kubangila pacivwaye munda mwa mamwëndè. Yêyè kwamba ne: “Nî ng’argent nî nngôlo ncyêna naabi to, kadi cîndi naaci. . .” Kaa, mvwa mumanye ne ncivwaku ne aci to.

²⁹⁵ Pa nanku mvwa nkeba bwa—bwa kujandula mushindu wa kucyenza. Ncivwa mumanye mushindu wa kusambila to. Mêmè kuvunga byanza byanyi, pashiishe mêmè kulaadila panshi mushindu *ewu*.

²⁹⁶ Ke, mu bushuwa bwa bwalu, pa dîbà adi Sataana kubwela mu cyalu, kwambaye ne: “Wamonu’s, windidi ntanta mupitepite bule. Peebe’s ukaadi ne bidimu makumi abidi. Kabyena ne mushinga bwa kuteeta aci mpindyewu to. Eyowa’s.”

²⁹⁷ Pa dîbà adi ke mêmè kwikala mucibuluke yônsò, ke mêmè kukutula mwadi. Ke pashiishe, pângâakashàlà mucibuluke anu bya menemene apu, mêmè kwamba ne: “Ndi muswe kwakula. Nansha Wêwè kuyi mwakule naanyi to, mêmè ndi ngaakula Neebe, nansha bya munyi.” Ke mêmè—mêmè kwamba ne: “Ncyêna mwîmpè to. Ndi ndyumvwa mêmè mwine bundu. Mukalenge Nzambi, ndi mumanye ne Wêwè neungumvweku, mwaba kampanda. Neungumvwe. Kadi ndi ndyumvwa mêmè mwine bundu. Ndi ngumvwa bundu bwa mûndi muKulengulule.”

²⁹⁸ Lwà pa dîbà adi, mêmè kubanduluka, ke cintu kampanda cya pabwâci kungiikila. Ke Bukênkê kampanda bûlwalwà ebu, bwendakana mu cibambalu mwônsò amu, ne kwenzabu nkuruse, mushindu *ewu*. Ke Diyî, dîmvwâ nciyiku mwanji

kumvwa to kacya bandela, kwakuladi. Mêmè kuButangila. Mubidi mungeele anu mashika's, mubidi mujima, mukwacike tukulakaji bwa bwôwà. Nciyiku ne mushindu wa kunyunga to. Mêmè kujuuka, kuButangila. Bwôbò kuumuka kuya.

²⁹⁹ Mêmè kwamba ne: “Mukalenge, ncyêna—ncyêna ngumvwa ngaakwilu Webe to.” Mêmè ne: “Pawikala Wêwè kuyi mwa kwakula mu wanyi ngaakwilu to, ne mêmè—ne mêmè paanyi nyawu nciyi ngumvwa Webè, ne piikalabi ne Wêwè wamfwidi luse. . . Ndi mumanye ne ndi ne cya kwikala mubadiibwe mu nkuruse wawa, mwaba kampanda, bwa ne mpekaatu yanyi yivwa ne cya kwikala miteekamu. Nenu—nenu paWikala muswe kumfwilaku luse, alukilaaku wakule anu mu ngaakwilu Webè Wêwè mwine awu. Nenu mêmè nêngŭmwè ku ciine aci, pawikala Wêwè kuyi mwa kwakula mu wanyi ngaakwilu.” Mêmè kwamba ne: “Ulekele anu Cyôci aci cyalukile, cyakabidi.”

³⁰⁰ Ke Cyôci kulwaci, cyakabidi. Kaa, Nzambi wanyi! Mwaba awu mêmè kadi kupeta cyeyemenu's. Amen. Eyowa's, mukalenge. Mêmè kudyumvwa anu bu ne bu—bujitu bwa kilò binunu makumi anaayi bwakuumushiibwa pa makaaya aanyi. Mêmè kwenda ngendela panshi apu, bu uvwa nciyi nansha mwa kulengaku buloba to.

Maamu kwambaye ne: “Billy, s'udi munyunguluke mutu.”

Mêmè ne: “To, maman, ncyêna mumanye cidi cyenzeke to.”

³⁰¹ Kuvwa njila wa njanja lwà paanyima apu. Mêmè kupweka lubilu ngenda ndonda njila wa njanja awu, ngenda ntupika muulu mu lupeepele, ne mwanyi mwônsò. Nciwva mumanye ne mbya kupita bishi ne njiyà yîmvwà ngumvwa ayi to. Kaa, biikalaku ne nkaavwa mumanye mwa kwela mbila's we! Mvwa ngeela mbila, kadi mu wanyi paanyi mushindu, nudi numona's.

³⁰² Civwa ncinyi? Mvwa mwele lwongo lwa musuuka wanyi mu mwaba wa ditalala. Aci kukosaci bwalu. Ke civwa cyeyemenu cyanyi ncyôci aci. Mwaba awu mêmè kupeta cintu kampanda, kacyi bwalu kampanda bukwatakaja, mmwenenu kampanda to. Mvwa mwakule ne Muntu mwine. Mvwa mwakule ne Muntu mwine wâkangambila bwa “ncinu maala, anyi mfwanka, anyi ncyenji cintu nansha cimwe cya cifwanyine kunkooyisha” mêmè mwine ne bakaji ne bikwabo awu. Ne, pâmvwà mwa kukola, kuvwa mudimu wa mêmè kwenza. Ngâkabwela Nende mu dipetangana; kacyi ekeleeziya to. Ngâkabwela Nende mu dipetangana, Yêyè awu! Eyowa's, mukalenge. Úvwa n'Yêyè.

³⁰³ Byenze bu mwabilaayi mukwabo mu ba-Kiwanis emu anyi. . . úvwa wakula, kacyi. . . anu pâvwà Mvita ya Kumpala ya Buloba bujima icifuminakù ku dijika apu. Mwaneeu Funk, udi mwimane pââpa wawa, bu mudiye musalaayi. Kwambaye muvwaye. . . Mbya tuseku ndambu, mudibi byumvwika's. Mwaḃ'ewu kí ngwa kwenzela bilele to, kadi cyakambaye ncyôci eci. Úvwa usanganyiibwa mu New Albany emu.

304 Ke yêyè ne: “Kapiteena kupatukaye neetu, kwambaye ne: ‘Ditunga dijima dyadya ndibucikila kudi ba-Japonais. Maalaba wa maalaba, nwênù balumyana, tùmùbwelàayi. Tudi ne cya kubakwata.’ Yêyè ne: ‘Nwavulukaaayi, balumyana, ne kudi bààbùngì beetu badi biimane mwab’ewu, leelu ewu, biikalà kabaciyiku maalaba to. Kabaakwikalaku mwab’ewu maalaba to. Netubwelemu, mu dinda, pa kabundubundu.’ Yêyè ne: ‘Bwa mpindyewu muntu ne muntu ashaale mulamate ku ntendeleelu wende.’” Mwabilaayi ewu kwambaye ne: “Kadi mêmè ncivwaku ne ntendeleelu nansha wa kânà to.” Ke kwambaye ne: “Mêmè kwamba ne . . .”

305 Yêyè ne: “Mêmè kushaala mwimane mwaba awu. Ne bakwabo bônso baa kudibo . . .” Yêyè ne: “Ke muyiishi wa mu basalaayi ulwâlwa ewu, kuyiilaye *eku*; ke mwena Mishònyì kuyiilaye *eku*; ke mwena Yuda kuyiilaye *eku*; ke mwena Katolike kuyiilaye *kwaka*; biikale muntu ne muntu ne muyiishi wende.” Yêyè ne: “Mêmè kushaala mwimane mwaba awu.”

306 Ke yêyè ne: “Mu—munene wa basalaayi kungambilaye, ne: ‘Mmyânà, bikengela wikale ku webè ntendeleelu’s.’”

Yêyè ne: “Mêmè ncitu nende to.”

307 Yêyè ne: “Bikengela wikaleku nende, bwalu newikale nende dijinga kakuyi dijanguluka to. Ndi mutwishiibwe nanku.”

308 Ke kwambaye ne, pa diine dîbà adi kumonaye musumba wa bantu bapicila mwaba awu, bavwa beena Katolike. Kwambaye ne wakaseemena e kwambila nsaserdose awu ne: “Udi mwa kumpeeshaku ntendeleelu kampanda anyi?”

Ke awu kwamba ne: “Lwâkwaku.”

309 Yêyè ne: “Kubwelaye e kumvwijaye mwena Katolike.” Ne mu New Albany amu, muvwa John Howard ne musumba wa beena Katolike baa lulamatu lwa menemene basômbe mwaba awu, nudi bamanye’, pavwa mwabilaayi ewu ulonda bwine bwalu ebu apu.

310 Ke kwambaye—kwambaye ne: “Dituku dyakalonda mu mvita . . .” Ûvwa ulonda’s, kaa, muvwabi. Ke kwambaye muvwaye muntu munene wa menemene, nudi bamanye’s. Ke yêyè kwamba ne: “Bakaavwa bapyangane pambidi, ne biikale bacimpikangana anu twele, ne beela mbila mikole, ne batapangana, ne bafyononangana mputa ya milengu.” Yêyè ne: “Milongo yabo kubwelakananganayi. Kufikabo ku dicinguluka buludi, paakabalekeela ba-Japonais abu babwelamu, mushindu awu. Ke bingoma binene bya mwambuuyi abi biikale bikùmuna, nseke yônso. Mvita ya bapyangane pambidi!”

311 Kwambaye ne: “Dyakamwe, mêmè kwimana, mwimane mushindu *ewu*.” Ke yêyè ne: “Byônso byela mbila mikole kacya anu yamonangana, mu mushindu wa kuyi mwa kuumvwa byûdi wêwè mwine wamba to.” Yêyè ne: “Kuvwa mashi.” Yêyè ne:

“Mémè kutangila, civwa mmashi aanyi mémè.” Yèyè ne: “Mémè kutangila *apa*. Kuvwa disoso mu lubadi lwanyi.” Yèyè ne: “Civwa mmashi aanyi mémè.” Ke yèyè ne: “Mémè, udi mumanye’s, mémè—mémè—mémè. . .”

Ke mulunda wa menemene . . . mwena Katolike, mpindyewu ncyèna ngamba eci bwa—bwa kusekeshangana to, kadi mwena Katolike mukwabo wa lulamatu lwa menemene kwambaye—kwambaye ne: “Wèwè kusambila *Mwoyo Mâriyà* anyi?”

³¹² Yèyè ne: “To, mukalenge.” Yèyè ne: “Civwa mmashi aanyi mémè. Ncivwa muswe bya tuleleki abi to. Mémè ne: ‘Ndi muswe mémè kwakulangana ne Muntu wa kumutù awu.’ Civwa—civwa mmashi aanyi mémè.”

³¹³ Ngeela meeji ne mushindu awu ngudibi byamba kwikala. Eyowa’s, mukalenge. Mushindu awu ngudibi byenzeka. Bikengela tupete dikunji dya ciswikidi, cyeyemenu kampanda.

“Ncivwa ne dibà nansha dikese bwa kaleleki Wende to.” Yèyè ne: “Ndi muswe ngaakulangane Nende Yèyè.”

³¹⁴ S’ke mudibi, mwaneetu. Padi muntu ulwa kudi Kilisto, bûdi naabu kî mbwa kwangata dîyî dya muyiishi kampanda, dîyî dya kaleleki kampanda, cintu cikwabo kampanda nansha. Nwènù beena Mishònyî, kanwangaci *cikampanda*, *cikansanga*, anyi *cikankenga* to. Ndaayi ku cyeyemenu aci, too ne panwela lwongo mwômò amu ku Dilediibwa dipyadipya, ulediibwe cyakabidi ne uujiibwe tente ne Nyuma Mwîmpè, nenku neumone Bible umweneshiibwa mu didipwekesha dyònsò ne mu dinanga mu nsòmbelu webe yònsò. Kaa, pa dibà adi, ke cyeyemenu cyebe ncyôci aci. Eyowa’s, mukalenge.

³¹⁵ Nkaadiku mubale mu Dîyî mwaba udiYe Dîyî. Pavwabi ne, ekeleeziya wa beena Allemagne wamba ne bidî mushindu *kampanda*; ne ba-Méthodistes, ne ba-Baptistes, ne beena Katolike. Kadi mémè nkaadiku mubale mu Dîyî mwaba udiYe mwambe ne: “Pa lubwebwe elu Mémè nêngîbakilèpu Ekeleeziya Wanyi, ne biibi bya iferno kabyena mwa kuMutamba bukole to.”

Teelejaayi mpindyewu, bwa kujikija. Mpindyewu Mishònyî udi wamba ne. . .

³¹⁶ Mpindyewu Katolike udi wamba ne: “MmuMwibakile pa Peetelo ne: ‘Wèwè udi Peetelo, ne pa lubwebwe elu. . .’” To, Yèyè kacya. Bu ne bivwa nanku, mmutwe cîmpingà anu mwaba awu. Mbamwibakile pa muntu.

³¹⁷ CyakenzaYe ncinyi? Mishònyî yèyè mmwambe ne: “Yèyè mmuMwibakile pa Yèyè mwine.” To. Kî mmwenze nanku to. Kî mmuMwibakile pa Yèyè mwine to.

³¹⁸ CyakenzaYe ncinyi? Ncinyi? “Bantu badi bamba ne Mémè, Mwânà wa muntu ewu, ndi nganyi?”

“Bamwe mbambe ne Wèwè udi ‘Eliya,’ ne ‘Môsà.’”

Yèyè kwamba ne: “Kadi nwênù nudi nwamba bishi?”

Peetelo kwambaye ne: “Wèwè udi Kilisto, Mwànà wa Nzambi udi ne mwoyi.”

³¹⁹ Tangilaayaaku mēyì awu mpindyewu. “Udi mubeneshiibwe, Simona, mwànà wa Yona. Kì mmubidi ne mashi bidi bikubuulwile eci to. Kutuku mucilongele ku seminere kampanda to. Kadi Taatù Wanyi udi mu Dyulu ngudi mukubuulwileCi. Nenku pa lubwebwe elu,” dibuulula dya mu nyuma dya Dìyì, “Nèngiibakilèpu Ekeleeziya Wanyi, ne biibi bya iferno kabyena mwa kuMutamba bukole to.”

Mémè kudyambidila ne: “Mukalenge, s’ke cyôci aci.”

³²⁰ Nkaadiku mubale mu Mukanda wa Bwakabuulwibwa emu, nshapita wa 21...nshapita wa 22, mwaba udiYe mwambe ne: “Ewu yônsò...” Eci n’Cintu cikumbanangane. “Ewu yônsò wadidinga kwelaMu kantu kampanda awu; ewu yônsò wadidinga kuumushilaKu Kantu kampanda awu, uvila ne Cyôci aci kaciyena nanku awu; anyi ewu yônsò wadidinga kuteeta kuCilengeja ndambu, kuCivwija cya kapelu bwa dituku awu. Ewu yônsò wadidinga kuteeta kusakidila anyi kuumushila awu, cintu cimwecimwe aci necyumushiibwe, cyende citupa, ku Mukanda wa Mwoyi.”

³²¹ Mémè kwamba ne: “Nenku, s’ke cyônsò cîndì naaci dijinga ncyôci aci, Mukalenge, nkwitabuuja Cyôci eci.” Ne mu Cyôci eci, nkuruse wawa, ke mwakalwa Kilisto. Ncipwangane, ku ntwadijilu ne ku ndekeelu, Dìyì dyônsò dikaadiYeku mwambe adi. Kwangata Mukanda mu eci cyaanza, maalu malonda mu eci cyaanza, ne cidishindika anu menemene, ncipwangane. Ke mémè kwamba ne: “Nenku, Mukalenge, ngaakidilèku.” Nenku pângààkenzà aci, ngâkaakidila Kilisto, Nyuma Mwîmpè munda mwa mwoyi wanyi, cyeyemenu cyanyi. Kacivwa mmémè to.

³²² Mémè kusaama musangu kampanda, pavwa wanyi. . . Mémè kujimija mukaajaanyi. Mémè kujimija mwanaanyi wa mu diboko. Kaa, mémè kujimija taatù wanyi, kujimija mwakunyaanyi wa balume, kujimija bukonde bwanyi wa bakaji. Ne Billy uvwa mulaadika panshi, ùpùnga ne lufu, ne—ne mémè kwenza anu bu ne ngăfù mwine. Mvwa ngenda mbànda ne njila, ngenda ndila mwadi, nya mutangile ku majambu ende; ne yèyè ne mwànà wa mu diboko awu, ne mwànà awu mwikale mu diboko dyende. Ngenda nya mutangile ku majambu. Mvwa ngenda mbànda lwà makàsà. Mukalenge Isler uvwa ne ciibidilu cya kulwa muneemu emu bwa kunaya, nudi bamanye’s, Cìpwitâ-mùnwàmfwankà mukulumpe wa ditunga dya Indiana. Ûvwa ulwa wenda ubànda ne njila. Kungiimanyikaye. Kulwaye kwaka lubilu, kungeelaye maboko kunshingu. Civwa mpaanyima paa dipaasalala dya mâyì dya mu cidimu cya ’37. Kwambaye ne: “Uyààya kwèpì, Billy? Kwaka naka anyi?”

Ke mêmè kwamba ne: “Eyo.”

Yèyè ne: “Uyààya kenzaku cinyi kwine kwaka?”

323 Mêmè ne: “Ntu nkateeleja nkuci wa kale.” Mêmè ne: “Ntu nkasomba ku luseke lwa majambu a mwanaanyi wa mu diboko ne ende yèyè aku. Nkuci wa kale utu upwekaku, wakula naanyi.”

“Kaa,” mwakambaye, “Billy!”

324 Mêmè ne: “Eyowa’s. Kabidi ntu ngumvwa minunganyi ya mabeji padiwu imba apu. Angimbila mijiki’s, Mukalenge Isler.”

Yèyè ne: “Mmijiki ya mushindu kaayi ayi yidiwu imba?” mwakambaye.

Kudi Ditunga dyamwamwa dya musulu,
Didibo babiikila ne ndilenga bwa kashidi,
Ne tudi tukafika ku cisabu aci anu ku cipidi
cya diitabuuja;
Ku umwe ku umwe tudi tukafika ku ciibi aci,
Bwa kusombelaku pamwe ne bakeena bafwa,
Peelabo ngonga ya ngòlò ayi dinga dituku
bwebe wèwè ne mêmè.

325 Yèyè kwamba ne: “Billy, ndi muswe nkukonkeku cintu kampanda.” Yèyè ne: “Kilisto udiku ne dyumvwija kaayi bwebe wèwè mpindyewu? Kilisto udiku ne dyumvwija kaayi bwebe wèwè mpindyewu?”

326 Mêmè ne: “Yèyè ke Mwoyi wanyi, byònsò byanyi. Yèyè ke byònsò bìndì mêmè naabi, Mukalenge Isler. Yèyè ke wanyi—wanyi Nkàmisha. Yèyè ke cyònsò cìndiku mwa kwikala mukwate.” Bwa cinyi? Kukaavwa kwenzeke cintu kampanda. “Pa lubwebwe elu!”

327 Yèyè ne: “S’nkaadiku mukumone wimana mwaba ewu mu masangu emu yuiisha, mu mushindu wa ushaala mumweke bu mufwanyine kudishinda kufwa. Nkaadi mukumone, mèbà ònsò a bufuku, ubànda upweka ne mìsèèsù, wenda ukumbulanga ne babeedi. Kadi paanyima paa Yèyè mumane kwangata mukajebe sungasunga, ne mwanebe wa munda mudi nzala, wèwè uci anu utungunuka ne kuMukwacila mudimu anyi?”

328 Mêmè ne: “Bu Yèyè mwa kunshipa mêmè, ndi ntungunuka anu ne kuMweyemena.” Bwa cinyi? Lwongo lwanyi ndukwate munda mwa cilambà cikudika. Mvwa ne Cyeyemenu. Mvwa mudiswikile ku Dìyì Dyende, ne Dìyì Dyende divwa kacya anu dyakwata. Yèyè ke cyanyi Cyeyemenu. Ntu mulwe kujandule ne, bintu bikwabo byònsò ebi bidi mwa kupangila, kadi Kilisto kèna mwa kupangilaku to.

329 Ekeleeziya wa Katolike udi ne paapà bu cyeyemenu. Beena Mishònyì badi ne bepiskopo baabo, ne twitabaayi yabo, ne batangidi bakulu baabo.

³³⁰ Kadi, mêmè, bu Pòlò . . . Udi ne crayon webe anyi? Fùndaku cintu kampanda. Mu . . . Pòlò wakamba, mu Byenzedi nshapita wa 20 ku mvensa wa 24 ne: “Kakwena nansha cimwe cya ku bintu ebi cidì cinnjungishaku to.” Kaa, wèwè udi mwa kwikala ne twitabaayi, udi mwa kwikala ne cyònsò cyùdi muswe kwikala naaci aci, kadi byòbì bintu abi kabyena binnyungishaku mêmè ewu to.

Ndi mwele lwongo lwa musuuka wanyi mu mwaba wa diikisha,
Bwa kwenda ne mazuwa pa mbû mitomboke
(ne kuyi umanya ne udi penyi to, mu *nunku*,
mu *naka*) kuyi umanya kabidi to;
Cipeepele cikole cidì mwa kutuuta pa ndondo
mutomboke, wa mvula ya cipupu,

Byònsò bidì mwa kutwa katungu.

Kadi mu Yesu ndi mu dikubiibwa kashidi ne kashidi.

³³¹ Eyowa’s. Kakwena nansha cimwe cya ku bintu ebi cidì cinnjungishaku to, bwalu ndi muswikila ku lwongo kampanda. “Kaa, kacya ngàtuutakeena Nende,” mwakamba Pòlò, “mu njila wawa, nkaadi muswikila ku lwongo kampanda. Yèyè ukaadi munkudimune kadi kuntangija kûmvwà mfuma. Mmwasulule naanyi lwendu mu mushindu mwîmpè.” Vulukaayi ne, Pòlò awu uvwa pende wa mu bulongolodi kampanda, bùvwà butambe bunene bwa mu ditunga amu, kadi wakashaala muswikila ku cyeyemenu aci.

³³² Teelejaayi. Ndi muswe kunwambilaku cintu kampanda. Yèyè uvwa ne kiipacila kampanda pa kunsungila mêmè ewu. Ûvwa ne kiipacila kampanda pa kukusungila wèwè awu. Nenu mêmè ndi mupàngàdike mu mwoyi wànyi, ku diswa Dyende, bwa mêmè kucyenza; kabiya bwa kusakidilaKu, anyi bwa kuumushilaKu to. Bwakabuulwibwa 22.19, pawikala muswe kufunda aci. Eyo. “Ewu yònsò wadidinga kuumushila. . .” Mêmè ndi mukange mwoyi. Nkaadi mudilongolole bwa kushiyangana ne ekeleeziya, ne nwènù nudi bamanye aci. Ne pa nanku ndi mupàngàdike mu mwoyi bwa kushaala ne Evanjeeliyo ewu dibà dyònsò dîncidì ne mwoyi, ku dikwacisha dya Nzambi. Huh! Vulukaayi ne, ngàsà ke yèyè ewu. Kuvwa miliyò ya bantu biikale bafwa mu mpekaatu piine paakansungilaYe mêmè apu. Mêmè mvwa nganyi bwa kukengelabi ne anu Yèyè munsungile? Yèyè uvwa ne kiipacila, pa kunsungila mêmè, nenku mêmè ndi mupàngàdike mu mwoyi bwa kutungunuka ne kiipacila aku. Ncyèna mbicyuka to. Ncifwanyine kwikala wanyi ndekeelu, pàmwàpa, abidì adi panshi aa mpindyewu. Kadi, cyònsò cidìku aci, ndi anu mwele lwongo. Ncitu mwanji kucishintululaku to.

333 Mukalenge Isler wakangambila diine dituku adi, pavwaye wenda ubànda ne njila apu, kwambaye ne: “Billy, mu lutatu lwònsò elu, udi anu mulame ntendeleelu webe awu anyi?”

334 Mémè ne: “To, mukalenge. Ntendeleelu yêyè ngudi mundame mémè.” Um-hum. Lwongo lwanyi luvwa lukwate. Ncya bushuwa. Kî mmémè udi muMulame to. Yêyè ngudi mundame mémè. Mémè ncyèna mwa kuMulama to. Kakwena mushindu wa mémè kucyenza to. Kadi Yêyè ngudi undama mémè. Eyowa’s, mukalenge.

335 Yêyè uvwa ne kiipacila pa kunsungila mémè. Kuvwa miliyò ya bantu mu mpekaatu pângàakalwà kudiYe apu, kadi Yêyè kunsungila mémè. Ûvwa ne kiipacila pa kwenza nanku.

336 Lufu lwa Kilisto luvwa cyeyemenu, bwa civwa citangila bwôwà bwa lufu. Lufu lwa Kilisto lwakakosa cilumbu aci, paakaMusuma lubulubulu lwa lufu alu ne paakeelalu lwôngò lwa kalonda aku. Nudi bamanye ne, lubulubulu, cîshì cidi ne kalonda, lwòlò anu ludidinge lubweje lwongo lwa kalonda aku, mu ndondo menemene, pakaadilu lukapatula, bidi bipatula kalonda aku kashaalamu. Lufu luvwa misangu yònsò anu ne kalonda. Lufu luvwa misangu yònsò anu ne kalonda.

337 Nunku dituku dikwabo, wenda ùbànda mutangile ku Kalvariyo, ne ditondoka dya pa mbwebwe ayi adi, Mashi byenda bizololokela pa mbwebwe, paakalengawu buloba bwa pa Kalvariyo abu, wenda uya ku Gologota, ntaku wa nkuruse awu, uvwa wenda ukoona mu byendedi bya makàsà bivwa ne Mashi bya kabidibidi kakese, katekete kàvwà kenda kaya aku, kàvwà kèndelàmu aku. Bòbò benda baMwela mfimbu ne baMuboza, pavwaYe wenda ubànda kakuna apu, kadi Yêyè uvwa ne cyeyemenu. Ûvwa mumanye pavwaYe mwimanyine, bwalu Diyì dya Nzambi dikaavwa dyambe, dyambile kudi Davidi ne: “Ncyakushiya Munsantu Wanyi umona dibola, anyi Ncyakushiya musuuka Wende mu iferno to.”

338 Ûvwa mumanye ne dibola divwa dibanga, munda mwa mêtà makumi mwandamutekete ne abidi. Wàkamba ne: “Shimbulaayi ntempelu ewu, ne Mémè nêmmujuulè cyakabidi munda mwa matuku asatu.” Ûvwa ne cyeyemenu kampanda.

339 Ke Yêyè uyààya wawa, wenda ùbànda kakuna, ne bimoto bya makodi a baseki, mate a basalaayi bakwacike maala baa bwena bavwa baMuswike mukusu ku mèsù, ne baMutuute mucu ku mutu abu, bamba ne: “Wêwè udi muprofeta anyi? Twàmbilèbi tũng wàKutuutù awu.” Ke Yêyè awu, wenda ubànda kakuna, mu bundu ne dipwekeshiibwa dya milongo amu. Bwa kwikala. . . Bilàmbà Byende biMukopola, udyombola bundu, mukudika pa nkuruse kumpala kwa bantu, butaka. Mwikale ufwa mu dipwekeshiibwa dya milongo dya kudi beena Loomo, dya kudi bukalenge, dinyooka dya lufu, Muntu uvwa kayi mwenze bwalu nansha bumwe.

340 Kaabwalu kakese kavwabo balonde musangu kampanda, kavwa kamba ne, Mariya wa ku Magadala kupatukaye lubilu wamba ne: “CidiYe mwenze ncinyi? Munwöndöpèle babeedi beenu, mubiishe bafwe, ne mutwale disungidiibwa kudi aba bàvwà baswe kudipeta, bàvwà mu bupika. CidiYe mwenze ncinyi?”

341 Ke mwakwidi kampanda kumunangulaye dipi ku mishiku, mu mushindu wa ne mashi akasotoka, kwambaye ne: “Nudi nwênù baswe kuteeleja mukaji ewu anyi mwakwidi wenu munene?”

342 Kaa, bantu baa cyena mangumba abu, s’mmulawu bwa biine byönsò abi. S’ncyôci.

343 Kwôkò aku, eyo, nkwakayabo Nende. Kadi pavwaYe wenda ubànda kakuna apu, wenda udikoka biteketebitekete, dyabulu uvwa anu misangu yönsò mucyéléèle mpatà, bwa ne Yèye uvwa civwaYe aci. Wakamba ne: “Ne Udi Mwânà wa Nzambi, andamunabi tũng mabwe aa alwe mampà. Wèwè nyawu ulaka mukana wamba ne Udi mwa kwenza bishima. Ne Udi Mwânà wa Nzambi, tuminabi mabwe aa diyi bwa andamuke mampà.”

344 Dyabulu wa kale umweumwe awu ucidi anu ne mwoyi leelu ewu. Ncya bushuwa. “Ne udi mwondopi wa kudi Nzambi! S’ke mukulumpe John *Kampanda* nyèyè ewu musòmbè mu disangu emu. Ndi mumanye ne ncikalaba. Anji mwondopebi tũng.” Kanwenaku bamanye ne nyèyè dyabulu umweumwe wa kale awu anyi?

Yesu wakamba ne: “Ndi Mémè ngenza anu. . .”

345 Tangilaayi, Yèyè kupicila ku ciinà cya mâyi cya Beteseda, kuvwa binunu bya bantu balaadile panshi mwaba awu, balema, bampofo, bilemenda, ne beena bidimba byuminyine, kadi kuya kudi muntu uvwa ne mushindu wa kwendela kuulu. Yèyè awu uvwa ne mushindu wa kwikala wendakanaku eku ne eku. Úvwa mufwanyine kwikala ne disaamà dya mpàci wa mênýi. Nansha mene ne civwa ncinyi, dikaavwa dilaale bikole. Úkaavwa naadi bidimu makumi asatu ne mwandamukulu. Wakamba ne: “Pàndi mémè mbwela mu ciinà cya mâyi, muntu kampanda udi undyanjidila.” Úvwa ne mushindu wa kwendela kuulu.

346 Kubashiya bônsò balaadile panshi mwaba awu, kadi kuya anu kudi yèyè awu e kumwondopa. Bwa cinyi? Wakamba ne Úvwa mumanye ne yèyè awu ukaavwa mu mushindu awu. Pashiishe kuMwambilabo, kuMwelabo lukonko, paakalwabo kuMupeta. Yone Munsantu 5, Yèyè kwamba ne: “Bulelela, bulelela, Ndi nnwambila ne, Mwânà kèna mwa kwenza cintu nansha cimwe mu Yèyè to, anu cidiiYe umona Taatù wenza.” Ke cyeyemenu Cyende ncyôci aci. Aci ke cìcìdì anu cyeyemenu.

347 Pâmvwà mwimane kuntu kwaka mu Finlande dituku adi, ne mwânà mukese wa balume awu mulaale panshi mwaba awu, ne mémè kwenda nyunguluka, yèyè mulaale mwaba awu, mufwe,

mufwe kukaavwa tusunsa makumi asatu. Nukaadi bacibale mu mukanda. Mêmè kubanga kuumuka, Cintu kampanda kunteeka byanza pambidi. Mêmè kukudimuka, kudyambidila ne: “Civwa ncinyi aci?” Mêmè kutangila cyakabidi. Mêmè kudyambidila ne: “Indilabi kakese.”

³⁴⁸ Mêmè kutapa dîsù lwà paanyima pa dibeji dya munda mutupu dya Bible apa. “Nenku nebyenzeke ne, mwânà wa balume mukese wa bidimu bitwe ku citeema, nebamutuute ku mashinyi afwe. Nekwikale mwaba awu mulongo mule wa mici yitu ne mabeji anu mabishi, mbwebwe mitangalakangane mwômò amu. Mashinyi awu neikale macyamakane mu njila, manyangukangane. Yêyè awu neikale muvuale tunsheshete tukese twa tufikile mu cifuka atu, bu twa nanku, tubândisha kuulu; ne nsuki yende mikosa cisuba. Twîsù twende tukese netwikale tukudimuke tuye mwamwa. Mifuba mu mubidi wende neyiikale micibuke.”

Mêmè kutangila. Kudyambidila ne: “Éyì Nzambi wa yaaya!”

³⁴⁹ Mêmè kwamba ne: “Shaalaayi biimane anu cimùmà, nwênù bônò.” Mulombodi wa cimenga uvwa mwaba awu. Mêmè kwamba ne: “Mwânà awu yêyè kayi mujuuke mwinane kuulu mu tusunsa tubidi emu kuumukila ku mpindyewu, mêmè ndi muprofeta wa mashimi; nungendeshe, nungiipate mu Finlande emu.” Cya bushuwa. “Kadi yêyè mujuuke, nudi beena dibanza dya kufila myoyi yenu kudi Kilisto.” Neya bushuwa. Bôbò kushaala kacya biimana kabayi banyunga to.

³⁵⁰ Mêmè kwamba ne: “Taatu wa mu Dyulu, dyamwamwa dya mbû dyadya, kukaadi bidimu bibidi, Wêwê ukaavwa mwambe ne mwânà mukese wa balume ewu uvwa mwa kwikala mulaadika mwaba ewu.”

³⁵¹ Kuwa Mwaneetu Moore ne Mwaneetu Lindsay mwaba awu, batangile cyôci aci. Nenku, myaba yônso, bavwa bacifunde mu Bible. Ne binunu bya Bibles mu ditunga dijima amu bavwa bacifundemu. Civwa ncinyi? Cyeyemenu. Taatù ukaavwa muleeje civwa mwa kwenzeka. Kakuvwa diciina to, nansha dikese, mwimane mwaba awu. Cyeyemenu, bushuwa, yêyè neajuuke.

³⁵² Anu mu Finlande amu, mùvwà binunu bya bantu biikale balwa ciibufûku, ne bikengela mene bwa kupatula bakwabo pambelu bwa kumpeeshaku mushindu wa kwakula ne bantu, kubapatula kadi kubweja bakwabo. Ke yêyè uvwa mwimane awu, ne byônso abi. Bantu bavwa bannange, ne bakaavwa bamonemone dyondopa dyenzekezeke, kadi eci mmwânà wa balume mulaale panshi mwaba awu, mufwe. Cyeyemenu civwa ncinyi? Cikeena-kumona. “Ndi ngenza cidî Taatù wamba bwa kwenza. Ewu udi ungiitabuujja Mêmè, byenzenzi bîndî Mêmè ngenza neâbyênzè pende.” Ke cyeyemenu cyebe ncyôci aci’s.

353 Mêmè kwamba ne: “Lufu, kwêna mwa kutungunuka ne kushaala mumulame to. Nzambi ukaadi mumane kwakula. Alukila. Mulekele.” Ke mwânà mukese wa balume awu kujuukaye, kuzakanyaye mushindu ewu. Bantu kubangabo kudishinda bu bafwa cipuuka, ne bikwabo. S’ke cyôci aci, cifunda anu muntwamu, ne citwa cyâlâ kudi mulombodi wa cimenga, anyi, kudi mujaadiki wa mikanda mitwa byâlâ wa mbulamatadi. Neya bushuwa.

354 Ncinyi aci? Cyeyemenu, Yesu Kilisto udi umwèumwè awu makeelela, leelu, too ne kashidi. Piikalaci kacyi Nzambi umwèumwè awu wâkimanyika mukaji wa ku Nayina, ne mwambudi wa mwanende wa balume awu. Pavwa muntu kana yônsò ufwa mu miine matuku awu, bavwa bamwela dyakamwe mu majambu. Kabavwa bamulekela ushaala nanku to. Bavwa bamwela mu majambu. Ke Yesu Kilisto nyawu, umwèumwè awu makeelela, leelu, too ne kashidi. Eyowa.

355 Tangilaayi mwamwa mu Mexique, mwânà mukese wa mu diboko awu. Bamwe baa kunudi bàdi bàsanganyibwà apa aba, bàdi basômbe apa aba. Nenku mwânà awu, ngangabuka uvwa mwele cyâlâ pa dîyi difunda, ndifunda kudi Beena Kilisto baa Kantu-ku-byanza. “Mwânà awu uvwa mufwe mu dinda adi pa dîbâ citeema jaajaaja, kadi apa tukaavwa dîbâ dikumi bwine bufuku abu.”

356 Nsongaakaji awu kavwaku mwa kwikala musambiibwe to. Billy mwimane kwaka, mwanaanyi wa balume ewu, uteeta bwa kumupingaja paanyima. Wa bwalu mwikale, ee, ngeela meeki ne bavwa ne baawîsîyê nkama ibidi biimane mwaba awu, kadi yêyê ubabandila pa mitu. Diloolo divwa didyânjile adi, mpofo awu uvwa mutabale, ne yêyê nsongaakaji ewu uvwa mucimanye. Uvwa mwena Katolike.

357 Ke, ndekeelu wa byônsò, pângâakambà ne: “Ndaaku wêwè, Mwaneetu Moore, umusambidile. Bwalu, mwânà awu. . .”

358 Mvula uvwa munkaci mwa kuloka, wa yebeyebe. Bakaavwa biimane mwaba awu kacya ku bwebwebwe mu dinda amu, mu cipalu cinene cya dilwangana ne ngombe aci. Ke mêmè kwamba ne. . . Bavwa bampwekeshilemu ku myonji, lwâ paanyima apu, bwa mêmè kubwela mu mwine mwaba awu. Tuvwa mwaba awu anu bwa maloolo asatu.

359 Mvwa mwimane mwaba awu. Mêmè kwamba ne: “Bu mûmvwâ ngamba. . .” mwikale nyiisha’s. Dya ntangila anyi, mêmè kumona mwânà mukese wa mu diboko kumpala kwanyi aku, mwânà mukese wa cyena Mexique, kayi ne mênù to, musômbe anu mwaba awu unsekeshu, mwaba ewu mene kumpala kwanyi.

360 Mêmè kwamba ne: “Indila kakese, Mwaneetu Moore. Lwâyi nende mwaba ewu.” Kaa, cyeyemenu’s!

361 Baawisiyè kushiyabo njila. Ke yêyè ulwàlwa ewu. Kudyupwilaye panshi wamba ne: “Padre, Padre.”

Mêmè kwamba ne: “Juuka.”

362 Ke Mwaneetu Espinoza kwambaye ne: “Juuka,” umwambila mu ci-Espagnol. Kujuukaye mwaba awu.

Mêmè kwamba ne: “Taatu wa mu Dyulu, nyewu ndi mwimane kaaba aka mu mvula emu.”

363 Nsongaakaji awu, mulenga kwisù wa bidimu bitwe ku makumi abidi ne bisatu, cintu bu nanku, nsuki yende milembelele. Mpala wende mukese awu mubandulula mushindu ewu, ditangila divwà mu mèsù ende adi, ne mwoyi uzuka’s. Úvwa mumone muntu mulume awu uvwa anu mpofo wetu wa menemene ewu kukaavwa bidimu makumi anaayi, mèsù ende kutabalawu pa cibumba cya ku cyambilu apu. Kumanyaye ne piikala Nzambi mwa kutabaja mèsù a mpofo, Yêyè uvwa mwa kwondopa mwanende awu. Ke yêyè uvwa usanganyiibwa mwaba awu awu, kaacintu kakese kuuminyine keela mwinshi mwa mbulankete mushindu awu, kadi kiikale kabole bolebole ne mvula. Úvwa kacya wimana mwaba awu dinda dijima adi, ne mu mapingaja ônsò amu, kabidi. Mwaba awu, tukaavwa bu pa dîbà dikumi ne dimwe, dîbà dikumi jaajaaja bufuku abu, cintu bu nanku awu, kacya anu wakwata mwânà awu kumpala kwende. Nukaadi bamone kaabwalu aku mu cibejibeji cya Beena Kilisto baa Kantu-ku-byanza. Mwaba awu, kacya anu wakwata mwânà awu mushindu awu.

364 Mêmè kwamba ne: “Taatu wa mu Dyulu, mêmè ncyêna mumanye cidì bwalu ebu buswa kwamba to. Ndi mêmè anu musadidi Webe cyanaana. Kadi nyewu ngàmònu mwânà awu mwimane kwaka. Úvwa ne mwoyi. Nyewu mmutentekela byanza, mu Dîná dya Mukalenge Yesu.”

Kwambaye ne: “Waah!” ne kubangaye kudila.

365 Maamu awu kudyapula mwânà kadi kubanga kwela mbila ya mikole. Ke bantu kubangabo kwela mbila mikole mu mwaba awu, ne bakaji bafwa cipuuka ne bikwabo. Mêmè kwamba ne: “Kanwanji kwamba bwalu nansha bumwe pa cyôci aci to. Tumaayi muntu ne mwânà awu, ne maamù awu, baye kudi ngangabuka awu, nenku yêyè èlè cyâlà pa dîyi difunda, ne: ‘Mwânà awu uvwa mufwe. Úvwa mufwe disaamà dya bisulusulu, mu dinda divwa didyanjidile aci, ne, anyi mu dinda adi pa dîbà citeema jaajaaja.’”

366 Ke twètù kupeta dîyi dyela cyâlà kudi ngangabuka awu ne: “Mwânà awu uvwa mwambiibwe ne ‘mmufwe,’” mu nzubu wa mudimu wa ngangabuka mu dinda adi, ne mamwëndè uvwa anu kacya wamwambula uya nende eku ne eku dituku dijima.

367 Civwa ncinyi aci? Cyeyemenu. Civwa ncinyi aci? Yêyè wakiitabuuja ne, piikala Nzambi mwa kutabaja mèsù a mpofo,

(cinyi?) Nzambi uvwa mwa kubiisha bafwe, bwalu Yèyè udi umwèumwè awu makeelela, leelu, too ne kashidi.

368 Mémè ncivwa mutwishiibwe to. Ncivwa paanyi mumanye to anu too ne pângàakalwà kumona. Nenu ndi mwenze anu mmona mwânà awu, civwa ncyeyemenu, cya bushuwa kakuyi mpatà to. Ke yèyè awu mwaba awu's. Bikengela lufu lulekelele udilu lukwate awu.

369 Ke Mwânà wa Nzambi uvwa wenda uya ewu. Lubulubulu lwa lufu alu ke kubangalu luMunyungulukila lwenda lwela monzu. “Kya, mmunyi mudiYe mufwanyine kwikala muprofeta? Mmunyi muvwaYe mufwanyine kwimana mwaba wawa ulekela baMutwila makodi mwîsù? Mmunyi muvwaYe mufwanyine kwimana mwaba wawa, ulekela baMulembakaja, kadi kayiku wenza cintu nansha cimwe pa bwalu abu? Awu kî ng'Emanuwele to. Awu udi anu muntu wetu wa patupu ewu. Mona nta ya bantu bakwacike maala ya basalaayi bakwacike abu. Tangila umone mudi kwîsù Kwende kupweka mashi.”

370 Dyabulu kwambaye ne: “NêmMupetè. NêmMupetè.” Ke yèyè ulwâlwa ewu, bu lubulubulu, kalonda kaa lufu, luMunyungulukila lwenda lwela monzu. Kadi, mwaneetu, lubulubulu alu ndwenze anu lwela lwongo lwa kalonda kaalu aku mu Emanuwele awu, ndwenze anu lupatula, ke kujimijalu kalonda kaalu aku, nansha lufu lwôlò lwine.

371 Kabyena bikemesha to, pashiishe, paakapeta Pôlò mushindu wa kutangilanganaye naalu mpala ne mpala, kwambaye ne: “Wèwè lufu, kalonda keebe kadi penyi? Wèwè lukita, bucimunyi bwebe budi penyi? Twasakidila kudi Nzambi, Yèyè udi utupa bucimunyi!” Lufu lwa Kilisto luvwa cyeyemenu kudi muntu yônsò uvwa naalu bwôwà awu.

372 Wanyi mwoyi udi wamba “amen” ku Dîyî dyônsò didi mu Mukanda Wende. Nkaadi njikija, cya bushuwa mpindyewu. Bikengela anu nkose eci ncishiye. Nwamonu anyi?

373 Ke bwa cinyi mémè ntu mumanye ne Nyuma Mwîmpè ke kaanyi kaleeji-nord katu kandombola. Yèyè ke Udi umfikisha ku dimanya ne Dîyî edi ndilelela. Yèyè ke cyanyi cyeyemenu. Yèyè ke wanyi Muunya. Yèyè ke wanyi Mwoyi. Yèyè ke lwanyi lwongo. Padi ntatu yikutuka, Yèyè ke wanyi Mutooto wa ku nord. Pândî mujimine, Nyuma Mwîmpè ke kaanyi kaleeji-nord kadi kandombola kangaaluja ku mwaba udi ukengediibwa.

374 Mangumba mmenze anu mudi mitooto mikwabo, yidi yôyi yitentemuka pamwe ne buloba. Mitooto mikwabo ayi yitu yôyi yitentemuka padi buloba butentemuka, kadi kî mmutooto wa ku nord to. Buloba budi mwa kutentemuka kutangila kudibu buswe, kadi wôwò udi ushaala kaaba kamwe. Kaa, mwaneetu, Mutooto wa ku nord's mmwele lwongo. Mikwabo yôyi yidi yitentemuka yiya eku ne eku, wèwè udi mwa kuyimwena *apa*

ne *pààpa*, ne myaba mikwabo yònsò. Mushindu awu ke udi ekeleeziya ya cyena mangumba.

³⁷⁵ Kadi Kilisto ke cyeyemenu. Mu Yêyè ke mûdi mwa kuteekela dyeyemena. Pakaadi mangumba makushiye kanjingambaala, tuma wêwè mèsù anu kudi Mutooto wa ku nord awu. Nyuma Mwimpè ke keebe kaleeji-nord. Ûdi Yêyè ushaala anu ne lulamatu kashidi ku Dìyì Dyende.

³⁷⁶ Pavwabo bangambila ne bintu abi kabivwa mwa kwenzeka mu dituku dya cyena leelu bu edi to, mêmè's mvwa mumanye. Piikalabi ne—piikalabi ne—piikalabi ne Nzambi katuku to, nanku ikalaaku wêwè anu ne mwoyi, udyà, unwa, ucyonkomoka. Nzambi udiku, tuMukwacilaayi mudimu. Ne mêmè ndi mufikile too ne ku dimona dya dituku didiYe mwenze bintu byònsò, too ne ku dibiisha dya bafwe, pavwaYe panu pa buloba. Ne ciine aci tudi bacimanyine ku dîyì difunda ditwa cyâlà, bwa ne mbulelela. Eyowa's, mukalenge.

³⁷⁷ Yêyè ke cyanyi cyeyemenu. Mpindyewu Muvwijaaku peebe cyebe Cyeyemenu. Angata mu . . . Mu cikondo cya lwanyi lutatu, Yêyè utu misangu yònsò anu cyeyemenu. Mpindyewu tangilaayi. Ku ngàsà wa Nzambi. . .

³⁷⁸ Mpindyewu bikengela anu njikije. Dìbà dikaadi dyenda dipita. Ee, tangilaayi kuneeku, mvwa mêmè ngeela meeji ne tucidi pa dìbà dikumi ne dimwe, kadi nyewu tukaadi dìbà dikumi ne ibidi ne tusunsa makumi asatu.

³⁷⁹ Balunda baanyi, dituku dijima, bufuku bujima, cidimu cijima, too ne mu Cyendelele cijima, kwèna mufwanyineku kwakula kumana bwa Cyôci aci to. Kwikadi wâteeta kudifwanyikijilaCi to. Kwèna mwa kucyenzaku to. Kakwena mushindu wa kudifwanyikijilaCi to. Wêwè udi wamba ne: “Mwaneetu Branham, pawikala—pawikala wêwè. . .”

³⁸⁰ Mêmè ncyèna mumanye to. Ndi anu ngiitabuuja cyanaana. Ndi mulekele bya diteeta abi, bya dyenza cintu kampanda bwa Cyôci aci abi. Ndi anu nCiitabuuja cyanaana, kwajiki. Nwamonu anyi? “Kî ng'ewu udi unyeema lubilu, anyi ewu udi muswe to; Nzambi ngudi uleeja luse.” Nwamonu anyi? Kî nku byenzedi to. Nku ngàsà. Nwamonu anyi? Ndi anu nCiitabuuja cyanaana. Nzambi, bwalu mbulaale kudiYe Yêyè bwa kwenza bikwabo bidi bishaala abi. Û'Citàbùùjè wêwè anu cyanaana, wènzè maalu bilondeshile Cyôci aci.

³⁸¹ Musambu utu mwende luumu ewu, mvwa muumvwe bawimba ku cisanji anyi bawimba mukana kaaba aka anyi mwaba kampanda:

Kaa, dinanga dya Nzambi, mushindu mwine
udidi dibanjike ne dikezuke's we!
Mushindu mwine udidi kadiyi kwondola
kumana ne dikole!

Neditungunuke ne kwikala kashidi ne kashidi,
Musambu wa Bansantu ne Banjelo.

³⁸² Mu dyenza dya makumi, muntu yêyè muteete bwa kutaata, anyi muteete bwa kuleeja ku tulaasa twende tulonga, yêyè's neakupaadishe mukupa. Kwêna mwa kucyenzaku to. Kuteeci bwa kucyenza to. Kuteeci bwa kudifwanyikijila Ci to. Nzambi mmupite pa didifwanyikijila. Kwêna udifwanyikijila Nzambi to. Udi anu witabuuja Nzambi cyanaana. Aci ke munsoko- . . . Aci ke munsonkontu. Kudifwanyikijidi Ci to. Û' Cîtàbùùjè wêwè anu cyanaana. Mêmè ncyêna mwa kukwambila cîdî Ci cyumvwija to. Ncyêna mwa kukwambila mushindu wa dicyenza to. Ndi mêmè mumanye anu ne ndi anu nCiitabuuja cyanaana. Kwajiki.

³⁸³ Mbyenze anu mûdi wêwè ulaya mwânà mutekete cintu kampanda, pende uciitabuuja amu. Bikengela wêwè ushaale mukwate ku dîyi dyebe. Wêwè udi mwânà wa Nzambi. Yêyè utu ushaala mukwate ku Dîyi Dyende. Ikala wêwè anu mu Cîtàbùùjè cyanaana. Kwikadi utankakana to. Shaala wêwè anu mwaba awu. Nzambi ukaadiku mucyènzè musangu kampanda, Yêyè udi ne cya kucyenza kabidi. Kayi mucyènzè to, Yêyè neakwambile bwa cinyi Kêna mwa kucyenza. Nenku aci ncyà bushuwa. Mpindyewu, shaala wêwè anu naa Ci.

³⁸⁴ Nudi bamanye, cituminyi cimwe cya musambu awu aci . . . Ndi ngeela meeji ne mwaneetu wa balume wa mushinga mukole awu, uvwa mubatiijiibwe diloolo dya makeelela awu, utu wimba musambu awu wa ne: "Kaa, dinanga dya Nzambi." Badi bangambila ne cituminyi aci, katupa kaaci aka, bavwa basangane bakafunde ku cimanu cya lupitaadi lwa babuluke. Kavwa kamba ne:

Bu twêtù mwa kuuja mbù ne mâyi a mukanda,
Anyi bu maulu menza ne mukanda muvunga;
Ne kaamuci kônsò pa buloba kiikale kasala,
Ne muntu yônsò mwikale bu ne wende mudimu
mbu mufundi;
Bwa kufunda dinanga dya Nzambi wa muulu
Mbifwanyine kukamisha mbù;
Anyi mukanda muvunga mmufwanyine kî
mmufwanyine kukumbana byônsò to,
Nansha wôwò mwolola eku ne eku kwa dyulu.

³⁸⁵ Anji elayyi meeji pa bwalu abu. Kadi paabi, bya binaayi bisatu bya buloba bidi anu mâyi pa mâyi. Kadi tangilaayi hydrogène ne oxygène mu lupeepele emu, citaleela ne bikwabo. Nwamonu anyi? Bu ne mutaleela wônsò ewu uvwa mmâyi a mukanda. Kadi elayyi meeji bwa miliyaala, ne binunu bya miliyaala ya miliyaala ya bituuta, bu ne mbifwanyine kwikala tusala. Ne elayyi meeji ku miliyaala ya bantu bakaadiku biikale pa buloba apa, ne umwe ne umwe wabo mwikale ne wende mudimu mbu mufundi. Bwa kwikala kuzabika tusala

atu mu mbû, ne kuteeta kudifwanyikijila dinanga dya Nzambi, s'mbifwanyine kukamisha mbû; anyi mukanda muvunga awu mmufwanyine kubenga kukumbana byônsò abi, nansha wôwò bawôlôle eku kwa Cyendelele kuya koobeka ku Cyendelele cikwabo.

³⁸⁶ KudifwanyikijidiCi to. Kwena mwa kucyenzaku to. Wêwè neujimije lungenyi, pawateeta kudifwanyikijilaCi. Û'Citàbùjè wêwè anu cyanaana. Muvwiye Yêyè awu cyeyemenu cyebe. Shaala mwaba awu, ditalala dipole ne dilabula biwikala kuyi mwa kupwaku mwoyi nansha. Èla lwongo mu Cyôci aci, nenku lwongo lwebe nelukwate munda mwa cilàmbà cikudika.

Twinyikaayaaku mitu yetu.

“Mushindu mwine wûdi Wêwè munene's we! Mushindu mwine wûdi Wêwè munene's we!”

³⁸⁷ Mbanganyi munda emu, ne mitu yenu miinyika mu dinda emu...Tukaadi twenda tusemena ku Cidimu Cipyacipyapya mpindyewu. Kadi peebe nyawu utu mutendeledi wa mu umwe, ne ciine aci's cidì anu cimpè. Ndi ncyanyisha, bwa muntu ne muntu wa kunudi. Mémè ndi mutwishibwe ne Nzambi mmucyányishe. Kadi mu bushuwa bwa bwalu kutuku mwanji kupeta dilabula dya cyeyemenu aci adi anyi?

³⁸⁸ Cyôci Cintu kampana cyûtù kuyiku mwitabuujè bya budingibudingi aci, cyûtù kuyiku mudifwanyikijile aci, kadi Cintu kampana nyawu cyakwandamunu, ne wêwè wamonu nsòmbelu webe mushintuluke kubangila pa dîbà adi. Udi umona's, Dîyi dyônsò dya Nzambi, mulayi wônsò, ùkaadi ùtwibwa “amen,” pa dîbà adi wêwè ukaadi anu kacya wakwata ku cyeyemenu aci. Bwalu, vuluka ne, Yêyè mmwambe ne: “Maulu ne buloba nebijimine, kadi Dîyi Dyanyi kadyakupangilaku to.”

³⁸⁹ Pawikala kuyi mwanji kufika pa kaaba aku to, kaa wêwè mufwanyine kwamba “amen” ku Dîyi dyônsò, piikalabi ne Divwa dibengangane ne twitabaayi wenu, ne Divwa dibengangane ne dingumba dyenu, kadi wêwè udi muswe kukafika pa kaaba aku, bu Mòsà, bu bakwabo abu anyi? Bôbò abu kabavwa mwa kwenza aci pavwabo kabayi bakwate cyeyemenu aci to. Kadi pawikala muciswe mu nsòmbelu webe mu dinda emu, udiku mwa kuswa bwa kuleeja cintu cimwecimwe aci pa kwela kwa byanza byebe muulu cyanaana kudi Nzambi anyi? Nzambi akubeneshe. Mbîmpè, mukalenge. Mu citanda cijima.

³⁹⁰ Taatù wa ngàsà, ndi mumanye ne mûngà musangu netwikale ne cya kushiyangana. Kudi ne cya kwikala cikondo kampana citwikalaku mwa kushiyangana ne buloba ebu. Katwena bamanye ne ndîbà kaayi diine adi to, ne cyôci ciine kaciyena ne cidìci cishintulula menemene to. Piikala cyetu cikondo cijike, pa dîbà adi mpatudi baswe kulwa. Kiipacila keetu kaa kushaala panwapa nkaa kuKukwacila mudimu.

391 Nenku kacya anu ku njila wa diya ku dibutulangana, dîngà dituku, mwakadi Pôlò mu njila wa ku Damaseke, bwa kuyaye kanyangakaja Ekeleeziya, Bukênkè bwakamufomija. Nenku, Éyì Nzambi, Bukênkè abu bwakamulonda, bwalu Buvwa n’Kilisto. Ke yèyè mwaba awu kwelaye lwôngò mu cyeyemenu kampanda, mu mushindu wa ne, nansha lufu lwine, yèyè uvwa mwa kuseka mutangilangane naalu mpala ne mpala, wamba ne: “Twasakidila kudi Nzambi Udi utupeela bucimunyi ku Yesu Kilisto.”

392 Wêwè wâkalwa cyeyemenu mu kaabujima bwa mupostolo awu. Yèyè uvwa . . . Wâkiikala Amen bwende yèyè, mu cyambilu ne cyambilu cyônsò. Wâkiikala Mutooto wa mwoyi wende, dikunji dilombodi. Wâkiikala kaleeji-nord kâakamulombolâ mu cipeepele cikole. Wâkiikala dibuulula. Wâkiikala cikeena-kumona. Wâkiikala dyende ditekemena, lwende lupandu. Nansha pa dîbâ dya lufu, paakamanyaye ne ùkaavwa uya mutangileku, Wêwè wâkatûngunuka ne kwikala anu cyende cyeyemenu.

393 Wêwè uvwa cyeyemenu cya Danye. Uvwa cyeyemenu cya bapofeta bônso. Munkaci mwa dishiilangana dya cyena mangumba, ne ntatu ya mu matuku abo awu, ne Bafaalesa ne Basadoka, kuvwa anu bantu bààkaKwangatâ bu cyeyemenu cyabo.

394 Ne lelu ewu, Mukalenge, balume ne bakaji biikale ne dyumwilangana dya luse, biikale ne dinanga, ne—ne mwoyi miikale yimata mashi, Mukalenge, bwa dilabula dilelela dya kumanya Nzambi, ne dya kwikala ne di—di—ditwishiibwa bwa cyeyemenu kampanda. Pâmwâpa cyônsò civwaku bantu bamanye, kumpala, Mukalenge, civwa nkudivwija mwena ekeleeziya. Kadi tudi tufika ku dyumvwa, mûngâateeci, ne meeji matooke ônsò, kabiya bwa kupanganangana to; Wêwè ngudi mumanye mwoyi wanyi; kadi mwikale mbambila ne: “Kanwena mwa kudivwija beena Ekeleeziya awu to. Nudi nudivwija beena diswa, diswa dya ba-Méthodistes, ne dya ba-Baptistes, ne dya beena Katolike, ne dya beena Mpenta. Kadi nudi nulediibwa mu Ekeleeziya awu, Mubidi musokome wa Kilisto, ne nulwa bidimba bya Mubidi Wende, biikale ne mapâ a Nyuma, bwa kwenza ne Mubidi Wende munene awu ukwate mudimu mu byenzi ne mu bukole.”

395 Nzambi, ke cidi byanza ebi biswe kwamba mu dinda emu, padibi byediibwe muulu apa. “Unteekeku, Éyì Mukalenge. Ungangate, umfwimbe, ungenze. Enzaku anu ne kaaba kaanyi mu nsômbelu kiikale cyeyemenu, muswikiibwe kudi Kilisto, bwa ngiikale nciyi ngeela meeji ku cîngâ cintu to anu ku cyeyemenu aci.” Enzaku nanku, Mukalenge. Bàbènèshèku. Ondopa babeedi ne badi ne ntatu. Sungila badi bajimine.

³⁹⁶ Mpindyewu, Mukalenge, tudi bamanye ne bitu ciibidilu bwa kubiikila bantu ku cyoshelu, kadi aci cikaadi cishaale cilele kutudi. Nenku mu dinda emu, ne byoshelu biine byûle tente, ne bâ—bânà bakese ne—ne bônso, kadi, Mukalenge, mu mushindu kampanda Wêwè ke udi mwakule naabo. Mbeele byanza byabo muulu. Mbangate—mbangate, mutùdi mwa kwamba, dipangadika. Ke cidibo baswe kwenza. Mba—mba—mbaswe cintu kampanda cya cilelela. Nenku nyewu ndambula disambila dyanyi bwabo bôbò. Enzelaku muntu ne muntu nanku, Mukalenge. Ikalaku neetu mpindyewu, mwikale utufwa luse ku mpekaatu yetu, wondopa masaama etu, ne utupa disungidiibwa ditudi naadi dijinga.

³⁹⁷ Nenku, Mukalenge, kumutu kwa byônso, swaku bwa katwikadiku twâpwa mwoyi to, leelu ewu, ne tudi baswikila ku cyeyemenu aci, Mutooto wetu wa ku nord, ku Kalvariyo, kudi Kilisto. Ne Nyuma Mwimpè nyewu wangata Mèyi a Nzambi ne utuvwijila Wu mamweneshiibwe kantu ne kantu, mu kwondopa kwa babeedi, mu kutuleeja kwa bikeena-kumona, mu kubiisha kwa bafwe, ne mu kwenza anu menemene kwa byakamba Ye bwa kwenza.

³⁹⁸ Nenku swaku bwa ekeleeziya ewu ne bantu aba, anyi citupa cya Mubidi wa Kilisto cidi cidisangishe mwaba ewu mu dinda emu eci, biikale ne nsòmbelu udi Yesu mwambe bwa kwikala nende. “Nudi mukele wa mu buloba.” Nenku swaku biikale batwe mukele bilenga menemene mu mushindu wa ne cisumbu cyabo cya bantu cyapeta nyoota. Mukele utu ujuula nyoota. Ne mukele utu ulama bintu anu padiwu ulengangana naabi. Nenku ndi ndomba, Nzambi, bwa Wêwè kwenzela bantu ciine eci, bwa baamona mwa kwikala bapeci baa misuuka, bôbò paabo.

³⁹⁹ Benesha mpaasata wetu, Mwaneetu Neville, musadidi mudipwekeshe ewu, Mukalenge. Mwimane pa kaaba kende kaa mudimu, ne kaneemu kônso, bu cidimba cya Mubidi wa Kilisto, mwikale wenza ne mwende mwônso bwa kulonda byônso byûdi Wêwè mufwanyine kumwambila bwa kwenzaye.

⁴⁰⁰ Benesha balubuludi, bantu abu badi biimane pamwe naanyi ne ngâsâ yônso mu cikondo cikole, cya mîdimâ cîndi mupicile eci.

⁴⁰¹ Imanaku pamwe ne Ekeleeziya udi musambile pamwe naanyi ne mwimane ku luseke lwanyi mu bikondo bya lutatu ewu. Mukalenge, ndi mubanange. Nenku nyewu ndambula disambila dyanyi, bwa baamona mwa kutangija mèsù abo kûdi Wêwè, Mukalenge. Swaku bwa buumusheku mèsù abo ku diima dya cifwaka dya musadidi edi. Swaku batangije mèsù abo kudi Ewu Udi wa Bukole bwônso, Udiku awu. Ne tudi bamanye, Mukalenge, ne twètù tudi ne mikalu. Nansha twètù biikale banganyi, tudi anu baa cifwaka. Kadi kî mmusanjeela to, kadi m’Mukenji. Enzaku nanku, Mukalenge. Ke kutudi twètù

tufunkuna, nkudi Yesu Kilisto Mwânà wa Nzambi. Enzaku bwa Yèyè ikale mulelela menemene kudi muntu ne muntu mwab'ewu leelu ewu, nansha mene kudi bânà bakese, bwa kulwaYe cyeyemenu bwa disangisha dijima. Tudi tulomba mu Dinà dya Yesu. Amen.

Ndi muMunange, ndi muMunange
Bwalu Yèyè wakannanga kumpala
Ne wakampetela lupandu
Pa mucu wa Kalvariyo.

⁴⁰² Mpindyewu, patudi tuwimba cyakabidi apa, labulangana ku cyanza ne muntu kampanda udi kumpala kwebe, paanyima peebe, ku luseke lwebe, bantu bônso balabulangane anu ku cyanza mpindyewu. Ikalaayi anu basombèle panshi. Kudimuka anu cyanaana ulabulangane ku cyanza, pawikala ne mushindu. Nwamonu anyi?

Ndi... (...? ...)
...-kampetela...? ...

Badi bamanyisha anu ne: “Meesa a Mukalenge, bufuku bwa mu dimwe, mundankulu.”

⁴⁰³ Twèlààyaaku byanza muulu mpindyewu bwa tuMwimbile. Mbanganyi, mbanganyi badi bumvwa (wèwè) ne Yèyè udi cyeyemenu cyabo? [Disangisha didi dyamba ne: “Amen.”—Muf.] Diyì, Yèyè udi Dìyì. Nudi nwitabuuja nanku anyi? [“Amen.”] Yèyè udi Diyì. Ne Nyuma Mwîmpè wîmîcîshî Diyì adi, bwa kwenza ne Bukênkè abu bwikale ne mwoyi munda mwenu, bwa Diyì abu, dishindika dya Diyì. Teeka Diyì mu mwoyi webe. Lekela Nyuma Mwîmpè abwele, kadi tangila umone mudi Dìyì dikwata mudimu. Itabuuja. Ikala mudipwekeshe. Kujingi bwa kwikala kampanda wa munene to. Ikala muntu cyanaana, bwa Nzambi amone mwa kukuvwija kampanda. Nwamonu anyi? Eyo. Enzaayi aci mpindyewu.

⁴⁰⁴ Bantu bônso mbaMunange anyi? Ambaayi ne: “Amen.” [Disangisha didi dyamba ne: “Amen.”—Muf.] Nudi bamanye cidu mwaku awu *amen* uswa kwamba anyi? “Biikale nanku.” Amen. Ncya bushuwa.

⁴⁰⁵ Twâmbâàyi ne: “Aleluuyah!” [Disangisha didi dyamba ne: “Aleluuyah!”—Muf.] Nudi bamanye cidu ciine aci ciswa kwamba anyi? “Tumbishaayi Nzambi wetu.”

⁴⁰⁶ Pâmvwà mu Allemagne anu abidi adi panshi aa, mvwa mwimane kumpala kwa bantu, biipacila, binunu makumi asatu anyi makumi anaayi kuntwaku dituku adi, ke mêmè kwamba ne: “Ncintu ncyà pawaci munudi nwènù beena Allemagne aba kanuyi mwa kuumvwaku to.” Mêmè kwamba ne: “Pâmvwà mu njila ngenda ndwa mwab'ewu leelu ewu, mbwa mmumbulukile mu Anglais. Ncya bushuwa.” Mêmè ne: “Kavwaku yèyè ne lutatu to nansha lukese. Ne nyuunyi uvwa mwikile mwaba awu, e kungimbilaye musambu mu Anglais. Mêmè kulwa ngenda

mpweka ne mùsèèsù, nenku maamu mukwabo uvwa mwambule mwânà mukese wa mu diboko pambidi, pângààbwelèdi lwà paanyima pààpa kumfundu kwaka, nenku,” mèmè ne, “mwânà awu uvwa udila mu Anglais. Ncilumbu kaayi nwènù’s?” S’ncyà bushuwa. Kaa, bu nwènù mwa kukenzakana anu cyanaana, Yèyè’s udi usanganyiibwa myaba yònsò. Kí mmwômò anyi? Bushuwa’s, ke mudiYe.

⁴⁰⁷ Mpindyewu twèlààyaaku anu byanza byetu muulu biikale babwite kwìsù, twìmbè, patudi tulomba mpaasata bwa kubandaye kuneeku bwa kututangalajaye apa.

Twǎnjì kujuukilaayi kuulu, dyambedi. Bantu bònsò ikalaayi bajuukile kuulu, bantu bònsò.

⁴⁰⁸ Nudi baMunange anyi? Ambaayi cyakabidi ne: “Amen.” [Disangisha didi dyamba ne: “Amen.”—Muf.]

⁴⁰⁹ Ne nudi bamanye, mwaku ewu *aleluuyah* udi umweumwe awu mu mwakulu wònsò. Ndaayi mu bisuku ne meetu bya ba-Hottentots baa mu Afrike, *aleluuyah* mmwaku umweumwe awu. *Aleluuyah*, bivwa bikengela kwikalaye cibwìpì ne dyelangana dya mwoyi dya bwena Kilisto. Kí mmwômò anyi? *Aleluuyah*, mwaku awu udi uswa kwamba ne “tumbishaayi Nzambi wetu.” Ne Yèyè’s ke udi mukumbanyine ciine aci. Kí mmwômò anyi? Kakuyi mpatà to Yèyè ke wanyi Musungidi. Kakuyi mpatà to Yèyè ke Yesu Kilisto, Mwânà wa Nzambi, bwanyi mèmè. Kakuyi mpatà to Yèyè udi “umweumwe awu makelelela, leelu, too ne kashidi,” bwanyi mèmè. Ke mudiYe bwebe wèwè anyi?

Ndi muMunange, ndi muMunange
Bwalu Yèyè wakannanga kumpala
Ne wakampetela . . . (Nzambi ànùbènèshè).



CYEYEMENU LUA62-1230M

(Absolute)

Diyiisha edi dya Mwaneetu William Marrion Branham dyakayiishiibwa bwa musangu wa kumpala mu Anglais mu dyâlumingu mu dinda, mu matùkù 30 a ngondo wa dikumi ne mwibidi, cidimu cya 1962, mu Branham Tabernacle mu Jeffersonville, Indiana, U.S.A. Ndyumusha pa mukaba wa mēyì ne dituuta ku cyamu mu kaabujima kààdi mu Anglais. Nkudimwinu wa mu Ciluba ewu mmutuuta ku cyamu ne mwabanya kùdi Voice Of God Recordings.

CILUBA

©2021 VGR, ALL RIGHTS RESERVED

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org

Dîyi dya bwena-cintu

Makenji ônsò tudi badilaminyine. Mukanda ewu udi mwa kutuuciibwa pa mabeji ne cyamu cya kwebe kumbelu bwa mudimu webe wêwè anyi bwa kupeeshangana, kabiya bya mfranga to, bu cintu cya kutangalaja naaci Evanjeeliyo wa Yesu Kilisto. Mukanda ewu kawenaku mwa kusumbishiibwa, kuvudijiibwa bya bipitepite, kwediibwa mu cibànzà cya lùntàndalà, kulamiibwa mu cikàlwilà, kukudimunyiibwa mu myakulu mikwabo, anyi kulombesha naawu mpetu kakuyi mukanda wa cishimbi-dîyi wa dikwanyishila mukufundila kudi Voice Of God Recordings® nansha.

Bwa kumanya maalu makwabo anyi kupeta bîngà bintu bitudi naabi, anyisha webeje:

VOICE OF GOD RECORDINGS
P.O. BOX 950, JEFFERSONVILLE, INDIANA 47131 U.S.A.
www.branham.org